

新唐書

冊九



唐書卷一百十五

宋 端 明 殿 學 士 宋 祁 撰

列傳第四十

狄郝朱

狄仁傑字懷英并州太原人爲兒時門人有被害者吏就詰衆爭辨對仁傑誦書不置吏讓之答曰黃卷中方與聖賢對何暇偶俗吏語耶舉明經調汴州參軍爲吏誣訴黜陟使閻立本召訊異其才謝曰仲尼稱觀過知仁君可謂滄海遺珠矣薦授并州法曹參軍親在河陽仁傑登太行山反顧見白雲孤飛謂左右曰吾親舍其下瞻悵久之雲移乃得去同府參軍鄭崇質母老且疾當使絕域仁傑謂曰君可貽親萬里憂乎詣長史藺仁基請代行仁基咨美其誼時方與司馬李孝廉不平相語曰吾等可少愧矣則相待如初每曰狄公之賢北斗以南一人而已稍遷大理丞歲中斷久獄萬七千人時稱平恕左威衛大將軍權善才右監門中郎將范懷義坐誤斧昭陵栢罪當免高宗詔誅之仁傑奏不

應死帝怒曰是使我爲不孝子必殺之仁傑曰漢有盜高廟玉環文帝欲當之族張釋之廷諍曰假令取長陵一抔土何以加其法於是罪止棄市陛下之法在象魏固有差等犯不至死而致之死何哉今誤伐一栢殺二臣後世謂陛下爲何如主帝意解遂免死數日授侍御史左司郎中王本立怙寵自肆仁傑劾奏其惡有詔原之仁傑曰朝廷借乏賢如本立者不虧陛下惜有罪虧成法奈何臣願先斥爲羣臣戒本立抵罪繇是朝廷肅然使岐州亡卒數百剽行人道不通官捕繫盜黨窮訊而餘曹紛紛不能制仁傑曰是其計窮且爲患乃明開首原格出繫者稟而縱之使相曉皆自縛歸帝嘆其達權宜遷度支郎中帝幸汾陽宮爲知頓使并州長史李冲玄以道出妬女祠俗言盛服過者致風雷之變更發卒數萬改馳道仁傑曰天子之行風伯清塵雨師灑道何妬女避邪止其役帝壯之曰真丈夫哉出爲寧州刺史撫和戎落得其歡心郡人勒碑以頌入拜冬官侍郎持節江南巡撫使吳楚俗多淫祠仁傑一禁止凡毀千七百房止留夏禹吳太伯季札伍員四祠而已轉文昌右丞出豫州刺史時越王兵敗

支黨餘二千人論死仁傑釋其械密疏曰臣欲有所陳似爲逆人申理不言且累陛下欽恤意表成復毀自不能定然此皆非本惡註誤至此有詔悉謫戍邊囚出寧州父老迎勞曰狄使君活汝邪因相與哭碑下囚齋三日乃去至流所亦爲立碑初宰相張光輔討越王軍中特功多暴索仁傑拒之光輔怒曰州將輕元帥邪仁傑曰亂河南者一越王公董士三十萬以平亂縱使暴橫使無辜之人咸墜塗炭是一越王死百越王生也且王師之至民歸順以萬計自縊而下四面成蹊奈何縱邀賞之人殺降以爲功冤痛徹天如得上方斬馬劍加君頸雖死不恨光輔還奏仁傑不遜左授復州刺史徙洛州司馬天授二年以地官侍郎同鳳閣鸞臺平章事武后謂曰卿在汝南有善政然有譖卿者欲知之乎謝曰陛下以爲過臣當改之以爲無過臣之幸也譖者乃不願知后嘆其長者時太學生謁急后亦報可仁傑曰人君惟生殺柄不以假人至簿書期會宜責有司尙書省決事左右丞不句杖左右丞相不判徙況天子乎學徒取告丞簿職耳若爲報可則胄子數千凡幾詔耶爲定令示之而已后納其言會爲來

俊臣所構捕送制獄于時訊反者一問卽承聽減死俊臣引仁傑置對答曰有周革命我乃唐臣反固實俊臣乃捩繫其屬王德壽以情謂曰我意求少遷公爲我引楊執柔爲黨公且免死仁傑歎曰皇天后土使仁傑爲此乎卽以首觸柱血流沫面德壽懼而謝守者寢弛卽丐筆書帛置褚衣中好謂吏曰方暑請付家徹絮仁傑子光遠得書上變后遣使案視俊臣命仁傑冠帶見使者私令德壽作謝死表附使以聞后乃召見仁傑謂曰承反何耶對曰不承反死笞掠矣示其表曰無之后知代署因免死武承嗣屢請誅之后曰命已行不可返時同被誣者鳳閣侍郎任知古等七族悉得貸御史霍獻可以首叩殿陛苦爭欲必殺仁傑等乃貶仁傑彭澤令邑人爲置生祠萬歲通天中契丹陷冀州河北震動擢仁傑爲魏州刺史前刺史懼賊至驅民保城修守具仁傑至曰賊在遠何自疲民萬一虜來吾自辦之何預若輩悉縱就田虜聞亦引去民愛仰之復爲立祠俄轉幽州都督賜紫袍龜帶后自製金字十二於袍以旌其忠召拜鸞臺侍郎復同鳳閣鸞臺平章事時發兵戍疏勒四鎮百姓怨苦仁傑諫曰天生

四夷皆在先王封域之外東距滄海西隔流沙北橫大漠南阻五嶺天所以限中外也自典籍所紀聲教所暨三代不能至者國家旣已兼之詩人矜薄伐於太原化行於江漢前代之遐裔而我之域中過夏商遠矣今乃用武荒外邀功絕域竭府庫之實以爭磽确不毛之地得其人不足以增賦獲其土不可以耕織苟求冠帶遠夷不務固本安人此秦皇漢武之所行也傳曰與覆車同軌者未嘗安此言雖小可以喻大臣伏見國家師旅歲出調度之費徃以寢廣右戍四鎮左屯安東杼軸空匱轉輸不絕行役旣久怨曠者多上不是恤則政不行政不行則害氣作害氣作則蟲螟生水旱起矣方今關東荐饑蜀漢流亡江淮而南賦斂不息人不復本則相率爲盜本根一搖憂患非淺所以然者皆貪功方外耗竭中國也昔漢元帝納賈捐之之謀而罷珠崖宣帝用魏相之策而棄車師田貞觀中克平九姓冊拜李思摩爲可汗使統諸部夷狄叛則伐降則撫得推亡固存之義無遠戍勞人之役今阿史那斛瑟羅皆陰山貴種代雄沙漠若委之四鎮以統諸蕃建爲可汗遣禦寇患則國家有繼絕之美無轉輸之苦

損四鎮肥中國罷安東實遼西省軍費於遠方并甲兵於要塞恆代之鎮重而邊州之備豐矣且王者外寧容有內危陛下姑敕邊兵謹守備以逸待勞則戰士力倍以主禦客則我得其便堅壁清野寇無所得自然深入有顛躓之慮淺入無虜獲之益不數年二虜不討而服矣又請廢安東復高姓爲君長省江南轉饟以息民不見納張易之嘗從容問自安計仁傑曰惟勸迎廬陵王可以免禍會后欲以武三思爲太子以問宰相衆莫敢對仁傑曰臣觀天人未厭唐德比匈奴犯邊陛下使梁王三思募勇士於市踰月不及千人廬陵王代之不浹日輒五萬今欲繼統非廬陵王莫可后怒罷議久之召謂曰朕數夢雙陸不勝何也於是仁傑與王方慶俱在二人同辭對曰雙陸不勝無子也天其意者以倣陛下乎且太子天下本本一搖天下危矣文皇帝身蹈鋒鏑勤勞而有天下傳之子孫先帝寢疾詔陛下監國陛下掩神器而取之十有餘年又欲以三思爲後且姑姪與母子孰親陛下立廬陵王則千秋萬歲後常享宗廟三思立廟不祔姑后感悟卽日遣徐彥伯迎廬陵王於房州王至后匿王帳中召見仁傑



語廬陵事仁傑數請勿至涕下不能止后乃使王出曰還爾太子仁傑降拜頓首曰太子歸未有知者人言紛紛何所信后然之更令太子舍龍門具禮迎還中外大悅初吉頊李昭德數請還太子而后意不回唯仁傑每以母子天性爲言后雖忤忍不能無感故卒復唐嗣尋拜納言兼右肅政御史大夫突厥入趙定殺掠甚衆詔仁傑爲河北道行軍元帥假以便宜突厥盡殺所得男女萬計由五回道去仁傑追不能逮更拜河北安撫大使時民多脅從於賊賊已去懼誅逃匿仁傑上疏曰議者以爲虜入寇始明人之逆順或迫脅或願從或受僞官或爲招慰誠以山東之人重氣一往死不爲悔比緣軍興調發煩重傷破家產別屋賣田人不爲售又官吏侵漁州縣科役督趣鞭笞情危事迫不循禮義投跡犬羊以圖賒死此君子所愧而小人之常民猶水也壅則爲淵疏則爲川通塞隨流豈有常性昔董卓之亂神器播越卓已誅禽部曲無赦故事窮變生流毒京室比由恩不溥洽失在機先今負罪之伍潛竄山澤赦之則出不赦則狂山東羣盜緣茲聚結故臣以爲邊鄙暫警不足憂中土不寧可爲憂也夫持

大國者不可以小治事廣者不可以細分人主所務弗檢常法願曲赦河北一不問罪詔可還除內史后幸三陽宮王公皆從獨賜仁傑第一區眷禮卓異時無輩者是時李楷固駱務整討契丹克之獻俘含樞殿后大悅二人者本契丹李盡忠部將盡忠入寇楷固等數挫王師後降有司請論如法仁傑稱其驍勇可任若貸死必感恩納節可以責功至是凱旋后舉酒屬仁傑賞其知人授楷固左玉鈐衛將軍燕國公賜姓武務整右武威衛將軍后將造浮屠大像度費數百萬官不能足更詔天下僧日施一錢助之仁傑諫曰工不役鬼必在役人物不天降終由地出不損百姓且將何求今邊垂未寧宜寬征鎮之徭省不急之務就令顧作以濟窮人既失農時是爲棄本且無官助理不得成既費官財又竭人力一方有難何以救之后由是罷役聖曆三年卒年七十一贈文昌右相諡曰文惠仁傑所薦進若張柬之桓彥範敬暉姚崇等皆爲中興名臣始居母喪有白鵲馴擾之祥中宗卽位追贈司空睿宗又封梁國公子光嗣景暉光嗣聖曆初爲司府丞武后召宰相各舉尙書郎一人仁傑薦光嗣由是拜地

官員外郎以稱職聞后曰祁奚內舉果得人歷溜許貝三州刺史母喪奪爲太府少卿固讓睿宗嘉其誠許之累遷揚州長史以罪貶歙州別駕卒景暉官魏州司功參軍貪暴爲虐民苦之因共毀其父生祠不復奉至元和中田弘正鎮魏博始奏葺之血食不絕族孫兼謨

兼謨字汝諧及進士第辟襄陽使府剛正有祖風令狐楚執政薦授左拾遺數上書言事歷刑部郎中斬鄧鄭三州刺史歲旱饑發粟賑濟民人不流徙改蘇州以治最擢給事中左藏史盜度支縑帛文宗以經赦詔勿治兼謨封還詔書帝問之對曰典史犯贓不可免帝曰朕已赦其長官吏亦宜宥與其失信寧失罪人旣而曰後或事有不可勿以還詔爲憚遷御史中丞帝曰御史臺朝廷綱紀一臺正則朝廷治朝廷正則天下治畏忌顧望則職業廢矣卿梁公後當嗣家聲不可不慎兼謨頓首謝江西觀察使吳士矩加給其軍擅用上供錢數十萬兼謨劾奏觀察使爲陛下守土宣國詔條知臨戎賞土州有定數而與奪由己貶弊一方爲諸道缺望請付有司治罪士矩繇是貶蔡州別駕歷兵部侍郎

河東節度使還爲尚書左丞武宗子峴封益王命兼謨爲傅俄領天平節度使辭疾以祕書監歸洛陽遷東都留守卒

郝處俊安州安陸人父相貴因隋亂與婦翁許紹據峽州歸國拜滁州刺史封甌山縣公處俊甫十歲而孤故吏歸千緡贈之已能讓不受及長好學嗜漢書崖略暗誦貞觀中第進士解褐著作佐郎襲父爵兄弟友睦事諸舅謹甚再轉滕王友恥爲王府屬棄官去久之召拜太子司議郎累遷吏部侍郎高麗叛詔李勣爲涇江道大總管處俊副之師入虜境未障賊遽至舉軍危駭處俊方據胡牀體胖安餐乾糲不顧密畀料精銳擊之虜卻衆壯其謀入拜東臺侍郎時浮屠盧伽逸多治丹曰可以續年高宗欲遂餌之處俊諫曰修短固有命異方之劑安得輕服哉昔先帝詔浮屠那羅邈婆寐案其方書爲祕劑取靈籙怪石歷歲乃能就先帝餌之俄而大漸上醫不知所爲羣臣請顯戮其人議者以爲取笑夷狄故法不得行前鑑不遠惟陛下深察帝納其言第拜盧伽逸多爲懷化大將軍進處俊同東西臺三品咸亨初幸東都皇太子監國諸宰相皆留而

處俊獨從帝嘗曰王者無外何爲守禦而重門擊柝庸待不虞耶我嘗疑秦法爲寬荆軻匹夫耳七首竊發羣臣皆荷戟侍莫敢拒豈非習慢使然處俊對曰此乃法急耳秦法輒升殿者夷三族人皆懼族安有敢拒邪魏曹操著令曰京城有變九卿各守其府後嚴才亂與徒數十人攻左掖門操登銅爵臺望之無敢救者時王脩爲奉常聞變召車騎未至領官屬步至宮門操曰彼來者必王脩乎此由脩察變識機故冒法赴難向若拘常則遂成禍矣故王者設法不可急亦不可慢詩曰不懈於位人之攸壻仁也式遏寇虐無俾作慝刑也書曰高明柔克沈潛剛克中道也帝曰善轉中書侍郎監修國史初顯慶中令狐德棻劉胤之撰國史其後許敬宗復加緒次帝恨敬宗所紀失實更命宰相刊正且曰朕昔從幸未央宮辟仗旣過有橫刀伏草中者先帝斂轡却謂朕曰事發當死者數十人汝可命出之史臣惟敘此爲實處俊曰先帝仁恩溥博類非一臣之弟處傑被擇供奉時有三衛誤拂御衣者懼甚先帝曰左右無御史我不汝罪帝曰此史臣應載處俊乃表左史李仁實欲刪整僞辭會仁實死而止上元

初帝觀酺翔鸞閣時赤縣與太常音技分東西朋帝詔雍王賢主東周王顯主西因以角勝處俊曰禮所以示童子無誑者恐其欺詐之心生也二王春秋少意操未定乃分朋造黨使相誇彼俳兒優子言辭無度爭負勝相譏誚非所以導仁義示雍和也帝遽止歎曰處俊遠識非衆臣所逮遷中書令兼太子賓客檢校兵部尚書帝多疾欲遜位武后處俊諫曰天子治陽道后治陰德然則帝與后猶日之與月陽之與陰各有所主不相奪也若失其序上謫見于天下降災諸人昔魏文帝著令帝崩不許皇后臨朝今陛下奈何欲身傳位天后乎天下者高祖太宗之天下非陛下之天下正應謹守宗廟傳之子孫不宜持國與人以喪厥家中書侍郎李義琰曰處俊言可從惟陛下不疑事遂沮又兼太子左庶子拜侍中罷爲太子少保開耀元年卒年七十五贈開府儀同三司荊州大都督帝哀歎其忠舉哀光順門祭以少牢賻絹布八百段米粟八百石詔百官赴哭官庀葬事子北叟固辭未聽裴炎爲白帝曰處俊阼死諉臣曰生無益于國死無煩費凡詔賜願一罷之帝聞惻然答其意止賻物而已處俊資約素

土木形骸然臨事敢言自秉政在帝前議論諄諄必傳經義凡所規獻得大臣體武后雖忌之以其操履無玷不能害與舅許圜師同里俱宦達鄉人田氏彭氏以高貲顯故江淮間爲語曰貴如郝許富如田彭

孫象賢垂拱中爲太子通事舍人后素銜處俊故因事誅之臨刑極罵乃死后怒令離磔其尸斲夷祖父棺冢自是訖後世將刑人必先以木丸塞口云

朱敬則字少連亳州永城人以孝義世被旌顯一門六闕相望敬則志尙恢博好學重節義然諾善與人交振其急難不責報於人與左史江融左僕射魏元忠善咸亨中高宗聞其名召見異之爲中書令李敬玄所毀故授洹水尉久之除右門闕初武后稱制天下頗流言遂開告密羅織之路興大獄誅將相大臣至是已革命事漸寧敬則諫曰臣聞李斯之相秦也行申商之法重刑名之家杜私門張公室棄無用之費損不急之官惜日愛功亟戰疾耕旣庶而富遂屠諸侯此救弊之術也故曰刻薄可施於進趨變詐可陳於攻戰天下已平故可易之以寬簡潤之以淳和秦乃不然淫虐滋甚往而不反卒至土崩此不知變

之禍也陸賈叔孫通事漢祖當滎陽成臯間糧餉窮智勇困未嘗敢開一說效一奇惟進豪猾貪暴之人及區宇適定乃陳詩書說禮樂開王道高帝忿然曰吾以馬上得之安事詩書對曰馬上得之可馬上治之乎帝默然於是賈著新語通定禮儀此知變之善也向若高帝斥二子置詩書重攻戰尊首級則復道爭功拔劍擊柱晷漏不保何十二帝二百年乎故曰仁義者聖人之蘧廬禮者先王之陳迹祠祝畢芻狗捐淳精流糟粕棄仁義尙爾況其輕乎國家自文明以來天地草昧內則流言外則構難故不設鉤距無以順人不切刑罰無以息暴於是置神器開告端故能不出房闈而天下晏然易主矣臣聞急趨者無善迹促柱者無和聲拯溺不規行療饑不鼎食卽向時祕策今之芻狗也願鑒秦漢之失考時事之宜毀蘧廬遺糟粕下寬大之令流曠蕩之澤去萋斐之角牙頓姦險之芒刃塞羅織之妄源掃朋黨之險迹曠然使天下更始豈不樂哉后善其言遷正諫大夫兼修國史乃請高史官選以求名才侍中章安石嘗閱其史藁歎曰董狐何以加世人不知史官權重宰相宰相但能制生人史官兼制



生死古之聖君賢臣所以畏懼者也時賦斂繁重民多蕩析后數召入禁中訪失得進同鳳閣鸞臺平章事張易之構魏元忠張說欲誅之無敢言者敬則獨奏曰元忠說秉心忠一而所坐無名殺之失天下望乃得不死以老疾還政事俄改成均祭酒冬官侍郎易之等集名儒譟三教珠英又繪武三思李嶠蘇味道李迥秀王紹宗等十八人像以爲圖欲引敬則固辭不與世潔其爲人出爲鄭州刺史遂致仕侍御史冉祖雍誣奏與王同皎善貶涪州刺史旣明非其罪改廬州代還無淮南一物所乘止一馬子曹步從以歸卒年七十五敬則與三從昆弟居四十年貲產無異及執政每以用人爲先細務不省也嶺表蠻叛以裴懷古有文武才用爲桂州都督蠻服其威惠相率降薦魏知古爲鳳閣舍人張思敬爲右史皆稱職初二張權寵盛敬則密謂敬暉曰公若假太子令舉北軍誅易之兄弟兩飛騎力耳暉卒用其策始崔寔仲長統王朗曹冏論封建指秦爲失敬則以爲秦漢世禮義陵遲不可復用周制封諸侯著論明之儒者以爲知言睿宗嗣位嘗曰神龍以來忠於本朝者李多祚王同皎韋月將燕欽融

並襄復矣尙有遺者耶劉幽求曰朱敬則忠正義烈天下所推往爲宗楚客冉祖雍等所誣謫守刺史長安中嘗語臣曰相王必受命當悉心事之及韋氏干紀臣遂見危赴難雖天誘其衷亦敬則啓之於是追贈祕書監諡曰元

敬則兄仁軌字德容隱居養親嘗誨子弟曰終身讓路不枉百步終身讓畔不失一段有赤烏白鵲棲所居樹按察使趙承恩表其異及卒郭山暉員半干魏知古共諡爲孝友先生

贊曰武后乘唐中衰操殺生柄劫制天下而攘神器仁傑蒙恥奮忠以權大謀引張柬之等卒復唐室功蓋一時人不及知故唐呂溫頌之曰取日虞淵洗光咸池潛授五龍夾之以飛世以爲名言方高宗舉天下將以禪后處俊固爭不使妻乘夫陰反陽至姦人銜怨仇鬻以逞蓋所謂誼形於主耶敬則一諫而羅織之獄衰時而後言者歟

唐書卷一百十六

宋 端 明 殿 學 士 宋 祁 撰

列傳第四十一

二王韋陸二李杜

王綝字方慶以字顯其先自丹楊徙雍咸陽父弘直爲漢王元昌友王好畋游上書切諫王稍止然益疏斥終荆王友方慶起家越王府參軍受司馬遷班固二史於記室任希古希古他遷就卒其業武后時累遷廣州都督南海歲有崑崙舶市外區琛琲前都督路元徽冒取其貨舶曾不勝忍殺之方慶至秋毫無所索始部中首領沓墨民詣府訴府曹素相餉謝未嘗治方慶約官屬不得與交通犯者痛論以法境內清畏議者謂治廣未有如方慶者號第一下詔賜瑞錦雜綵以著善政轉洛州長史封石泉縣子遷鸞臺侍郎同鳳閣鸞臺平章事進鳳閣侍郎神功初清邊道大總管武攸宜破契丹凱還且獻俘內史王及善以孝明帝忌月請鼓吹備而不作方慶曰晉穆帝納后當康帝忌月時以爲疑

荀納謂禮有忌日無忌月自月而推則忌時忌年愈無理據世用其言臣謂軍  
方大凱作樂無嫌詔可武后幸玉泉祠以山道險欲御腰輿方慶奏昔張猛諫  
漢元帝乘船危就橋安帝乃從橋今山阿危峭墜道曲狹比於樓船又復甚危  
陛下奈何輕踐畏塗哉后爲罷行方慶嘗以令期及大功喪未葬不聽朝賀未  
除弗豫享宴比羣臣不遵用頽紊教誼不可長有詔申責內外畏之后嘗就求  
義之書方慶奏十世從祖義之書四十餘番太宗求之先臣悉上送今所存惟  
一軸并上十一世祖導十世祖洽九世祖珣八世祖曇首七世祖僧綽六世祖  
仲寶五世祖騫高祖規曾祖襄并九世從祖獻之等凡二十八人書共十篇后  
御武成殿徧示羣臣詔中書舍人崔融序其代闕號寶章集復以賜方慶士人  
歆其寵以老乞身改麟臺監脩國史中宗復爲皇太子拜方慶檢校左庶子后  
欲季冬講武有司不時辦遂用明年孟春方慶曰按月令孟冬天子命將帥講  
武習射御角力此乃三時務農一時講武安不忘危之道孟春不可以稱兵兵  
金也金勝木方春木王而舉金以害威德逆生氣孟春行冬令則水潦爲敗雪

霜大擊首種不入今孟春講武以陰政犯陽氣害發生之德臣恐水潦敗物霜雪損稼夏麥不登願陛下不違時令前及孟冬以順天道手制褻尤是歲真拜左庶子進封公奉入同職事三品兼侍太子讀書方慶奏人臣於天子未有斥太子名者晉山濤啓事稱皇太子不名孝敬爲太子更弘爲崇沛王爲太子更賢爲文今東宮門殿名多嫌觸請一改之以協舊典制可長安二年卒贈兗州都督諡曰貞中宗復位以東宮舊臣贈吏部尙書方慶博學練朝章著書二百餘篇尤精三禮學者有所咨質酬復淵詣故門人次爲雜禮答問家聚書多不減祕府圖畫皆異本方慶歿後諸子不能業隨皆散亡孫備六世孫瓌別傳瓌曾孫搏

贊曰李德裕著書稱方慶爲相時子爲眉州司士參軍武后曰君在相位何子之遠對曰廬陵是陛下愛子今尙在遠臣之子庸敢相近以比倉唐悟文侯事嗟乎君子哉雖造次不忘悟君於善及建言不斥太子名以動羣臣示中興之漸所謂人難言者於方慶難乎哉德裕之稱爲不誣矣

備字靈龜明經調莫州參軍辟范陽節度使張守珪幕府時契丹屈烈部將謀入寇河北騷然備至虜中脅說禍福虜乃不入安祿山叛拜博陵常山二太守副河北招討卒贈太常卿自襄至備六世封石泉云備孫遂

遂好興利操下以嚴累遷鄧州刺史太府卿西北供軍使與度支潘孟陽爭營田事憲宗怒出遂為柳州刺史親吏韋行素柳季常當受課料兩池吏見遂斥即抵以罪始詔書出左丞呂元膺劾遂補吏犯贓法當坐而詔稱清能業官按遂犯有狀不宜謂清且柳大州不可使治帝喻之乃下會兵宿淮西亟財賦藉遂幹彊拜宣歙觀察使蔡已平師東討李師道召為光祿卿淄青行營糧料使辭卿職換檢校左散騎常侍兼御史大夫始調兵食歲三百萬俄而賊誅遂簿羨貲百萬以獻帝高其能于時析齊為三鎮即拜遂沂兗海觀察使遂資福刻杖扑皆踰制盛夏治署舍牆垣程督慘峭將吏素悍戾遂輒罵曰反殘賊人人羞忿裨校王弁與役人浴于川語曰天方兩牆且毀等罪耳乃謀亂明日遂方燕弁率其黨挾兵進遂驚匿廁下執而數其罪殺之其副張敦實官屬李矩甫

皆死弁自知留事帝以沂海新定畏青鄆亦搖乃拜弁開州刺史至徐州械送京師斬東市監軍上遂所製杖出示於朝爲戒云

搏字昭逸擢進士第辟佐王鐸滑州節度府累遷蘇州刺史久之以戶部侍郎判戶部乾寧初進同中書門下平章事董昌誅出爲威勝節度使未行加檢校尙書右僕射浙東西宣撫使會錢鏐兼領二浙故留拜門下侍郎同中書門下平章事判度支昭宗建嫡后搏請因赦天下以尊大其禮正拜右僕射遷司空封魯國公初中官權威帝欲剪抑之自石門還政一決宰相羣宦不平構藩鎮內脅天子搏曰人君務平心大體御萬物偏聽產亂古所戒也今奄人盜威福偏制君上道路人皆知之方朝廷多難未可卒除當徐以計去之事急且有變崔胤與搏並位素忌搏明達有謀卽劾搏爲中官外應會胤罷宰相疑搏擠斥乃厚結朱全忠薦己復輔政卽譖搏與樞密使宋道弼景務脩交私將危社稷全忠因顯疏其尤光化三年罷爲工部侍郎貶溪州刺史又貶崖州司戶參軍事賜死藍田驛

韋思謙名仁約以近武后父諱爲嫌遂以字行其先出雍州杜陵後客襄陽更徙爲鄭州陽武人八歲喪母以孝聞及進士第累調應城令負殿不得進官吏部尙書高季輔曰予始得此一人豈以小疵棄大德邪擢監察御史常曰御史出使不能動搖山岳震懼州縣爲不任職中書令褚遂良市地不如直思謙劾之罷爲同州刺史及復相出思謙清水令或弔之答曰吾狷直觸機輒發暇卹身乎丈夫當敢言地要須明目張膽以報天子焉能錄錄保妻子耶沛王府長史皇甫公義引爲倉曹參軍謂曰公非池中物屈公爲數旬客以重吾府改侍御史高宗賢之每召與語雖甚倦徙倚軒檻猶數刻罷疑獄劇事多與參裁武候將軍田仁會誣奏御史張仁禕帝廷詰仁禕懦不得對思謙爲辯其枉因言仁會營罔陷人不測者詞旨詳暢帝善之仁禕得不坐累遷右司郎中尙書左丞振明綱轄朝廷肅然進御史大夫性審諤顏色莊重不可犯見王公未嘗屈禮或以爲譏答曰耳目官固當特立鵬鷺鷹鷂豈衆禽之偶奈何屈以狎之帝崩思謙扶疾入臨涕泗冰須俯伏號絕詔給扶侍轉司屬卿復爲右肅政大夫



故事大夫與御史鈞禮思謙獨不答或以爲疑思謙曰班列固有差奈何尙姑息邪垂拱初封博昌縣男同鳳閣鸞臺三品轉納言辭疾不許詔肩輿以朝聽子孫侍以太中大夫致仕卒贈幽州都督子承慶嗣立

承慶字延休性謹畏事繼母爲篤孝擢進士第補雍王府參軍府中文翰悉委之王爲太子遷司議郎儀鳳中詔太子監國太子稍嗜聲色興土功承慶見造作玩好浮廣倡優鼓吹謹譁戶奴小人皆得親左右承顏色恐因是作威福宜加繩察乃上疏極陳其端又進諭善箴太子頗嘉納承慶嘗謂人所以擾濁浮躁本之於心乃著靈臺賦譏揣當世亦自廣其志太子廢出爲烏程令累遷鳳閣舍人掌天官選屬文敏無留思雖大詔令未嘗著毫失大臣意出爲沂州刺史明堂災上疏諫以文明垂拱後執政者未滿歲率以罪去大抵皆惡逆不道夫構大廈濟巨川必擇文梓餘艘若亟毀而敗則是用朽木乘膠船也臣謂陛下求賢之意切而取人之路寬故一言有合而付大任夫以堯舉舜猶歷試諸難況庸庸者可超處輔相以百揆萬幾畀小人哉書不報未幾復爲舍人掌選

病免改太子諭德歷豫號二州刺史有善政轉天官侍郎修國史凡三掌選銓授平允議者公之長安中拜鳳閣侍郎同鳳閣鸞臺平章事張易之誅承慶以素附離免冠待罪時議草赦令咸推承慶召使爲之無撓色誤辭援筆而就衆嘆其壯然以累猶流嶺表歲餘拜辰州刺史未行以祕書員外少監召兼修國史封扶陽縣子招撰武后紀聖文中宗善之遷黃門侍郎未拜卒帝悼之召其弟相州刺史嗣立會葬因拜黃門侍郎繼其位贈禮部尙書諡曰溫

嗣立字延構與承慶異母少友悌母遇承慶嚴每笞輒解衣求代母不聽卽遣奴自捶母感寤爲均愛世比晉王覽第進士累調雙流令政爲二川最承慶解鳳閣舍人武后召嗣立謂曰爾父嘗稱二子忠且孝堪事朕比兄弟稱職如而父言今使卿兄弟自相代卽拜鳳閣舍人時學校廢刑濫及善人乃上書極陳永淳後庠序墮散胄子衰缺儒學之官輕章句之選弛貴閥後生以徼倖升寒族平流以替業去垂拱間仕入彌多公行私謁選補逾濫經術不聞猛暴相夸陛下誠下明詔追三館生徒敕王公以下子弟一入太學尊尙師儒發揚勸獎

海內知嚮然後審昇銓總各程所能以之臨人則官無曠民樂業矣又曰揚豫  
以來大獄屢興窮治連捕數年不絕大猾伺間陰相影會構似是之言正不赦  
之辜恣行楚慘類自誣服王公士人至連頸就戮道路藉藉咸知其非而鍛鍊  
已成不可翻動小則身誅大則族夷相緣共坐者庸可勝道彼皆報讎復嫌苟  
圖功求官賞耳臣願陛下廓天地之施雷雨之仁取垂拱以來罪無重輕所不  
赦者普皆原洗死者還官生者霑恩則天下瞭然知向所陷罪非陛下意也長  
安中拜鳳閣侍郎同鳳閣鸞臺平章事時州縣非其人后以爲憂李嶠唐休璟  
曰今朝廷重內官輕外職每除牧守皆訴不行非過累不得遣請選臺閣賢者  
分典大州自近臣始后曰誰爲朕行嗣立曰內典機要非臣所堪請先行以示  
羣臣后悅以本官檢校汴州刺史由是左肅政大夫楊再思等十八人悉補外  
未幾承慶知政事嗣立以成均祭酒徙魏洛二州政無它異坐善二張貶饒州  
刺史繇相州刺史入爲黃門侍郎轉太府卿修文館大學士中宗景龍中拜兵  
部尚書同中書門下三品時崇飾觀寺用度百出又恩倖食邑者衆封戶凡五

十四州皆據天下上腴一封分食數州隨土所宜牟取利入至安樂太平公主  
率取高貲多下家無復如平民有所損免爲封戶者亟於軍興監察御史宋務  
光建言願停徵封一切附租庸輸送不納嗣立建言今廩帑耗竭無一歲之儲  
假遇水旱人須賑給不時軍興士待資裝陛下何以具之伏見營立寺觀累年  
不絕鴻侈繁麗務相矜勝大抵費常千萬以上轉徙木石廢功害農地藏開發  
蟄蟲傷露上聖至慈理必不然準之道法則乖質之生人則損陛下豈不是思  
又食封之家日月猥衆凡用戶部丁六十萬人課二絹則固一百二十萬臣見  
太府歲調絹纔百萬匹少則十之二有所貸免曾不半在比諸封家所入已寡  
國初功臣共定天下食封不二十家今橫恩特賜家至百四十以上天下租賦  
在公不足而私有餘又封家徵求各遣奴阜凌突侵漁百姓怨嘆或貿易斷盜  
誅責紛紜曾無少息下民窶乏何以堪命臣願以丁課一送太府封家詣左藏  
仰給禁止自徵以息重困臣聞設官建吏本於治人而務安之也明官得其人  
則天下治古者取士先鄉曲之譽然後辟於州州已試然後辟五府五府著聞

乃升諸朝得不謂所擇悉而所歷深乎今之取人未試而遽遷務進徼幸比肩  
係踵故文者治官則回邪賊汙武者治軍則庸懦怯弱補授亡限員外置官吏  
困供承官竭資奉國家大事豈甚於此古者設爵待士才者有之不才者進則  
有才之路塞賢人據正遠僥倖之門僥倖開則賢者隱矣賢者隱則人不安人  
不安國將危矣刺史縣令治人之首比年不加簡擇京官坐負及聲稱下者乃  
典州吏部年高不善刀筆者乃擬縣朝輕用人何以治國願下有司精加汰擇  
凡諸曹侍郎兩省工臺及五品以上清望官當先選用刺史縣令所冀守宰稱  
職以興太平帝不聽嗣立與韋后屬疏帝特詔附屬籍顧待甚渥營別第驪山  
鸚鵡谷帝臨幸命從官賦詩制序冠篇賜況優備因封嗣立逍遙公名所居曰  
清虛原幽棲谷嗣立獻木栝藤盤數十物唐隆初拜中書令韋后敗幾死于亂  
寧王爲救免出爲許州刺史以定策立睿宗賜封百戶徙汝州入爲國子祭酒  
太子賓客坐宗楚客等削遺制事不執正貶岳州別駕再徙爲陳州刺史開元  
中河南道巡察使表其廉欲復用會卒年六十六贈兵部尚書諡曰孝初嗣立

代承慶爲鳳閣舍人黃門侍郎承慶亦代爲天官侍郎及知政事父子並爲宰相世罕其比有二子恆濟知名

恆開元初爲碭山令政寬惠吏民愛之天子東巡州縣供張皆鞭扑趣辦恆不立威而事給姑子御史中丞宇文融薦恆有經濟才讓以其位擢殿中侍御史累轉給事中爲隴右河西黜陟使時河西節度使蓋嘉運恃左右援橫恣不法妄列功狀恆劾奏之人代其恐出爲陳留太守卒

濟開元初調鄆城令或言吏部選縣令非其人旣衆謝有詔問所以安人者對凡二百人惟濟居第一不能對者悉免官於是擢濟醴泉令侍郎盧從愿李朝儻並貶爲刺史濟四遷戶部侍郎爲太原尹著先德詩四章世服其典懿天寶中授尚書左丞凡三世居之濟文雅頗能修飾政事所至有治稱終馮翊太守子奧夏令亦以能政聞

嗣立孫弘景擢進士第數佐節度府以左補闕召爲翰林學士蘇光榮爲涇原節度使弘景當草詔書辭不如旨罷學士累遷度支郎中張仲方黜李吉甫謚

得罪憲宗意弘景撻助出爲綿州刺史李夷簡鎮淮南奏以自副召入再遷給事中駙馬都尉劉士涇賂權近擢太僕卿弘景上還詔書穆宗使喻其先人昌有功朕所以念功睦親者弘景固執帝怒使宣慰安南由是有名時蕭俛輔政弘景議論常佐佑之遷再遷吏部侍郎銓綜平序貴幸憚其嚴不敢恩以私歷陝號觀察使召拜尙書左丞駁正吏銓所除六十餘官不當進資於是鄭綱丁公著楊嗣復皆奪俸郎吏肅然望風脩整吏部員外郎楊虞卿以累下吏詔弘景與御史詳讞虞卿私造門弘景厲言曰有詔按公尙私謁邪虞卿多朋助自謂必見納及是惶恐去遷禮部尙書東都留守卒年六十六贈尙書左僕射弘景以直道進議論持正有守當時風教所倚賴爲長慶名卿

陸元方字希仲蘇州吳人陳給事黃門侍郎琛之曾孫伯父東之善書名家官太子司議郎元方初明經後舉八科皆中累轉監察御史武后時使嶺外方涉海風濤驚壯舟人懼元方曰吾受命不私神豈害我趣使濟而風訖息使還除殿中侍御史擢鳳閣舍人秋官侍郎爲來俊臣所陷后置不罪遷鸞臺侍郎同

鳳閣鸞臺平章事坐附會李昭德貶綏州刺史擢天官侍郎兼司衛卿或言其薦引皆親黨后怒免官令白衣領職元方薦人如初后召讓之對曰舉臣所知不暇問讎黨又薦其友崔玄暉有宰相才后知無他復拜鸞臺侍郎同鳳閣鸞臺平章事后嘗問外事對曰臣備位宰相大事當白奏民間碎務不敢以聞忤旨下除太子右庶子進文呂左丞卒元方素清慎再執政每進退羣臣后必先訪問外祕莫知臨終取奏囊焚之曰吾陰德在人後當有興者又曰吾當壽但領選久耗傷吾神有一桺生平所緘鑰者歿後家人發之乃前後詔敕贈越州都督諸子皆美才而象先景倩景融尤知名

象先器識沈邃舉制科高第爲揚州參軍事時吉頊與元方同爲吏部侍郎頊擢象先爲洛陽尉元方不肯當頊曰爲官擇人豈以吏部子廢至公邪卒以授俄遷監察御史累授中書侍郎景雲中進同中書門下平章事監脩國史初太平公主謀引崔湜爲宰相湜曰象先人望宜幹樞近君不者湜敢辭主不得已爲言之遂並知政事然其性恬靜寡欲議論高簡爲時推向湜嘗曰陸公加於



人一等公主既擅權宰相爭附之象先未嘗往謁及謀逆召宰相議曰寧王長不當廢嫡立庶象先曰帝得立何也主曰帝有一時功今失德安可不廢對曰立以功者廢必以罪今不聞天子過失安得廢主怒更與竇懷貞等謀卒誅死時象先與蕭至忠岑羲等坐爲主所進將同誅玄宗遽召免之曰歲寒然後知松柏之後凋也以保護功封兗國公賜封戶二百初難作睿宗御承天樓羣臣稍集帝麾曰助朕者留不者去於是投名自驗者事平玄宗得所投名詔象先收按象先悉焚之帝大怒欲并加罪頓首謝曰赴君之難忠也陛下方以德化天下奈何殺行義之人故臣違命安反側者其敢逃死帝寤善之時窮治忠義等黨與象先密爲申救保全甚衆當時無知者罷爲益州大都督府長史劍南按察使爲政尙仁恕司馬韋抱真諫曰公當峻扑罰以示威不然民慢且無畏答曰政在治之而已必刑法以樹威乎卒不從而蜀化累徙蒲州刺史兼河東按察使小吏有罪誠遣之大吏白爭以爲可杖象先曰人情大抵不相遠謂彼不曉吾言邪必責者當以汝爲始大吏慚而退嘗曰天下本無事庸人擾之

爲煩耳第澄其源何憂不簡邪故所至民吏懷之入爲太子詹事歷戶部尙書知吏部選事母喪免起爲揚州大都督府長史遷太子少保卒年七十二贈尙書左丞相諡曰文貞始象先名景初睿宗曰子能紹先構是爲象賢者乃賜名焉

弟景倩爲扶溝丞河南按察使畢構覆州縣殿最欲必得實有吏言狀曰某彊清某詐清惟景倩曰真清終監察御史

景融長七尺美姿質寬中而厚外博學工筆札以蔭補千牛轉新鄭令政有風績累遷工部尙書東京留守卒贈廣陵郡都督景融於象先後母弟也象先被笞景融諫不入則自楚母爲損威人多其友四世孫希聲

希聲博學善屬文通易春秋老子論著甚多商州刺史鄭愚表爲屬後去隱義興久之召爲右拾遺時儉腐秉權歲數歉梁宋尤甚希聲見州縣剋敝上言當謹視盜賊明年王仙芝反株蔓數十州遂不制擢累歙州刺史昭宗聞其名召爲給事中拜戶部侍郎同中書門下平章事在位無所輕重以太子少師罷李

茂貞等兵犯京師輿疾避難卒贈尚書左僕射諡曰文

元方從父餘慶陳右衛將軍珣孫方雅有祖風已冠名未顯兄玄表喑曰爾名宦不立奈何餘慶感激閉戶誦書三年以博學稱舉制策甲科補蕭尉累遷陽城尉武后封嵩山以辦具勞擢監察御史聖曆初靈勝二州党項誘北胡寇邊詔餘慶招慰喻以恩信蕃酋率衆內附遷殿中侍御史鳳閣舍人嘗命草詔殿上恐懼不能得一詞降左司郎中久之封廣平郡公太子右庶子餘慶於寒品晚進必悉力薦藉人有過輒面折退無一言開元初爲河南河北宣撫使薦富春孫逖京兆韋述吳興蔣洌河南達奚珣後皆爲知名士遷大理卿終太子詹府事諡曰莊雅善趙貞固盧藏用陳子昂杜審言宋之問畢構郭襲微司馬承禎釋懷一時號方外十友餘慶才不逮子昂等而風流敏辯過之初武后時酷吏用事宗朝倖臣貴主斜封大行陷利嗇禍之人與相乾沒雖亟貴驟用而戮不反踵餘慶以道自將雖仕不赫赫訖無悔尤

子璵字仲采舉明經補長安尉以清幹稱開元初中朝臣子弟不任京畿改新

鄉令人爲立祠用按察使宇文融薦遷灑池令累遷兵部郎中東曠騎使還除洛陽令時車駕在洛摧勒姦豪人不敢犯爲中書令蕭嵩所器嵩罷佗宰相俾陰廉嵩短瑛曰與人交過且不可言況無有邪以是忤貴近出爲太原少尹累徙西河太守封平恩縣男屬邑多虎前守設檻穿瑛至徹之而虎不爲暴

王及善洛州邯鄲人父君愕有沈謀隋亂并州人王君廓掠邯鄲君愕往說曰隋氏失御豪俊共救其亂宜撫納遺吐而保全之觀時變待真主足下無尺寸之地兼旬之糧劫衆而興但恣殘剽所過失望竊爲足下羞之君廓謝曰計安出答曰井陘之險可先取君廓從其言遂屯井陘山高祖入關與君廓偕來拜君愕大將軍封新興縣公累遷左武衛將軍從太宗征遼領左屯營兵與高麗戰駐驛山死于陣贈左衛大將軍幽州都督邢國公陪葬昭陵及善以父死事授朝散大夫襲邢國公爵皇太子弘立擢及善左奉裕率太子宴于宮命宮臣擲倒及善辭曰殿下自有優人臣苟奉令非羽翼之美太子謝之高宗聞賜絹百匹除右千牛衛將軍帝曰以爾忠謹故擢三品要職羣臣非搜辟不得至朕

所爾佩大橫刀在朕側亦知此官貴乎病免召爲衛尉卿垂拱中歷司屬卿山東飢詔爲巡撫賑給使拜春官尙書出爲秦州都督益州長史加光祿大夫以老病致仕神功元年契丹擾山東擢魏州刺史武后勞曰逆虜盜邊公雖病可與妻子行日三十里爲朕臥治爲屏蔽也因延問朝政得失及善陳治亂所宜后悅曰禦寇末也輔政本也公不可行留拜內史來俊臣繫獄當死后欲釋不誅及善曰俊臣凶狡不道引亡命汙戮善良天下疾之不勦絕元惡且搖亂胎禍憂未旣也后納之廬陵王之還密贊其謀旣爲皇太子又請出外朝以安羣臣及善不甚文而清正自將臨事不可奪有大臣節時二張怙寵每侍宴無人臣禮及善數裁抑之后不悅曰卿年高不宜侍游燕但檢校閣中及善卽移病餘月后不復問歎曰中書令可一日不見天子乎遂乞骸骨猶不許改文昌左相同鳳閣鸞臺三品卒年八十二贈益州大都督諡曰貞陪葬乾陵

李日知鄭州滎陽人及進士第天授中歷司刑丞時法令嚴吏爭爲酷日知獨平寬無文致嘗免一囚死少卿胡元禮執不可曰吾不去曹囚無生理日知曰

僕不去曹囚無死法皆以狀讞而武后用日知議神龍初爲給事中母老病取急調侍數日須髮輒白母未及封而卒方葬吏乃齎贈制日知殞絕于道左右爲泣莫能視巡察使路敬潛欲表其孝使求狀辭不報服除累遷黃門侍郎景龍初同中書門下平章事轉御史大夫仍知政事初安樂公主館第成中宗臨幸燕從官賦詩日知卒章獨以規誠睿宗佗日謂日嚮日雖朕亦不敢諫非公挺直何能爾卽拜侍中先天元年罷爲刑部尙書屢乞骸骨許之日知將有請不謀于家歸乃治行妻驚曰產利空空何辭之遽日知曰仕至此已過吾分人亦何厭之有若厭于心無日而足也旣罷不治田園唯飾臺池引賓客與娛樂開元三年卒日知貴諸子方總角皆通婚名族時人譏之後少子伊衡以妾爲妻鸞田宅至兄弟訟閱家法遂替云

杜景佺冀州武邑人性嚴正舉明經中第累遷殿中侍御史出爲益州錄事參軍時隆州司馬房嗣業徙州司馬詔未下欲卽視事先笞責吏以示威景佺謂日公雖受命爲司馬州未受命何急數日祿邪嗣業怒不聽景佺日公持咫尺

制真僞莫辨卽欲攪亂一府敬業揚州之禍非此類邪叱左右罷去旣乃除荊州司馬吏歌之曰錄事意與天通州司馬折威風由是寢知名入爲司刑丞與徐有功來俊臣侯思止專治詔獄時稱遇徐杜者生來侯者死改秋官員外郎與侍郎陸元方按員外郎侯味虛罪已推輒釋之武后怒其不待報元方大懼景佺獨曰陛下明詔六品七品官文辨已定待命于外今雖欲罪臣奈明詔何宰相曰詔爲司刑設何預秋官邪景佺曰詔令一布無臺寺之異后以爲守法擢鳳閣舍人遷洛州司馬延載元年檢校鳳閣侍郎同鳳閣鸞臺平章事后嘗季秋出黎華示宰相以爲祥衆賀曰陛下德被草木故秋再華周家仁及行葦之比景佺獨曰陰陽不相奪倫瀆卽爲災故曰冬無愆陽夏無伏陰春無淒風秋無苦雨今花木黃落而木復華瀆陰陽也竊恐陛下布德施令有所虧紊臣位宰相助天治物治而不和臣之咎也頓首謝罪后曰真宰相會李昭德下獄景佺苦申救后以爲面欺左遷秦州刺史入拜司刑卿聖曆元年復以鳳閣侍郎同鳳閣鸞臺平章事契丹入寇陷河北數州虜已去武懿宗欲盡論其罪景

珍做宋版印  
怪以爲脅從可原后如其議罷爲秋官尙書坐漏省內語降司刑少卿出爲并州長史道病卒贈相州刺史初名元方垂拱中改今名

李懷遠字廣德邢州柏仁人少孤嗜學宗人欲藉以高蔭懷遠辭退而曰因人之勢高士恥之假蔭而官吾志邪擢四科第累轉司禮少卿出爲本州刺史改冀州遷揚益二都督府長史徙同州刺史治尙清簡累遷鸞臺侍郎進同鳳閣鸞臺平章事封平鄉縣男以左散騎常侍同中書門下三品爵趙郡公賜實封戶三百以老聽致仕中宗還京師召知東都留守復加同中書門下三品懷遠久貴益素約不治居室嘗乘款段馬僕射豆盧欽望謂曰公貴顯顧當然邪答曰吾幸其馴不願宅駿神龍二年卒帝賜錦衾斂自爲文祭之贈侍中謚曰成子景伯景龍中爲諫議大夫中宗宴侍臣及朝集使酒酣各命爲回波詞或以詔言媚上或要巧謬寵至景伯獨爲箴規語以諷帝帝不悅中書令蕭至忠曰真諫官也景雲中進太子右庶子時有建言置都督府非是詔羣臣普議景伯與太子舍人盧備議今天下諸州分隸都督專生殺刑賞使授非其人則權重



釁生非彊幹弱枝經邦軌物之誼願罷都督留御史以時按察秩卑任重以制  
姦宄便絲是停都督終右散騎常侍

子彭年有才剖析明悟歷遷中書舍人吏部侍郎與李林甫善常慕山東著姓  
爲婚姻引就清列典選七年卒以贓敗長流臨賀郡天寶十二載擢爲濟陰太  
守徙馮翊天子幸蜀陷於賊脅以僞官憂憤死贈禮部尙書

唐書卷一百十六



唐書卷一百十六考證

韋思謙子承慶贈禮部尚書○舊書贈秘書監

陸元方子象先入爲太子詹事歷戶部尚書○舊書歷工部尚書

起爲揚州大都督府長史○舊書起復同州刺史

杜景佺傳○舊書及通鑑綱目俱作景儉

聖曆元年復以鳳閣侍郎同鳳閣鸞臺平章事○沈炳震曰按舊書聖曆二年則天紀神功元年皆不合

唐書卷一百十六考證



唐書卷一百十七

宋  端  明  殿  學  士  宋  祁  撰

列傳第四十二

裴劉魏李吉

裴炎字子隆絳州聞喜人寬厚寡言笑有奇節補弘文生休澣宅生或出游炎讀書不廢有司欲薦狀以業未就辭不舉服勤十年尤通左氏春秋舉明經及第補濮州司倉參軍歷御史起居舍人遷遷黃門侍郎調露二年同中書門下三品進拜侍中高宗幸東都留皇太子京師以炎調護帝不豫太子監國詔炎與劉齊賢郭正一於東宮平章政事及大漸受遺輔太子是爲中宗改中書令舊宰相議事門下省號政事堂長孫無忌以司空房玄齡以僕射魏徵以太子太師皆知門下省事至炎以中書令執政事筆故徙政事堂於中書省中宗欲以后父韋玄貞爲侍中及授乳媪子五品官炎固執不從帝怒曰我意讓國與玄貞豈不可何惜侍中邪炎懼因與武后謀廢帝后命炎洎劉禕之率羽林將

軍程務挺張虔勗勒兵入宮宣太后令扶帝下殿帝曰我何罪后曰以天下與  
玄貞安得無罪乃廢帝爲廬陵王更立豫王爲皇帝以定策功封永清縣男后  
已持政稍自肆於是武承嗣請立七廟追王其先炎諫曰太后天下母以盛德  
臨朝宜存至公不容追王祖考示自私且獨不見呂氏事乎后曰呂氏之王權  
屬生人今追崇先世在亡迹異安得同哉炎曰蔓草難圖漸不可長后不悅而  
罷承嗣又諷太后誅韓王元嘉魯王靈夔以絕宗室望劉禕之韋仁約畏默不  
敢言炎獨固爭后愈銜怒未幾賜爵河東縣侯豫王雖爲帝未嘗省天下事炎  
謀乘太后出游龍門以兵執之還政天子會久雨太后不出而止徐敬業兵興  
后議討之炎曰天子年長矣不豫政故豎子有辭今若復子明辟賊不討而解  
御史崔訥曰炎受顧託身總大權聞亂不討乃請太后歸政此必有異圖后乃  
捕炎送詔獄遣御史大夫騫味道御史魚承曄參鞠之鳳閣侍郎胡元範曰炎  
社稷臣有功於國悉心事上天下所知臣明其不反納言劉齊賢左衛率蔣儼  
繼辨之后曰炎反有端顧卿未知耳元範齊賢曰若炎反臣輩亦反矣后曰朕

知炎反，卿輩不反，遂斬于都亭驛。炎被劾，或勉其遜辭，炎曰：「宰相下獄，理不可全卒，不折節，籍其家，無儋石之贏。初，炎見裴行儉破突厥有功，沮薄之，乃斬降虜阿史那伏念等五十餘人，議者恨其媚克。且使國家失信，四夷以爲陰禍。」有知云：睿宗立，贈太尉益州大都督諡曰忠元。範申州義陽人，介廉有才，以炎故流死，舊州炎從子，伯先。

伯先未冠，推蔭爲太僕丞。炎死，坐流嶺南，上變求面陳得失，后召見，盛氣待之，曰：「炎謀反，法當誅，尙何道？」伯先對曰：「陛下唐家婦身，荷先帝顧命，今雖臨朝，當責任大臣，須東宮年，就德成，復子明辟，奈何？」遽王諸武，斥宗室，炎爲唐忠臣，而戮逮子孫，海內憤怨。臣愚謂陛下宜還太子東宮，罷諸武權，不然，豪桀乘時而動，不可不懼。后怒，命曳出杖之。朝堂長流瀼州，歲餘，逃歸，爲吏蹟，捕流北廷，無復名檢，專居賄，五年，至數千萬，娶降胡女爲妻，妻有黃金駿馬牛羊，以財自雄，養客數百人，自北廷屬京師，多其客，詔候朝廷事，聞知十常七八，時補闕李秦授爲武后謀，曰：「讖言代武者劉劉無彊，姓殆流人乎？」今大臣流放者數萬族，使

之叶亂社稷憂也后謂然夜拜秦授考功員外郎分走使者賜墨詔慰安流人實命殺之佑先前知以橐駝載金幣賓客奔突厥行未遠都護遣兵追之與格鬪爲所執械繫獄以狀聞會武后度流人已誅畏天下姍請更遣使者安撫十道以好言自解釋曰前使使慰安有罪而不曉朕意擅誅殺殘忍不道朕甚自咎今流人存者一切縱還絲是佑先得不死中宗復位求炎後授佑先太子詹事丞遷秦桂廣三州都督坐累且誅賴宰相張說右之免官久乃擢范陽節度使太原京兆尹以京師官冗奏罷畿縣員外及試官進工部尚書年八十六以東京留守累封翼城縣公卒官下

劉禕之字希美常州晉陵人父子翼字小心在隋爲著作郎峭直有行嘗面折僚友短退無餘訾李伯藥曰子翼置人人都不憾貞觀初召之辭以母老詔許終養江南道巡察使李襲譽嘉其孝表所居爲孝慈里母已喪召拜吳王府功曹參軍終著作郎弘文館直學士禕之少與孟利貞高智周郭正一俱以文辭稱號劉孟高郭並直昭文館俄遷右史弘文館直學士上元中與元萬頃等偕



召入禁中論次新書凡千餘篇高宗又密與參決時政以分宰相權時謂北門  
學士兄懿之亦給事中同兩省先是姊爲內官武后遣至外家問疾禕之因賀  
蘭敏之私省之坐流嶺州后爲丐還除中書舍人儀鳳中吐蕃寇邊帝訪侍臣  
所以置之討之之宜人人異謀禕之獨勸帝夷狄猶禽獸雖被馮陵不足校願  
戢威紓百姓之急帝內其言俄拜相王府司馬檢校中書侍郎帝謂曰卿家忠  
孝朕子賴卿以師矩冀蓬在麻不扶而挺也后既立王爲帝以其參奉大議愈  
親之擢中書侍郎同中書門下三品賜爵臨淮縣男方是時詔令叢繁禕之思  
致華敏裁可占授少選可待也司門員外郎房先敏坐累貶衛州司馬訴于相  
府內使鸞味道謂曰太后旨禕之曰乃上從有司所奏云后聞以味道歸非於  
上貶青州刺史加禕之太中大夫賜物百段后因曰君爲元首臣爲股肱以手  
足疾移於腹背尙爲一體乎禕之引咎於己忠臣也納言王德真推順曰戴至  
德無異才惟能歸善於君爲時所服后曰善後私語鳳閣舍人賈大隱曰后能  
廢昏立明盍反政以安天下大隱表其言后怒曰禕之乃負我垂拱中或告禕

之受歸誠州都督孫萬榮金與許敬宗妾私通太后遣肅州刺史王本立鞠治以敕示禕之禕之曰不經鳳閣鸞臺何謂之敕后以爲拒制使賜死于家年五十七初禕之得罪睿宗以舊屬申理之姻友冀得釋禕之曰吾死矣太后威福由己而帝營救速吾禍也在獄上疏自陳臨誅洗沐神色自若命其子執筆占爲表子號塞不通書禕之乃自捉筆得數紙詞懇哀到人皆傷之麟臺郎郭翰太子文學周思鈞悵數其文后惡之貶翰巫州司法參軍思鈞播州司倉參軍睿宗嗣位贈禕之中書令翰嘗爲御史巡察隴右多所按劾次寧州時狄仁傑爲刺史民爭言有異政翰就館以筆紙置于案謂僚屬曰入其境其政可知願薦使君美於朝毋久留卽命駕去性寬簡讀老子至和其光同其塵慨然曰大雅君子以保其身乃辭憲官改麟臺郎云

魏玄同字和初定州鼓城人祖士廓仕齊爲輕車將軍玄同進士擢第調長安令累官司列大夫坐與上官儀善流嶺外旣廢不自護藉乃馳逐爲生事上元初會赦還工部尙書劉審禮表其材拜岐州長史再遷吏部侍郎永淳元年詔

與中書門下同承受進止平章事封鉅鹿男上疏言選舉法弊曰方今人不加富盜賊未衰禮誼寢薄者下吏不稱職庶官非其才取人之道有所未盡也武德貞觀庶事草創人物固乏天祚大聖享國永年異人間出諸色人流歲以千計官有常員人無定限選集猥至十不收一取舍淆紊夏商以前制度多闕至周煥然可觀諸侯之臣不皆命天子王朝庶官不專一職穆王以伯冏爲太僕正命曰慎簡乃僚此乃自擇下吏之言也太僕正特中大夫耳尙以僚屬委之則三公九卿亦當然也故太宰內史並掌爵祿廢置司徒司馬別掌興賢詔事是分任羣司而統以數職王命其大者而自擇其小者漢制諸侯自置吏四百石以下其傅相大臣則漢爲置之州郡掾吏督郵從事悉任之牧守自魏晉以後始歸吏部而迄于今以刀筆量才簿書察行法與世敝其來久矣尺丈之量鍾庾之器非所及則不能度非所受則無以容況天下之大士類之衆可委數人手乎又尸厥任者間非其選至爲人擇官爲身擇利下筆繫親疏措情觀勢要悠悠風塵此焉奔競使百行折之一面九能斷之數言不亦難乎且臣聞莅

官者不可以無學傳曰學以從政不聞以政入學今貴戚子弟一皆早仕弘文  
 崇賢羊牛輦脚之類程較既淺技能亦薄而門閥有素資望自高夫所謂胄子  
 者必裁諸學少則受業長而入官然後移家事國謂之德進夫少仕則不務學  
 輕試則無才又勳官三衛流外之屬不待州縣之舉直取書判非先德後言之  
 誼臣聞國之用人如人用財貧者止糟糠富者餘梁肉故當衰敝乏賢則磨策  
 朽鈍以馭之太平多士則蓬束髦俊而使之今選者猥多宜以簡練為急竊見  
 制書三品至九品並得薦士此誠仄席旁求意也但褻貶不明故上不憂黜責  
 下不盡搜揚莫慎所舉而苟以應命且惟賢知賢聖人篤論臯陶既舉不仁者  
 遠身苟濫進庸及知人不擇舉者之賢而擇所舉之濫不可得已以陛下聖明  
 國家德業而不建經久之策但顧望魏晉遺風臣竊惑之願少遵周漢之規以  
 分吏部選即所用詳所失鮮矣不納進拜文昌左丞鸞臺侍郎同鳳閣鸞臺三  
 品遷地官尚書檢校納言玄同與裴炎締交能保終始故號耐久朋先是狄仁  
 傑督太原運失米萬斛將坐誅玄同救免而河陽令周興未知也數於朝堂聽

命玄同曰明府可去矣毋久留與以爲沮己銜之至是誣玄同言太后老矣當復皇嗣后不察賜死于家年七十三初監察御史房濟監刑謂曰丈人盍上變冀召見得自陳玄同曰人殺與鬼殺等耳不能爲告事人玄同子恬字安禮事親以孝聞第進士爲御史主簿開元中至潁王傳

李昭德雍州長安人父乾祐貞觀初爲殿中侍御史郇令裴仁軌私役門卒太宗欲斬之乾祐曰法令與天下共之非陛下獨有也仁軌以輕罪致極刑非畫一之制刑罰不中則民無所措手足帝意解繇是免死遷侍御史母卒廬墓側負土成墳帝遣使就弔表異其閭歷治書侍御史有能名永徽初擢御史大夫爲褚遂良所惡出爲邢魏二州刺史乾祐雖彊直而昵小人嘗爲書與所善吏刺取朝廷事迷隱其辭爲吏所賣遂良白發於朝坐流驩州召拜滄州刺史入爲司刑太常伯舉雍州司功參軍崔擢爲尙書郎不得報私語擢所以然後擢犯罪告乾祐漏禁中語以自贖詔免官卒昭德彊幹有父風擢明經累官御史中丞永昌初坐事貶振州陵水尉還爲夏官侍郎如意元年拜鳳閣侍郎同鳳

閣鸞臺平章事武后營神都昭德規創文昌臺及定鼎上東諸門標置華壯洛有二橋司農卿韋機徙其一直長夏門民利之其一橋廢省巨萬計然洛水歲涇齧之繕者告勞昭德始累石代柱銳其前廝殺暴濤水不能怒自是無患俄檢校內史薛懷義討突厥以昭德爲行軍長史不見虜還武承嗣任文昌左相昭德諫曰承嗣已王不宜典機衡以惑衆庶且父子猶相篡奪況姑姪乎后矍然曰我未之思也乃罷承嗣爲太子少保洛陽人王慶之率險佞數百人請以承嗣爲皇太子后不許固請后遣昭德詰其故昭德笞殺慶之餘黨散走因奏曰自古有姪爲天子而爲姑立廟乎以親親言之天皇陛下夫也皇嗣陛下子也當傳之子孫爲萬世計陛下承天皇顧託而有天下又立承嗣臣見天皇不來食矣后乃止承嗣恨譖短之后曰吾任昭德而獲安枕是代我勞非而所知也有人獲洛水白石而赤文者獻闕下曰此石赤心故以獻昭德叱曰洛水餘石豈盡能反邪時來俊臣侯思止舞文法數誅陷大臣人皆懾懼昭德每奏其誣罔不道狀卒撈殺思止其黨稍摧沮然昭德頗怙權爲衆指目魯王府功曹

參軍丘愔上疏曰臣聞魏冉誅庶族以安秦忠也弱諸侯以彊國功也然出入自專擊斷無忌威震人主不聞有王張祿一言而卒用憂死向使昭王不卽覺悟則秦之霸業或不傳子孫陛下天授以前萬機獨斷公卿百執具職而已自長壽以來厭怠細政擢委昭德秉總權綱而才小任重負氣彊愎聾盲下民芻狗同列刻薄慶賞多所矯虔聲威翕習天下杜口臣伏見南臺敕目羣臣奏請陛下制已曰可而昭德建言不可制又從之且人臣參奉機密獻可替否事或便利不豫咨謀而畫可已行方輿駁異是陽露擅命以示於人歸美引咎諠不類此一切奏讞皆承風指陰相傳會臣觀其膽乃大於身鼻息所衝上拂雲漢夫小家治生千百之貲將以託人尙憂失授況天下之重可輕委寄乎履霜堅冰須防其漸大權一去收之良難願陛下察臣之言又果毅鄧注著石論數千言述其專恣鳳閣舍人逢弘敏以聞后由是惡之謂姚璿曰誠如所言昭德固負國矣乃貶欽州南賓尉俄召授監察御史萬歲通天二年來俊臣誣以逆謀旣而俊臣亦下獄同日誅時甚雨衆庶莫不寃昭德而快俊臣神龍二年贈左

御史大夫建中三年加贈司空

吉頊洛州河南人長七尺性陰克敢言事舉進士及第調明堂尉父哲爲易州刺史坐賊當死頊往見武承嗣自陳有二女弟請侍王巾盥者承嗣喜以犢車迎之三日未言問其故答曰父犯法且死故憂之承嗣爲表貸哲死遷頊龍馬監劉思禮謀反頊上變事后命武懿宗雜訊因諷囚引近臣高閔生平所悟者凡三十六姓捕繫詔獄榜楚百慘以成其獄同日論死天下寃之擢右肅政臺中丞來俊臣下獄司刑當以死狀三日不下頊從武后游苑中因間言臣爲陛下耳目知俊臣狀入不出人以爲疑后曰朕以俊臣有功徐思之頊曰于安遠告虺貞反今爲成州司馬俊臣誣殺忠良罪惡如山國蠹賊也尙何惜於是后斬俊臣而召安遠爲尙食奉御突厥陷趙定授檢校相州刺史且募兵制虜南向頊辭不知武后曰賊方走藉卿坐鎮耳初太原温彬茂死高宗時封一笥書諉妻曰吾死後須年及垂拱獻之垂拱初妻上其書言后革命事及突厥至趙去故后知虜且還頊至募士無應者俄詔以皇太子爲元帥應募日數千頊還



言狀后曰人心若是邪卿可爲羣臣道之頊誦語于朝諸武惡之始頊善張易之殿中少監田歸道鳳閣舍人薛稷正諫大夫員半千夏官侍郎李迥秀皆爲控鶴內供奉頊又彊敏故后倚爲腹心聖曆二年進天官侍郎同鳳閣鸞臺平章事爲刺史時武懿宗討契丹退保相州後爭功殿中懿宗陋短俯僂頊嚴語侵之無所容假后怒曰我在乃藉諸武它日安可保銜之張易之兄弟以寵威思自全問頊計安出頊曰公家以倖進非有大功於天下勢必危吾有不朽策願効之非止保身且世世不絕胙易之流涕請頊曰天下思唐久矣廬陵斥外相王幽閉上春秋高武諸王非海內屬意公盍從容請相王廬陵以副人望易弔爲賀之資也易之昌宗乘間如頊教后意乃定旣而知頊與謀召見問狀頊對廬陵相王皆陛下子先帝顧託於陛下當速有所付乃還中宗明年頊坐第冒僞官貶琰川尉及辭召見泣曰臣去國無復再謁願有所言然疾棘請須臾間后命坐頊曰水土皆一盜有爭乎曰無曰以爲塗有爭乎曰無曰以塗爲佛與道有爭乎曰有之頊首謝曰雖臣亦以爲有夫皇子外戚有分則兩安今太

子再立而外家諸王並封陞下何以和之貴賤親疏之不明是驅使必爭臣知  
兩不安矣后曰朕知之業已然且奈何項尋徙始豐尉客江都卒中宗之立項  
實倡之會得罪無知者睿宗初有發明其忠乃下詔贈御史大夫  
贊曰異乎炎之暗于幾也知中宗之不君不知武后之盜廟假虎翼而責其搏  
人死固宜哉昭德頊進不以道君子恥之雖然一情區區抑武興唐其助有端  
則賢炎遠矣禕之玄同漏言及誅不失所以事君者云

唐書卷一百十七

唐書卷一百十七考證

裴炎傳元範申州義陽人以炎故流死嵩州○舊書坐救炎流死瓊州

李昭德傳坐流驩州召拜滄州刺史○舊書坐流愛州乾封中起爲桂州都督  
吉頊傳頊尋徙始豐尉卒○舊書改安固尉尋卒

唐書卷一百十七考證



唐書卷一百十八

宋 端 明 殿 學 士 宋 祁 撰

列傳第四十三

張韋韓宋辛二李裴

張廷珪河南濟源人慷慨有志尚第進士補白水尉舉制科異等累遷監察御史按劾平直武后稅天下浮屠錢營佛祠於白司馬坂作大象廷珪諫以爲傾四海之財殫萬民之力窮山之木爲塔極冶之金爲象然猶有爲之法不足高也填塞澗穴覆壓蟲蟻且巨億計工員窮窶驅役爲勞饑渴所致疾疹方作又僧尼乞匄自贍而州縣督輸星火迫切鬻以充非浮屠所謂隨喜者今天下虛竭蒼生彫弊謂宜先邊境實府庫養人力后善之召見長生殿賞慰良厚因是罷役會詔市河南河北牛羊荆益奴婢置監登萊以廣軍資廷珪上書曰今河南牛疫十不一在詔雖相市甚於抑奪併市則價難準簡擇則吏求賄是牛再疫農重傷也高原耕地奪爲牧所兩州無復丁田牛羊踐暴舉境何賴荆益

奴婢多國家戶口姦豪掠買一入於官永無免期南北異宜至必生疾此有損無益也抑聞之君所恃在民民所恃在食食所資在耕耕所資在牛牛廢則耕廢耕廢則食去食去則民亡民亡則何恃爲君羊非軍國切要假令蕃滋不可射利后乃止張易之誅議窮治黨與廷珪建言自古革命務歸人心則以刑勝治今唐歷不移天地復主宜以仁化蕩宥且易之盛時趨附奔走半天下盡誅則已暴罰一二則法不平宜一切洗貸中宗納之神龍初詔白司馬坂復營佛祠廷珪方奉詔抵河北道出其所見營築勞亟懷不能已上書切爭且言自中興之初下詔書弛不急斥少監楊務廉以示中外今土木復興不稱前詔掘壤伐木靈害生氣願罷之以紓窮乏帝不省尋爲中書舍人再遷禮部侍郎玄宗開元初大旱關中飢詔求直言廷珪上疏曰古有多難興國殷憂啓聖蓋事危則志銳情苦則慮深故能轉禍爲福也景龍先天間凶黨構亂陛下神武汎掃氛垢日月所燭無不濡澤明明上帝宜錫介福而頃陰陽愆候九穀失稔闕輔尤劇臣思天意殆以陛下春秋鼎盛不崇朝有大功輕堯舜而不法思秦漢以

自高故昭見咎異欲日慎一日永保太和是皇天於陛下矐顧深矣陛下不得不奉若休旨而寅畏哉誠願約心削志考前王之書敦素樸之道登端士放佞人屏後宮減外廡場無蹴鞠之玩野絕從禽之樂促遠境罷縣戍矜惠惇獨蠲薄徭賦去淫巧捐珠璧不見可欲使心不亂或謂天戒不足畏而上帝馮怒風雨迷錯荒饉日甚則無以濟下矣或謂人窮不足恤而億兆攜離愁苦昏墊則無以奉上矣斯安危所繫禍福之原奈何不察今受命伊始華夷百姓清耳以聽刮目以視冀有聞見何遽孤其望哉再遷黃門侍郎監察御史蔣挺坐法詔決杖朝堂廷珪執奏御史有譴當殺殺之不可辱也士大夫服其知體王琚持節巡天兵諸軍方還復詔行塞下議者皆謂將襲回紇廷珪陳五不可且言中國步多騎少人齎一石糧負甲百斤盛夏長驅晝夜不休勞逸相絕其勢不敵一也出軍掩敵兵不數萬不可以行廢農廣饋飢歲不支二也千里遠襲其誰不知賊有斥候必能預防三也狄人獸居磧漠譬之石田克而無補四也天下無年當養人息兵五也又請復十道按察使巡視州縣帝然納之因詔陸象先等

分使十道時遣使齎繒錦至石國市犬馬廷珪曰犬馬非土性弗畜珍禽異獸不育于國不宜勞遠人致異物願省無益之故救必然之急天下之幸坐漏禁內語出爲沔州刺史頻徙蘇宋魏三州初景龍中宗楚客紀處訥武延秀韋温等封戶多在河南河北諷朝廷詔兩道蠶產所宜雖水旱得以蠶折租廷珪謂兩道倚大河地雄奧股肱走集宜得其歡心安可不恤其患而殫其力若以桑蠶所宜而加別稅則隴右羊馬山南椒漆山之銅錫鉛錯海之蜃蛤魚鹽水旱皆免寧獨河南北外於王度哉願依貞觀永徽故事準令折免詔可在官有威化入爲少府監封范陽縣男以太子詹事致仕卒贈工部尚書諡貞穆廷珪偉姿儀善八分書與李邕友善及邕躋於仕屢表薦之人尙其方介云

韋湊字彥宗京兆萬年人祖叔諧貞觀中爲庫部郎中與弟吏部郎中叔謙兄主爵郎中季武同省時號三列宿湊永淳初解褐婺州參軍事徙資州司兵觀察使房昶才之表于朝遷揚州法曹州人孟神爽罷仁壽令豪縱數犯法交通貴戚吏莫敢繩湊按治杖殺之遠近稱伏入爲相王府屬時姚崇兼府長史嘗



曰韋子識遠文詳吾恨晚得之六遷司農少卿忤宗楚客出爲貝州刺史睿宗立授鴻臚少卿徙太府兼通事舍人時改葬故太子重俊有詔加諡又詔雪李多祚等罪議贈官湊上言王者發號出令必法天道善善著惡惡明也賞罰所不加則考行立諡以褒貶之臣議其君子議其父曰靈曰厲者不敢以私亂公也臣伏見故太子與多祚等擁北軍犯宸居破扉斬關兵指黃屋騎騰紫微和帝御玄武門親諭逆順太子據鞍自若督衆不止逆黨悔非回兵執賊多祚伏誅太子乃遁去明日帝見羣臣涕數行下曰幾不與公等相見其爲危甚矣臣子之禮過位必趨蹙路馬芻有誅昔漢成帝爲太子行不敢絕馳道秦師免胄過周北門王孫滿策其必敗推此則太子稱兵宮中爲悖已甚以斬三思父子而嘉之乎則弄兵討逆以安君父可也因欲自立則是爲逆又奚可褒此時韋氏逆未明義未絕於太子母也子無廢母之理非中宗命廢之則又劫父廢母且君或不君臣安可不臣父或不父子安可不子晉太子申生諡曰恭漢太子據諡曰戾今太子乃諡節閔臣所未諭願與議諡者質於御前使臣言非耶甘

鼎鑊之誅申大義示天下臣言是耶咸蒙冰釋不復異議如曰未然奈何使後世亂臣賊子資以爲辭宜易諡以合經禮多祚等罪云免而不云雪帝瞿然引內閣中勞曰誠如卿言業已爾奈何對曰太子實逆不可以褻請質行以示時大臣亦重改唯罷多祚等贈官景雲初作金仙等觀湊諫以爲方農月興功雖賞出公主然高直售庸則農人捨耕取僱趨末棄本恐天下有受其飢者不聽湊執爭以萬物生育草木昆蚊傷伐甚多非仁聖本意帝詔外詳議中書令崔湜侍中岑羲曰公敢是耶湊曰食厚祿死不敢顧況聖世必無死乎朝廷爲減費萬計出爲陝汝岐三州刺史開元初欲建碑靖陵湊以古園陵不立碑又方旱不可興工諫而止遷將作大匠詔復孝敬皇帝廟號義宗湊諫曰傳云必也正名禮祖有功宗有德其廟百世不毀商有三宗周宗武王漢文帝爲太宗武帝爲世宗歷代稱宗者皆方制海內德澤可尊列於昭穆是謂不毀孝敬皇帝未嘗南面且別立寢廟無稱宗之義遂罷遷右衛大將軍玄宗謂曰故事諸衛大將軍與尙書更爲之近時職輕故用卿以重此官其毋辭尋徙河南尹封彭

城郡公會洛陽主簿王鈞以賊抵死詔曰兩臺御史河南尹縱吏侵漁春秋重責帥其出湊曹州刺史侍御史張洽通州司馬久之遷太原尹兼北都軍器監邊備修舉詔賜時服勞勉之及病遣上醫臨治卒年六十五贈幽州都督諡曰文子見素

見素字會微質性仁厚及進士第授相王府參軍襲父爵擢累諫議大夫天寶五載爲江西山南黔中嶺南道黜陟使繩糾吏治所至震畏遷文部侍郎平判皆誦於口銓敘平允官有勾求輒下意聽納人多德之十三載玄宗苦雨潦閱六旬謂宰相非其人罷左相陳希烈詔楊國忠審擇大臣時吉温得幸帝欲用之温爲安祿山所厚國忠懼其進沮止之謀於中書舍人竇華宋昱皆以見素安雅易制國忠入白帝帝亦以相王府屬有舊恩遂拜武部尙書同中書門下平章事集賢院學士知門下省事明年祿山表請蕃將三十二人代漢將帝許之見素不悅謂國忠曰祿山反狀暴天下今又以蕃代漢難將作矣國忠不應見素曰知禍之芽不能防見禍之形不能制焉用彼相明日當懇論之既入帝

迎諭曰卿等有疑祿山意耶國忠見素趨下流涕且陳祿山反明甚詔復位因以祿山表置帝前乃出帝令中官袁思藝傳詔曰此姑忍朕徐圖之由是奉詔然每進見未嘗不爲帝言之帝不入其語未幾祿山反從帝入蜀陳玄禮之殺國忠也兵傷其首衆傳聲曰毋害韋公父子獲免帝令壽王賜藥傅創次巴西詔兼左相封豳國公肅宗立與房瑄崔渙持節奉傳國璽乃冊宣揚制命帝曰太子仁孝去十三載已有傳位意屬方水旱左右勸我且須豐年今帝受命朕如釋負矣煩卿等遠去善輔導之見素涕泣拜辭又命見素子諤及中書舍人賈至爲冊使判官謁見肅宗於順化郡肅宗聞瑄名且舊虛懷待之以見素嘗附國忠禮遇獨減是歲十月丙申有星犯昴見素言於帝曰昴者胡也天道譴見所應在人祿山將死矣帝曰日月可知乎見素曰福應在德禍應在刑昴金忌火行當火位昴之昏中乃其時也旣死其月亦死其日明年正月甲寅祿山其殪乎帝曰賊何等死答曰五行之說子者視妻所生昴犯以丙申金木之妃也木火之母也丙火爲金子申亦金也二金本同末異還以相剋賊殆爲子與

首亂者更相屠戮乎及祿山死日月皆驗明年三月至鳳翔拜尙書左僕射罷知政事初行在所承喪亂後兵吏三銓簿領煬散選部文符僞濫帝欲廣懷士心至者一切補官不加檢復見素奏宜明條綱以爲持久帝未及從既還都選者猥集補署無所日訴于朝乃追行其言會郭子儀亦爲僕射徒見素太子太師詔至蜀郡奉迎太上皇以功食實封三百戶上元初以疾求致仕許之詔朔望寶應元年卒年七十六贈司徒謚忠貞子諤

贊曰楊國忠本與安祿山爭寵故捕吉温以激其亂陰儲蜀貲待天子之出則已與韋見素流涕爭祿山反狀將信所言以久其權見素能言祿山反不能言所以反是佐國忠敗王室也玄宗不悟仍相之卒爲後帝所薄然猶完其要領幸矣謂見素爲前知果非也

諤歷京兆府司錄參軍國忠之死軍聚不解陳玄禮請殺貴妃以安衆帝意猶豫諤諫曰臣聞以計勝色者昌以色勝計者亡今宗廟震驚陛下棄神器奔草莽惟割恩以安社稷因叩頭流血帝寤賜妃死軍乃大悅擢諤御史中丞爲置

頓使乘輿將行或曰國忠死不可往蜀請之河隴或請幸太原朔方涼州或曰如京師雜然不一帝心向蜀未能言諤曰今兵少不能捍賊還京非萬全計不如至扶風徐圖去就帝問於衆衆然之遂至扶風乃決西幸後終給事中

顛字周仁諤弟益之子蚤孤事姊恭順及長身不衣帛通陰陽象緯博知山川風俗論議典據以門調補千牛備身自鄆尉判入等授萬年尉歷御史補闕與李約李正辭更進諷諫數移大事裴垪韋貫之李絳崔羣蕭俛皆布衣舊繼爲宰相朝廷典章多所咨逮嘗曰吾儕五人智不及一韋公長慶初爲大理少卿累遷給事中敬宗立授御史中丞爲戶部侍郎徙吏部卒贈禮部尚書所著易緼解推演終始有深誼旣喜接士後出莫不造門而李逢吉方結黨與擅國政頗傳會之素議遂衰然節儉自居天下推其尙云

知人字行哲叔謙子弱而好古以國子舉授校書郎高宗時擢州參軍入人爲中臺郎知人自荆府兵曹遷司庫員外郎兼判司戎大夫事未幾卒子維繩

維字文紀進士對策高第擢武功主簿督役乾陵會歲飢均力勸功人不知勞

坐徐敬業親貶五泉主簿徙內江令教民耕桑縣爲刻頌遷戶部郎中善裁剖時員外宋之問善詩故時稱戶部二妙終太子右庶子

繩長文辭撫養宗屬孤幼無異情舉孝廉以母老不肯仕踰二十年乃歷長安尉威行京師擢監察御史更泗涇鄜三州刺史天寶初入爲祕書少監玄宗尙文視其職如尙書丞郎繩刊是圖簡以善職稱終陳王傅

虛心字無逸維子舉孝廉遷大理丞侍御史神龍中按大獄僕射竇懷貞侍中劉幽求有所輕重虛心据正不撓景龍中屬羌叛旣禽捕有詔悉誅虛心惟論會長死原活其餘遷御史中丞歷荆潞揚三大都督府長史荊州有鄉豪負勢干法虛心籍其貲入之官以廬江多盜遂縣舒城盜賊爲衰入爲工部尙書東京留守累封南皮郡子卒贈揚州大都督諡曰正弟虛舟歷洪魏二州刺史有治名入爲刑部侍郎初維爲郎蒔柳于廷及虛心兄弟居郎省對之輒斂容自叔謙後至郎中者數人世號郎官家

韓思復字紹出京兆長安人祖倫貞觀中歷左衛率封長山縣男思復少孤年

十歲母爲語父亡狀感咽幾絕故倫特愛之嘗曰此兒必大吾宗然家富有金玉車馬玩好未嘗省篤學舉秀才高第襲祖封永淳中家益窶歲飢京兆杜瑾者以百綾餉思復思復方併日食而綾完封不發調梁府倉曹參軍會大旱輒開倉賑民州劾責對曰人窮則濫不如因而活之無趣爲盜賊州不能詘轉汴州司戶仁恕不行鞭罰以親喪去官鬻薪自給姚崇爲夏官侍郎識之擢司禮博士五遷禮部郎中建昌王武攸寧母亡請鼓吹思復持不可而止坐爲王同皎所薦貶始州長史遷滁州刺史州有銅官人鑿鑿尤苦思復爲買他鄙費省獲多有黃芝五生州署民爲刻頌其祥徙襄州入拜給事中帝作景龍觀思復諫曰禍難初弭土木遽興非憂物恤人所急不見省嚴善思坐譙王重福事捕送詔獄有司劾善思任汝州刺史與王游至京師不暴王謀但奏東都有兵氣匿反罔上宜伏誅思復曰往韋氏擅內謀危社稷善思詣相府白陛下必卽位今詔追善思書發卽至使有逆節者肯遽奔命哉請集百官議議多同善思得免死流靜州遷中書舍人數指言得失頗見納用開元初爲諫議大夫山東大



蝗宰相姚崇遣使分道捕瘞思復上言夾河州縣飛蝗所至苗輒盡今游食至洛使者往來不敢顯言且天災流行庸可盡瘞望陛下悔過責躬損不急之務任至公之人持此誠實以答譴咎其驅蝗使一切宜罷玄宗然之出其疏付崇崇建遣思復使山東按所損還以實言崇又遣監察御史劉沼覆視沼希宰相意悉易故牒以聞故河南數州賦不得蠲崇惡之出爲德州刺史拜黃門侍郎帝北巡爲行在巡問賑給大使遷御史大夫性恬澹不喜爲繩察徙太子賓客進爵伯累遷吏部侍郎復爲襄州刺史治行名天下代還仍拜太子賓客卒年七十四諡曰文天子親題其碑曰有唐忠孝韓長山之墓故吏盧僎邑人孟浩然立石峴山初鄭仁傑李無爲者隱居太白山思復少從二人游嘗曰子識清貌古恨仕不及宰相也子朝宗

朝宗初歷左拾遺睿宗詔作乞寒胡戲諫曰昔辛有過伊川見被髮而祭知其必戎今乞寒胡非古不法無乃爲狄又道路籍籍咸言皇太子微服觀之且匈奴在邸刺客卒發大憂不測白龍魚服可深畏也況天象變見疫癘相仍厭兵

助陰是謂無益帝稱善特賜中上考帝傳位太子朝宗與將軍龐承宗諫曰太子雖睿聖宜且養成盛德帝不聽累遷荊州長史開元二十二年初置十道採訪使朝宗以襄州刺史兼山南東道襄州南楚故城有昭王井傳言汲者死行人雖暍困不敢視朝宗移書諭神自是飲者亡恙人更號韓公井坐所任吏擅賦役貶洪州刺史天寶初召爲京兆尹分渭水入金光門匯爲潭以通西市材木出爲高平太守始開元末海內無事訛言兵當與衣冠潛爲避世計朝宗盧終南山爲長安尉霍仙奇所發玄宗怒使侍御史王鉷訊之貶吳興別駕卒朝宗喜識拔後進嘗薦崔宗之嚴武於朝當時士咸歸重之

朝宗孫欽字相之性清簡元和初第進士自山南東道使府入爲殿中侍御史累遷桂管觀察使部二十餘州自參軍至縣令無慮三百員吏部所補纔十一餘皆觀察使商才補職欽下車悉來謁一吏持籍請補缺員欽下教曰居官治吾不奪其不奉法無望縱舍缺者須按籍取可任任之會春服使至鄉有豪猾厚進賄使者求爲縣令使者請欽許之旣去召鄉豪責以撓法答其背以令

部中自是豪右畏戢時詔置五管監兵盡境賦不足充其費仗處以儉約遂爲定制衆以爲難卒贈工部侍郎

宋務光字子昂一名烈汾州西河人舉進士及第調洛陽尉遷右衛騎曹參軍神龍元年大水詔文武九品以上官直言極諫務光上書曰后王樂聞過罔不與拒諫罔不亂樂聞過則下情通下情通則政無缺此所以興也拒諫則羣議壅羣議壅則上孤立此所以亂也臣嘗觀天人相與之際有感必應其間甚密是以教失於此變生於彼易曰天垂象見吉凶聖人象之竊見自夏以來水氣勃戾天下多懼其災洛水暴漲漂損百姓傳曰簡宗廟廢祠祀則水不潤下夫王者卽位必郊祀天地嚴配祖宗自陛下御極郊廟山川不時薦見又水者陰類臣妾之道氣盛則水泉溢頃虹蜺紛錯暑雨滯靈陰勝之沴也後廷近習或有離中饋之職以干外政願深思天變杜絕其萌又自春及夏牛多病死疫氣浸淫傳曰思之不睿時則有牛禍意者萬幾之事陛下未躬親乎晁錯曰五帝其臣不及則自親之今朝廷賢佐雖多然莫能仰陛下清光願勤思法宮凝就

大化以萬方爲念不以聲色爲娛以百姓爲憂不以犬馬爲樂臣聞三五之君不能免淫亢顧備禦存乎人耳災與細微安之不怪及禍變已成駭而圖之猶水決治防病困求藥雖復僂俛尙何救哉夫塞變應天實繫人事今霖雨卽閉坊門豈一坊一市能感發天道哉必不然矣故里人呼坊門爲宰相謂能節宣風雨天工人代乃爲虛設又數年以來公私更竭戶口減耗家無接薪之儲國乏俟荒之蓄陛下近觀朝市則以爲旣庶且富試踐閭陌則百姓衣馬牛之衣食犬彘之食十室而九丁壯盡於邊塞孀孤轉於溝壑猛吏奮毒急政破資馬困斯佚人窮斯詐起爲姦盜從而刑之良可歎也今人貧而奢不息法設而僞不止長史貪冒選舉以私稼穡之人少商旅之人衆願坦然更化以身先之凋殘之後緩其力役久弊之極訓以敦龐十年之外生聚方足臣聞太子者君之貳國之本所以守器承祧養民贊業願擇賢能早建儲副安社稷慰黎元姻戚之間謗議所集積疑成患憑寵生災愛之適以害之也如武三思等誠不宜任以機要國家利器庸可久假於人祕書監鄭普思國子祭酒葉靜能挾小道淺

術列朱紫取銀黃虧國經悖天道書曰制治于未亂保邦于未危此誠治亂安危之秋也願陛下遠佞人親有德乳保之母妃主之家以時接見無令媢黷疏奏不省俄以監察御史巡察河南道時滑州輸丁少而封戶多每配封人皆亡命失業務光建言通邑大都不以封今命侯之家專擇雄奧滑州七縣而分封者五王賦少於侯租入家倍於輸國請以封戶均餘州又請食賦附租庸歲送停封使息傳驛之勞不見納以考最進殿中侍御史遷右臺嘗薦汝州參軍事李欽憲後爲名臣卒年四十二時又有清源尉呂元泰亦上書言時政曰國家者至公之神器一正則難傾一傾則難正今中興政化之始幾微之際可不慎哉自頃營寺塔度僧尼施與不絕非所謂急務也林胡數叛獯虜內侵帑藏虛竭戶口亡散天下人失業不謂太平邊兵未解不謂無事水旱爲災不謂年登倉廩未實不謂國富而乃驅役飢凍彫鑿木石營構不急勞費日深恐非陛下中興之要也比見坊邑相率爲渾脫隊駿馬胡服名曰蘇莫遮旗鼓相當軍陣勢也騰逐喧譟戰爭象也錦繡夸競害女工也督斂貧弱傷政體也胡服相歡

非雅樂也渾脫爲號非美名也安可以禮義之朝法胡虜之俗詩云京邑翼翼四方是則非先王之禮樂而示則於四方臣所未諭書曰謀時寒若何必羸形體灌衢路鼓舞跳躍而索寒焉書聞不報

辛替否字協時京兆萬年人景龍中爲左拾遺時置公主府官屬而安樂府補授尤濫武崇訓死主弃故宅別築第侈費過度又盛興佛寺公私疲匱替否上疏曰古之建官不必備九卿有位而闕其選故賞不僭官不濫士有完行家有廉節朝廷餘奉百姓餘食下忠於上上禮於下委積無倉卒之危垂拱無顛沛之患夫事有惕耳目動心慮事不師古以行於今臣得言之陛下倍百行賞倍十增官金銀不供於印束帛不充於錫何所媿於無用之臣無力之士哉古語曰福生有基禍生有胎且公主陛下愛子也選賢嫁之設官輔之傾府庫以賜之壯第觀以居之廣池籩以嬉之可謂至重至憐也然用不合古義行不根人心將變愛成憎轉福爲禍何者竭人之力費人之財奪人之家怨也愛一女取三怨於天下使邊疆士不盡力朝廷士不盡忠人心散矣獨持所愛何所持乎

向使魯王賞同諸壻則有今日之福無曩日之禍人徒見其禍不知禍所來所以禍者寵過也今弃一宅造一宅忘前悔忽後禍臣竊謂陛下乃憎之非愛之也臣聞君以人爲本本固則邦寧邦寧則陛下夫婦母子長相保也願外謀宰臣爲久安計不使姦臣賊子有以伺之今疆場危駭倉廩空虛卒輸不充士賞不及而大建寺宇廣造第宅伐木空山不給棟梁運土塞路不充牆壁所謂佛者清淨慈悲體道以濟物不欲利以損人不榮身以害教今三時之月掘山穿地損命也殫府虛帑損人也廣殿長廊榮身也損命則不慈悲損人則不愛物榮身則不清淨寧佛者之心乎昔夏爲天子二十餘世而商受之商二十餘世而周受之周三十餘世而漢受之由漢而後歷代可知已咸有道之長無道之短豈窮金玉修塔廟享久長之祚乎臣以爲減彫琢之費以調不足是有佛之德息穿掘之苦以全昆蟲是有佛之仁罷營構之直以給邊垂是有湯武之功回不急之祿以購廉清是有唐虞之治陛下緩其所急急其所緩親未來疏見在失真實冀虛無重俗人之所爲而輕天子之業臣竊痛之今出財依勢避役

亡命類度爲沙門其未度者窮民善人耳拔親樹知豈離朋黨畜妻養孥非無私愛是致人毀道非廣道求人也陛下常欲填池壑捐苑囿以賑貧人今天下之寺無數一寺當陛下一宮壯麗用度尙或過之十分天下之財而佛有七八陛下何有之矣雖役不食之人不衣之士猶尙不給況必待天生地養風動雨潤而後得之乎臣聞國無九年之儲曰非其國今計倉廩度府庫百僚共給萬事用度臣恐不能卒歲假如兵旱相乘則沙門不能環甲冑寺塔不足穰飢饉矣帝不省睿宗立罷斜封官千餘人俄詔復之方營金仙玉貞觀替否以左補闕上疏曰臣謂古之用度不時爵賞不當國破家亡者口說不若身逢耳聞不若目見臣請以有唐治道得失陛下所及見者言之太祖陛下之祖撥亂立極得至治之體省官清吏舉天下職司無虛授用天下財帛無枉費賞必待功官必得才爲無不成征無不服不多寺觀而福祿至不度僧尼而咎殃滅陰陽不愆五穀遂成粟腐帛爛萬里貢賦百蠻歸款享國久長多歷年所陛下何憚而不法之中宗陛下之兄居先帝之業忽先帝之化不聽賢臣之言而悅子女之



意虛食祿者數千人妄食土者百餘戶造寺蠹財數百億度人免租庸數十萬是故國家所出日加所入日減倉乏半歲之儲庫無一時之帛所惡者逐逐必忠良所愛者賞賞皆讒慝朋佞喋喋交相傾動奪百姓之食以養殘凶剝萬人之衣以塗土木人怨神怒親忿衆離水旱疾疫六年之間三禍爲變享國不永受終於凶婦取譏萬代詒笑四夷陛下所見也若法太宗治國太山之安可致也法中宗治國累卵之危亦可致也頃淫雨不解穀荒于壘麥爛于場入秋亢旱霜損蟲暴草木枯黃下人咨嗟未知所濟而營寺造觀日繼于時道路流言計用緡錢百餘萬陛下知倉有幾歲儲庫有幾歲帛百姓何所活三邊何所輸民散兵亂職此由也而以百萬構無用之觀受天下之怨陛下忍棄太宗之治本不忍棄中宗之亂階忍棄太宗長久之謀不忍棄中宗短促之計何以繼祖宗觀萬國耶陛下在韋氏時切齒羣凶今貴爲天子不改其事恐復有切齒於陛下者往見明敕一用貞觀故事且貞觀有營寺觀加浮屠黃老益無用之官行不急之務者乎往者和帝之憐悖逆也宗晉卿勸爲第宅趙履温勸爲園亭

工徒未息義兵交馳亭不得游宅不得息信邪僻之說成骨肉之刑陛下所見也今茲二觀得無晉卿之徒陰勸爲之冀娛骨肉不可不察也惟陛下停二觀以須豐年以所費之財給貧窮填府庫則公主福無窮矣疏奏帝不能用然嘉切直稍遷右臺殿中侍御史雍令劉少微恃權貪贓替否按之岑義屢以爲請替否曰我爲憲司懼勢以縱罪謂王法何少微坐死遷累潁王府長史卒年八十

李渤字濬之魏橫野將軍申國公發之裔父鈞殿中侍御史以不能養母廢于世渤恥之不肯仕刻志於學與仲兄涉偕隱廬山嘗以列禦寇拒粟其妻怒是無婦也樂羊子捨金妻讓之是無夫也乃撫古聯德高蹈者以楚接輿老萊子黔婁先生於陵子王仲孺梁鴻六人圖象讚其行因以自儆久之更徙少室元和初戶部侍郎李巽諫議大夫韋況交章薦之詔以右拾遺召於是河南少尹杜兼遣吏持詔幣卽山敦促渤上書謝昔屠羊說有言位三旌祿萬鍾知貴於屠羊然不可使吾君妄施彼賤買也猶能忘己愛君臣雖欲盜榮以濟所欲得

無愧屠羊乎不拜洛陽令韓愈遺書曰有詔河南敦諭拾遺公朝廷士引頸東望若景星鳳鳥始見爭先覩之爲快方今天子仁聖小大之事皆出宰相樂善言如不得聞自卽大位凡所出而施者無不得宜勤儉之聲寬大之政幽閩婦女草野小子飽聞而厭道之愈不通於古請問先生茲非太平世歟加又有非人力而至者年穀屢熟符貺委至于紀之姦不戰而拘彙彊梁之凶銷鑠縮粟迎風而委伏其有一事未就正視若不成人四海所環無一夫甲而兵者若此時也拾遺公不疾起與天下士樂成而享之斯無時矣昔孔子知不可爲而爲之不已跡接於諸侯之國今可爲之時自藏深山牢關而固拒卽與仁義者異守矣想拾遺公冠帶就車惠然肯來舒所畜積以補綴盛德之闕利加于時名垂將來踴躍懷企頃刻以冀又切聞朝廷議必起拾遺公使者往若不許卽河南必繼以行拾遺徵若不至更加高秩如是辭少就多傷於廉而害於義拾遺公必不爲也善人進其類皆有望於公公不爲起是使天子不盡得良臣君子不盡得顯位人庶不盡被惠利其害不爲細必審察而諦思之務使合於孔子

之道乃善渤心善其言始出家東都每朝廷有闕政輒附章列上元和九年討淮西上平賊三術一曰感二曰守三曰戰感不成不失爲守守不成不失爲戰又上禦戎新錄乃以著作郎召渤遂起歲餘遷右補闕以直忤旨下遷丹王府諮議參軍分司東都十三年上言至德以來天下思致治平訖今不稱者人倦而不知變天以變通之運遺陛下陛下順而革之則悠久宜乘平蔡之勢以德羈服恆克無不濟則恩威暢矣昔舜禹以匹夫宅四海其烈如彼今以五聖營太平其難如此臣恐宰相羣臣蘊晦術略啓沃有所未盡使陛下翹然思文武禹湯而不獲也宜正六官敘九疇修王制月令崇孝悌敦九族廣諫路黜選舉復俊造定四民省抑佛老明刑行令治兵禦戎願下宰相公卿大夫議博引海內名儒大開學館與羣臣參講據經稽古應時便俗者使切磋周復作制度合宣父繼周之言謹上五事一禮樂二食貨三刑政四議都五辨讎渤雖處外然志存朝廷表疏凡四十五獻擢爲庫部員外郎會皇甫鎛輔政務剝下佐用度而渤奉詔弔鄒士美喪在道上言渭南長源鄉戶四百今纔四十閩鄉戶三千

而今千宅州縣大抵類此推其敝始於攤逃人之賦假令十室五逃則均責未逃者若抵石于井非極泉不止誠繇聚斂之臣割下媚上願下詔一賜禁止計不三年人必歸于農夫農國之本本立而太平可議矣又言道路蕩不治驛馬多死憲宗得奏咨駭卽詔出飛龍馬數百給畿驛渤旣以峭直觸要臣意乃謝病歸穆宗立召拜考功員外郎歲終當校考渤自宰相而下升黜之上奏曰宰相俛文昌值陛下卽位倚以責功安危治亂繫也方陛下敬大臣未有昵比左右自驕之心而天下事一以付之俛等不推至公陳先王道德又不振拔舊典復百司之本政之興廢在賞罰俛等未聞慰一首公使天下吏有所勸黜一不職使尸祿有所懼士之邪正混然無章陛下比幸驪山宰相學士皆股肱心腹宜皆知之不先事以諫陷君於過俛與學士杜元穎等請考中下御史大夫李絳左散騎常侍張惟素右散騎常侍李益諫幸驪山鄭覃等諫畋游得事君之禮請考上下崔元略當考上下前者于翬不實翬以賄死請降中中大理卿許季同仁翬者應考中下然頃陷劉闢棄家以歸宜補厥過考中中少府監裴通

職修舉考應中上以封母捨嫡而追所生請考中下奏入不報會渤請急馮宿  
領考功以考課令取歲中善惡爲上下郎中校京官四品以下黜陟之由三品  
上爲清望官歲進名聽內考非有司所得專渤舉舊事爲褒貶違朝廷制請如  
故事渤議遂廢會魏博節度使田弘正表渤爲副元穎劾奏渤賣直售名資狂  
躁干進不已外交方鎮求尉薦不宜在朝出爲虔州刺史渤奏還信州移稅錢  
二百萬免賦米二萬石廢冗役千六百人觀察使上狀不閱歲遷江州刺史度  
支使張平叔斂天下逋租渤上言度支所收貞元二年流戶賦錢四百四十萬  
臣州治田二千頃今旱死者千九百頃若徇度支所斂臣懼天下謂陛下當大  
旱責民三十年逋賦臣刺史上不能奉詔下不忍民窮無所逃死請放歸田里  
有詔蠲責渤又治湖水築隄七百步使人不病涉入爲職方郎中遣諫議大夫  
時敬宗晏朝紫宸入閣帝久不出羣臣立屏外至頓仆渤見宰相曰昨論晏朝  
事今益晚是諫官不能移人主意渤請出閣待罪會喚仗乃止退上疏曰今日  
入閣陛下不時見羣臣羣臣皆布路跛倚夫跛倚形諸外則憂思結諸內憂倦

既積災釁必生小則爲旱爲孽大則爲兵爲亂禮三諫不聽則逃之陛下新卽位臣至三諫恐危及社稷又言左右常侍職規諷循默不事若設官不責實不如罷之俄充理匭使建言事大者以聞次白宰相下以移有司有司不當許再納匭妄訴者加所坐一等以絕冒越詔可時政移近倖紀律蕩然渤勁正不顧患通章封無闕日天子雖幼昏亦感寤擢給事中賜金紫服五坊卒夜鬪傷縣人鄂令崔發怒敕吏捕梓其一中人也釋之帝大怒收發送御史獄會大赦改元發以囚坐雞筍下俄而中人數十持挺亂擊發敗面折齒幾死吏哀請乃去既而囚皆釋而發不得原渤上疏曰縣令曳辱中人中人毆御囚其罪一也然令罪在赦前而中人在赦後不寘于法臣恐四夷聞之慢倍之心生矣渤又誦言前神策軍在幔城篡京北進食牙盤不時治致宦人益橫帝以問左右皆曰無之帝謂渤有黨出爲桂管觀察使它日宰相李逢吉等見帝曰發暴中人誠不敬然其母故宰相韋貫之姊年八十憂發成疾陛下方孝治宜少延之帝惻然曰比諫官但言發枉未嘗道此卽遣使送發於家且撫慰其母韋拜詔泣對

使者杖發四十猶奪其官至文宗乃用發爲懷州長史桂有灘水出海陽山世言秦命史祿代粵鑿爲漕馬援討徵側復治以通餽後爲江水潰毀渠遂廢淺每轉餉役數十戶濟一艘渤醜浚舊道郭泄有宜舟楫利焉踰年以病歸洛太和中召拜太子賓客卒年五十九贈禮部尙書渤孤操自將不苟合於世人咸謂之沽激屢以言斥而悻直不少衰守節者尙之

裴潏本河東聞喜人篤學善隸書以蔭仕元和初累遷左補闕於是兩河用兵憲宗任宦人爲館驛使檢稽出納有曹進玉者尤恃恩倨甚使者過至加捽辱宰相李吉甫奏罷之會伐蔡復以中人領使潏諫曰凡驛有官專尸之畿內以京兆尹道有觀察使刺史相監臨臺又御史爲之使以察過闕猶有不職則宜明科條督責之誰不惕懼若復以宮闈臣領之則內人而及外事職分亂矣夫事不善誠於初體有非不必大方開太平澄本正末宜塞侵官之原出位之漸帝雖不用而嘉其忠擢起居舍人帝喜方士而柳泌爲帝治丹劑求長年帝御劑中躁病渴潏諫曰夫除天下之害者常受天下之利共天下之樂者常饗天



下之福故上自黃帝顓頊堯舜禹湯文武咸以功濟生人天皆報以耆壽垂榮  
無疆陛下以孝安宗廟以仁牧黎庶攘剋祆凶復張太平賓禮賢俊待以終始  
神功聖德前古所不及陛下躬行之天地宗廟必相陛下以億萬之永今乃方  
士韋山甫柳泌等以丹術自神更相稱引詭爲陛下延年臣謂士有道者皆匿  
名滅景無求於世豈肯干謁貴近自鬻其伎哉今所至者非曰知道咸求利而  
來自言飛鍊爲神以誅權賄僞窮情得不恥遁亡豈可信厥術御其藥哉臣聞  
人食味別聲被色而生者也味以行氣氣以實志水火鹽梅以烹魚肉宰夫和  
之齊之以味君子食之以平其心夫三牲五穀稟五行以生也發爲五味天地  
生之所以奉人聖人節調以致康彊若乃藥劑者所以禦疾豈常進之餌哉況  
又金石性託酷烈而燒冶積年包炎產毒未易可制夫秦漢之君亦信方士矣  
如盧生徐福欒大李少君後皆詐譎無成功事暴前策皆可驗視禮君之藥臣  
先嘗之父之藥子先嘗之臣子一也願以所治劑俾其人服之竟一歲以考真  
僞則無不驗矣帝怒貶江陵令穆宗立泌等誅召濤再遷刑部郎中前率府倉

曹參軍曲元衡杖民柏公成母死有司以死在辜外推元衡父蔭贖金公成受賂不訴以赦免潏議曰杖捶者官得施所部非所部雖有罪必請有司明不可擅也元衡非在官公成母非所部不可以蔭免公成取賄仇家利母之死逆天性當伏誅有詔元衡流公成論死久之繇給事中爲汝州刺史越法杖人輒死以太子左庶子分司東都遷左散騎常侍集賢殿學士改刑部侍郎爲華州刺史召拜兵部侍郎出爲河南尹復還舊官卒贈戶部尙書諡曰敬潏以道自任悉心事上疾黨附不爲權近所持嘗哀古今辭章續梁昭明太子文選自號太和通選上之當時文士非與遊者皆不取世恨其隘憲宗竟以藥棄天下世益謂潏知言穆宗雖誅泌而後稍稍復惑方士有布衣張臯者上疏曰神慮澹則血氣和嗜欲勝則疾疹作古之聖賢務自頤養不以外物撓耳目聲色敗情性繇是和平自臻福慶用昌在易无妄之疾勿藥有喜在詩自天降康降福穰穰此天人符也然則藥以攻疾無疾不用藥也高宗時處士孫思邈達於養生其言曰人無故不用餌藥藥有所偏助則藏氣爲不平推此論之可謂達見至理

夫寒暑爲賊節宣乖度有資於醫尙當重慎故禮稱醫不三世不服其藥庶士猶爾況天子乎先帝晚節喜方士累致危疾陛下所自知不可蹈前覆迎後悔也今人人竊議直畏忤旨莫敢言臣蓬蔽之生非以邀寵顧忠義可爲者聞而默則不安願陛下無忽帝善其言詔訪臯不獲

李中敏字藏之系出隴西元和中擢進士第性剛峭與杜牧李甘善其文辭氣節大抵相上下沈傳師觀察江西辟爲判官入拜侍御史鄭注誣逐宰相宋申錫天下以目太和六年大旱文宗內憂詔詢所以致雨者中敏時以司門員外郎上言雨不時降夏陽驕愆苗欲槁枯陛下憂勤降德音俾下得盡言臣聞昔東海誤殺一孝婦大旱三年臣頃爲御史臺推囚華封儒殺良家子三人陛下赦封儒死然三人者亦陛下赤子也神策士李秀殺平民法當死以禁衛刑止流宋申錫位宰相生平饋致一不受其道勁正姦人忌之陷不測之辜獄不參驗銜恨而沒天下士皆指目鄭注臣知數寃必列訴上帝天之降災殆有由然漢武帝國用空竭桑弘羊興筦權之利然卜式請烹以致雨況申錫之枉天下

知之何惜斬一注以快忠臣之魂則天且兩矣帝不省中敏以病告滿歸潁陽注誅以司勳員外郎召累遷諫議大夫爲理匭使建言上書者將納於匭有司允審其副有不可輒卻之臣請匭出禁中暮而入爲下開必達之路廣聰明直枉結若有司先裁可否恐事不重密非窮塞得自申意請一裁諸上詔可遷給事中仇士良以開府階蔭其子中敏曰內謁者監安得有子士良慚恚絲是復棄官去開成末爲婺杭二州刺史卒于官

中敏所善李款字言源長慶初第進士爲侍御史注自邠寧入朝款伏閣劾奏注內通敕使外結朝臣往來兩地下射賊謝帝不省後竇用事款被斥去注死絲倉部員外郎累遷江西觀察使終澶王傳

李甘字和鼎長慶末第進士舉賢良方正異等累擢侍御史鄭注侍講禁中求宰相朝廷譁言將用之甘顯倡曰宰相代天治物者當先德望後文藝注何人欲得宰相白麻出我必壞之旣而麻出乃以趙儋爲鄜坊節度使甘坐輕肆貶封州司馬而李訓內亦惡注絲是注卒不相甘終于貶始河南人楊牢字松年

有至行甘方未顯以書薦於尹曰執事之部孝童楊牢父茂卿從田氏府趙軍反殺田氏茂卿死牢之兄蜀三往索父喪慮死不果至牢自洛陽走常山二千里號伏叛壘委髮羸骸有可憐狀讎意感解以尸還之單縗冬月往來太行間凍膚皸瘃銜哀兩血行路稠人爲牢泣歸責其子以牢勉之牢爲兒踐操如此未聞執事門喧而書顯之豈樹風扶教意耶且鄉人能醫疽剗脰急親之病皆一時決耳猶蒙表其閭脫之徭上有大禮則差問以粟帛今河北驕叛萬師不能攘而牢徒步請尸仇手與夫含腐忍瘡者孰多牢絕乳卽能詩洛陽兒曹壯於牢者皆出其下聞牢之贖喪潞帥償其費其葬也滑帥賻之財斯執事之事他人旣篡之矣卽有稱牢於上者執事能無恨其後乎其激卽自任類此牢後亦擢進士第

贊曰夫以下摩上士所甚患然取名最多故上失德則與下爭名而後有誅夷斥竄事然或依古肆言高而難從以邀主買直者逆之似傷道行之不切時此言事常弊也若廷珪數子優游彌縫皆中時病非所謂買直自榮者也至渤爭

晏朝漉諫方士甘斥鄭注不可作宰相排寵救危不得不爾賢哉

唐書卷一百十八

唐書卷二百十八考證

韋湊傳春秋重責帥其出湊曹州刺史○舊書以公事左授杭州刺史  
虛心入爲工部尙書○舊書歷戶部尙書

李中敏傳以病滿告歸潁陽○舊書中敏謝病歸洛陽

唐書卷一百十八考證





唐書卷一百十九

宋 端 明 殿 學 士 宋 祁 撰

列傳第四十四

武李賈白

武平一名甄以字行潁川郡王載德子也博學通春秋工文辭武后時畏禍不敢與事隱嵩山修浮圖法屢詔不應中宗復位平一居母喪迫召爲起居舍人丐終制不見聽景龍二年兼修文館直學士時天子暗柔不君韋后烝亂外戚盛平一重斥語卽自請抑母黨上言去歲熒惑入羽林太白再經天太陽虧月犯大角臣聞災不妄生上見下應信如景響詩曰唯此文王小心翼翼昭事上帝聿懷多福陛下天性孝愛戚屬外家恩洽澤濡臣一宗階三等家數侯朱輪華轂過許史梁鄧遠甚恩崇者議積位厚者覺速故月滿必虧日中則移時不再來榮難久藉昔永淳之後王室多難先聖從權故臣家以宗子竊祿疏封今上聖復辟宜退守園廬乃再假光寵爵封如初高班厚位遂超涯極故陰氣僭

陽河洛汎溢昔王族驕盈梅福上書竇氏專縱丁鴻進諫且后妃之家恩過寵深一朝覆沒遂無噍類願思抑損之宜長遠之策推遠時權以全親親帝慰勉不許遷考功員外郎于時太平安樂公主各立黨相根毀親貴離闈帝患之欲令敦和以訪平一因上書曰病之在四體者跡分而易逐居心腹者候遽而難治刑政乖舛四支疾也親權猜間心腹患也書曰克明俊德以親九族九族既睦平章百姓詩曰協比其鄰婚姻孔云是知親族以輯睦爲義也自頃權貴猜防外和內離怨結姻婭疑生骨肉邀榮之徒詭獻忠款膏脣之伍苟輸讒計脅肩邸第之中噤頤媪宦之側故過從絕猜嫌構親愛乖黨與生積霜成冰禍不可旣願悉召近親貴人會宴內殿告以輯睦申以恩勤斥姦人塞讒路若猶未已則捨近圖遠抑慈示嚴惟陛下之命帝美其忠切卒不用初崔日用自言明左氏春秋諸侯官族宅日學士大集日用折平一曰君文章固耐久若言經則敗績矣時崔湜張說素知平一該習勸令酬詰平一乃請所疑日用曰魯三桓鄭七穆奈何答曰慶父叔牙季友桓三子也孟孫至彘凡九世叔孫舒季孫肥

凡八世鄭穆公十一子子然及二子子孔三族亡子羽不爲卿故稱七穆子罕子駟子良子國子游子印子豐也一坐驚服平一問日用曰公言齊桓公楚莊王時諸侯屬齊若楚凡幾平公靈王時諸侯屬晉楚凡幾晉六卿齊楚執政幾何人日用謝曰吾不知君能知乎平一條舉始末無留語日用曰吾請北面闔坐大笑後宴兩儀殿帝命后兄光祿少卿嬰監酒嬰滑稽敏給詔學士譏之嬰能抗數人酒酣胡人襪子何懿等唱合生歌言淺穢因倨肆欲奪司農少卿宋廷瑜賜魚平一上書諫曰樂天之和禮地之序禮配地樂應天故音動於心聲形于物因心哀樂感物應變樂正則風化正樂邪則政教邪先王所以達廢興也伏見胡樂施于聲律本備四夷之數比來日益流宕異曲新聲哀思淫溺始自王公稍及閭巷妖妓胡人街童市子或言妃主情貌或列王公名質詠歌蹈舞號曰合生昔齊衰有行伴侶陳滅有玉樹後庭花趨數驚僻皆亡國之音夫禮慊而不進卽銷樂流而不反則放臣願屏流僻崇肅雍凡胡樂備四夷外一皆罷遣況兩儀承慶殿者陛下受朝聽訟之所比大饗羣臣不容以倡優媒狎

虧汙邦典若聽政之暇苟玩耳目自當奏之後廷可也不納玄宗立貶蘇州參軍徙金壇令平一見寵中宗時雖宴豫嘗因詩頌規誠然不能卓然自引去故被謫既謫而名不衰開元末卒孫元衡儒衡別傳

李乂字尚真趙州房子人少孤年十二工屬文中書令薛元超曰是子且有海內名第進士茂才異等累調萬年尉長安三年詔雍州長史薛季昶選部吏才中御史者季昶以乂聞擢監察御史劾奏無避景龍初葉靜能怙勢乂條其姦中宗不納遷中書舍人修文館學士帝遣使江南發在所庫貲以贖生乂上疏以爲江南魚鼈之利衣食所資江湖之生無既而府庫之財有限與其拯物不如憂民且鬻生之徒惟利所視錢刀日至網罟歲廣施之一朝營之百倍若回所贖之貲減方困之徭其澤多矣韋氏之變詔令嚴促多乂草定進吏部侍郎仍知制誥與宋璟等同典選事請謁不行時人語曰李下無蹊徑改黃門侍郎封中山郡公制敕不便輒駁正貴幸有求官者睿宗曰朕非有靳顧李乂不可耳諫罷金仙玉真二觀帝雖不從優容之太平公主干政欲引乂自附乂深自

拒絕開元初姚崇爲紫微令薦爲侍郎外託引重實去其糾駁權畏又明切也未幾除刑部尙書卒年六十八贈黃門監諡曰貞遺令薄葬毋還鄉里又沈正方雅識治體時稱有宰相器葬曰蘇頲畢構馬懷素往祖之哭曰非公爲慟而誰慟歟又事兄尙一尙貞孝謹甚又俱以文章自名弟兄同爲一集號李氏花萼集又所著甚多尙一終清源尉尙貞博州刺史

賈曾河南洛陽人父言忠貌魁梧事母以孝聞補萬年主簿護役蓬萊宮或短其苛高宗廷詰辯列詳諦帝異之擢監察御史方事遼東奉使稟軍餉還奏上山川道里并陳高麗可破狀帝問諸將材否對曰李勣舊臣陛下所自悉龐同善雖非鬪將而持軍嚴薛仁貴勇冠軍高倬忠果而謀契苾何力性沈毅雖忌前有統御才然夙夜小心亡身憂國莫逮於勣者帝然所許衆亦以爲知言累轉吏部員外郎李敬玄兼尙書言忠尙氣及主選不能下貶邵州司馬失武懿宗意下獄幾死左除建州司戶參軍卒曾少有名景雲中爲吏部員外郎玄宗爲太子遴選宮僚以曾爲舍人太子數遣使采女樂就率更寺肄習曾諫曰

作樂崇德以和人神韶夏有容英氣有節而女樂不與其間昔魯用孔子幾霸  
戎有由余而彊齊秦遺以女樂故孔子行由余出奔良以冶容哇咬蠱心喪志  
聖賢疾之最甚殿下渴賢之美未彰好伎之聲先聞非所以追啓誦嗣堯舜之  
烈也餘閑宴私後廷伎樂古亦有之猶當祕隱不以示人況閱之所司明示羣  
臣哉願下令屏倡優女子諸使者採召一切罷止太子手令嘉答俄擢中書舍  
人以父嫌名不拜徙諫議大夫知制誥天子親郊有司議不設皇地祇位曾請  
合享天地如古制并從祀等坐睿宗詔宰相禮官議皆如曾請開元初復拜中  
書舍人曾固辭議者謂中書乃曹司非官稱嫌名在禮不諱乃就職與蘇晉同  
掌制誥皆以文辭稱時號蘇賈後坐事貶洋州刺史歷虔鄭等州刺史遷禮部  
侍郎卒子至

至字幼鄰擢明經第解褐單父尉從玄宗幸蜀拜起居舍人知制誥帝傳位至  
當讓冊旣進彙帝曰昔先天誥命乃父爲之辭今茲命冊又爾爲之兩朝盛典  
出卿家父子手可謂繼美矣至頓首鳴咽流涕歷中書舍人至德中將軍王去

榮殺富平令杜徽肅宗新得陝且惜去榮材詔貸死以流人使自効至諫曰聖人誅亂必先示法令崇禮義漢始入關約法三章殺人者死不易之法也按將軍去榮以朔方偏裨提數千士不能整行列挾私怨殺縣令有犯上之逆或曰去榮善守陝新下非去榮不可守臣謂不然李光弼守太原程千里守上黨許叔冀守靈昌魯炁守南陽賁守雍丘張巡守睢陽初無去榮未聞賊能下也以一能而免死彼弧矢絕倫劍術無前者恃能犯上何以止之若捨去榮誅將來是法不一而招罪人也惜一去榮殺十去榮之材其傷蓋多後逆亂之人有逆於此而順於彼乎亂富平而治於陝乎悖縣令能不悖於君乎律令者太宗之律令陛下不可以一士小材廢祖宗大法帝詔羣臣議太子太師韋見素文部郎中崔器等皆以爲法者天地大典王者不敢專也帝王不擅殺而小人得擅殺者是權過人主開元以前無敢專殺尊朝廷也今有之是弱國家也太宗定天下陛下復鴻業則去榮非至德罪人乃貞觀罪人也其罪祖宗所不赦陛下可易之耶詔可蒲州刺史以河東瀕賊徹傳城廬舍五千室不使賊得保聚

民大擾詔遣至慰安官助營完蒲人乃安坐小法貶岳州司馬寶應初召復故官遷尚書左丞楊綰建請依古制縣令舉孝廉于刺史刺史升天子禮部詔有司參議多是縮言至議以為自晉後衣冠遷徙人多僑處因緣官族所在占籍今卿舉取人未盡請廣學校增國子博士員十道大州得置大學館詔博士領之召置生徒使保桑梓者鄉里舉焉在流寓者庠序推焉議者更附至議轉禮部侍郎待制集賢院大歷初徙兵部累封信都縣伯進京兆尹七年以右散騎常侍卒年五十五贈禮部尚書諡曰文

白居易字樂天其先蓋太原人北齊五兵尚書建有功于時賜田韓城子孫家焉又徙下邳父季庚為彭城令李正己之叛說刺史李洧自歸累擢襄州別駕居易敏悟絕人工文章未冠謁顧況况吳人恃才少所推可見其文自失曰吾謂斯文遂絕今復得子矣貞元中擢進士拔萃皆中補校書郎元和元年對制策乙等調盪屋尉為集賢校理月中召入翰林為學士遷左拾遺四年天子以旱甚下詔有所蠲貸振除災沴居易見詔節未詳即建言乞盡免江淮兩賦以



救流瘠且多出宮人憲宗頗采納是時于頔入朝悉以歌舞人內禁中或言普寧公主取以獻皆頔嬖愛居易以爲不如歸之無令頔得歸曲天子李師道上私錢六百萬爲魏徵孫贖故第居易言徵任宰相太宗用殿材成其正寢後嗣不能守陛下猶宜以賢者子孫贖而賜之師道人臣不宜掠美帝從之河東王鏐將加平章事居易以爲宰相天下具瞻非有重望顯功不可任按鏐誅求百計不卹彫瘵所得財號爲羨餘以獻今若假以名器四方聞之皆謂陛下得所獻與宰相諸節度私計曰誰不如鏐爭哀割生人以求所欲與之則綱紀大壞不與則有厚薄事一失不可復追是時孫璿以禁衛勞擢鳳翔節度使張奉國定徐州平李鏡有功遷金吾將軍居易爲帝言宜罷璿進奉國以竦天下忠臣心度支有囚繫閩鄉獄更三赦不得原又奏言父死繫其子夫久繫妻嫁債無償期禁無休日請一切免之奏凡十餘上益知名會王承宗叛帝詔吐突承璀率師出討居易諫唐家制度每征伐專委將帥責成功比年始以中人爲都監韓全義討淮西賈良國監之高崇文討蜀劉貞亮監之且興天下兵未有以中

人專統領者神策既不置行營節度卽承瓘爲制將又充諸軍招討處置使是實都統恐四方聞之必輕朝廷後世且傳中人爲制將自陛下始陛下忍受此名哉且劉濟等洎諸將必恥受承瓘節制心有不樂無以立功此乃資承宗之姦挫諸將之銳帝不聽旣而兵老不決居易上言陛下討伐本委承瓘外則盧攸史范希朝張茂昭今承瓘進不決戰已喪大將希朝茂昭數月乃入賊境觀其勢似陰相爲計空得一縣卽辟不進理無成功不亟罷之且有四害以府帑金帛齊民膏血助河北諸侯使益富彊一也河北諸將聞吳少陽受命將請洗滌承宗章一再上無不許則河北合從其勢益固與奪恩信不出朝廷二也今暑溼暴露兵氣重烝誰不顧死孰堪其苦又神策雜募市人不忸于役脫奔逃相勳諸軍必搖三也回鶻吐蕃常有游偵聞討承宗歷三時無功則兵之強弱費之多少彼一知之乘虛入寇渠能救首尾哉兵連事生何故蔑有四也事至而罷則損威失柄祗可逆防不可追悔亦會承宗請罪兵遂罷後對殿中論執彊鯁帝未諭輒進曰陛下誤矣帝變色罷謂李絳曰是子我自拔擢乃敢爾我

叵堪此必斥之絳曰陛下啓言者路故羣臣敢論得先若黜之是箝其口使自爲謀非所以發揚盛德也帝悟待之如初歲滿當遷帝以資淺且家素貧聽自擇官居易請如姜公輔以學士兼京兆戶曹參軍以便養詔可明年以母喪解還拜左贊善大夫是時盜殺武元衡京都震擾居易首上疏請亟捕賊刷朝廷恥以必得爲期宰相嫌其出位不悅俄有言居易母墮并死而易賦新井篇言浮華無實行不可用出爲州刺史中書舍人王涯上言不宜治郡追貶江州司馬旣失志能順適所遇託浮屠生死說若忘形骸者久之徙忠州刺史入爲司門員外郎以主客郎中知制誥穆宗好畋游獻續虞人箴以諷曰唐受天命十有二聖兢兢業業咸勤厥政鳥生深林獸在豐草春蒐冬狩取之以道鳥獸蟲魚各遂其生民野君朝亦克用寧在昔玄祖厥訓孔彰馳騁畋獵俾心發狂何以效之曰羿與康曾不是誠終然覆亡高祖方獵蘇長進言不滿十旬未足爲懼上心旣悟爲之輟畋降及宋璟亦諫玄宗溫顏聽納獻替從容璟趨以出鷄死握中噫逐獸于野走馬于路豈不快哉銜橛可懼審其安危惟聖之慮俄

轉中書舍人田布拜魏博節度使命持節宣諭布遺五百縑詔使受之辭曰布父讎國恥未雪人當以物助之乃取其財誼不忍方諭問旁午若悉有所贈則賊未殄布貲竭矣詔聽辭餉是時河朔復亂合諸道兵出討遷延無功賊取弓高絕糧道深州圍益急居易上言兵多則難用將衆則不一宜詔魏博澤潞定滄四節度令各守境以省度支貲餉每道各出銳兵三千使李光顏將光顏故有鳳翔徐滑河陽陳許軍無慮四萬可徑薄賊開弓高糧路合下博解深州之圍與牛元翼合還裴度招討使使悉太原兵西壓境見利乘隙夾攻之間令招諭以動其心未及誅夷必自生變且光顏久將有威名度爲人忠勇可當一面無若二人者於是天子荒縱宰相才下賞罰失所宜坐視賊無能爲居易雖進忠不見聽乃對外遷爲杭州刺史始築堤捍錢塘湖鍾洩其水溉田千頃復浚李泌六井民賴其汲久之以太子左庶子分司東都復拜蘇州刺史病免文宗立以祕書監召遷刑部侍郎封晉陽縣男太和初二李黨事興險利乘之更相奪移進退毀譽若旦暮然楊虞卿與居易姻家而善李宗閔居易惡緣黨人斥

乃移病還東都除太子賓客分司踰年卽拜河南尹復以賓客分司開成初起  
爲同州刺史不拜以太子少傅進馮翊縣侯會昌初以刑部尙書致仕六年卒  
年七十五贈尙書右僕射宣宗以詩弔之遺命薄葬毋請諡居易被遇憲宗時  
事無不言湔剔抉摩多見聽可然爲當路所忌遂擯斥所蘊不能施乃放意文  
酒旣復用又皆幼君偃蹇益不合居官輒病去遂無立功名意與弟行簡從祖  
弟敏中友愛東都所居履道里疏沼種樹構石樓香山鑿八節灘自號醉吟先  
生爲之傳暮節惑浮屠道尤甚至經月不食葷稱香山居士嘗與胡杲吉叟鄭  
據劉真盧真張渾狄兼謨盧貞燕集皆高年不事者人慕之繪爲九老圖居易  
於文章精切然最工詩初頗以規諷得失及其多更下偶俗好至數千篇當時  
士人爭傳鷄林行賈售其國相率篇易一金甚僞者相輒能辯之初與元稹酬  
詠故號元白稹卒又與劉禹錫齊名號劉白其始生七月能展書姆指之無兩  
字雖試百數不差九歲暗識聲律其篤於才章蓋天稟然敏中爲相請諡有司  
曰文後履道第卒爲佛寺東都江州人爲立祠焉

贊曰居易在元和長慶時與元稹俱有名最長於詩它文未能稱是也多至數千篇唐以來所未有其自敘言關美刺者謂之諷諭詠性情者謂之閑適觸事而發謂之感傷其它爲雜律又譏世人所愛惟雜律詩彼所重我所輕至諷諭意激而言質閑適思澹而辭迂以質合迂宜人之不愛也今視其文信然而杜牧謂纖豔不逞非莊士雅人所爲流傳人間子父女母交口教授淫言媒語入人肌骨不可去蓋救所失不得不云觀居易始以直道奮在天子前爭安危冀以立功雖中被斥晚益不衰當宗閔時權勢震撼終不附離爲進取計完節自高而稹中道徼險得宰相名望漼然嗚呼居易其賢哉

行簡字知退擢進士辟盧坦劍南東川府罷與居易自忠州入朝授左拾遺累遷主客員外郎代韋詞判度支按進郎中長慶時振武營田使賀拔志歲終結課最詔行簡閱實發其妄志懼自刺不殊行簡敏而有辭後學所慕尙寶曆二年卒

敏中字用晦少孤承學諸兄長慶初第進士辟義成節度使李聽府聽一見許

其遠到遷右拾遺改殿中侍御史爲符澈邠寧副使澈卒以能政聞御史中丞高元裕薦爲侍御史再轉左司員外郎武宗雅聞居易名欲召用之是時居易足病廢宰相李德裕言其衰茶不任事卽薦敏中文詞類其兄而有器識卽日知制誥召入翰林爲學士進承旨宣宗立以兵部侍郎同中書門下平章事遷中書侍郎兼刑部尙書德裕貶敏中抵之甚力議者訾惡德裕著書亦言惟以怨報德爲不可測蓋斥敏中云歷尙書右僕射門下侍郎封太原郡公自員外凡五年十三遷崔鉉輔政欲專任患敏中居右會党項數寇邊鉉言宜得大臣鎮撫天子嚮其言故敏中以司空平章事兼邠寧節度招撫制置使初帝愛萬壽公主欲下嫁士人時鄭顥擢進士第有閔閱敏中以充選顥與盧氏婚將授室而罷銜之敏中自以居外畏顥讒自訴于帝帝曰朕知久矣若用顥言庸相任耶顧左右取書一函發視悉顥所上敏中乃安及行帝御安福樓以錢頒璽書諭尉賜通天帶衛以神策兵開府辟士禮如裴度討淮西時次寧州諸將已破羌賊敏中卽說諭其衆皆願棄兵爲業乃自南山並河按屯堡回繞千里又

規蕭關通靈威路使爲耕戰具踰年檢校司徒徙劍南西川增驛軍完創關壁  
治蜀五年有勞加兼太子太師徙荆南懿宗立召拜司徒門下侍郎還平章事  
數月足病不任謁固求避位不許中使者勞問俾對別殿毋拜右補闕王譜奏  
言敏中病四月陛下坐朝與他宰相語不三刻安暇論天下事願聽其請無使  
有持寵曠貴之譏書聞帝怒斥譜陽翟令給事中鄭公輿申救不聽譜者侍中  
珪之遠裔未幾加敏中中書令自裴度以勳德居而敏中以恩澤進咸通二年  
南蠻擾邊召敏中入議許挾扶升殿固求免乃出爲鳳翔節度使三奏願歸守  
墳墓除東都留守不敢拜許以太傅致仕詔書未至卒冊贈太尉博士曹鄴責  
其病不堅退且逐諫臣舉怙威肆行諡曰醜



唐書卷一百十九考證

白居易傳會昌初以刑部尚書致仕六年卒年七十五○舊書大中元年卒年七十六

居易從祖弟敏中乃出爲鳳翔節度使○舊書河中晉絳節度使

唐書卷一百十九考證



唐書卷一百二十

宋 端 明 殿 學 士 宋 祁 撰

列傳第四十五

五王

桓彥範字士則潤州丹陽人以門蔭調右翊衛遷司衛主簿狄仁傑曰君之才當自光大毋卹于初厚爲禮尋擢監察御史遷累中丞長安中爲司刑少卿張昌宗引妖人迎占言計不軌宋璟請窮治其姦武后以昌宗嘗自歸不許彥範諫曰昌宗謬橫恩苞福心億測天命皇神降怒自撻其咎推原厥情蓋防事暴之日得引首以免未敗則候時爲逆此凶詭之臣營惑聖心旣自歸露而尙與妖人祈福禳解則果於必成初無悔意今而宥之誠恐昌宗自謂應運天下浩然從之父在子稱尊爲逆子君在臣圖位爲逆臣逆而不誅社稷懼亡請付三司考治不納時內史李嶠等屢奏往爲酷吏破家者請皆宥雪依違未從彥範復上言自文明後得罪惟揚豫博三州不免宅可悉赦疏十上卒見聽嘗曰大

理人命所縣不可便辭詭合以自免張柬之將誅易之等引與定策於是以彥  
範敬暉爲左右羽林將軍屬以禁兵時中宗每北門起居因得謁陳祕計神龍  
元年正月彥範暉率羽林兵與將軍李湛李多祚楊元琰薛思行等千騎五百  
人討賊令湛多祚就東宮迎中宗至玄武門彥範等斬關入士皆鼓譟時武后  
處迎仙宮之集仙殿斬易之等廡下后聞變而起見中宗曰乃汝耶豎子誅可  
還宮彥範進曰太子今不可以歸往天皇棄羣臣以愛子託陛下今久居東宮  
羣臣思天皇之德不血刃清內難此天意人事歸李氏臣等謹奉天意惟陛下  
傳位萬世不絕天下之幸后乃臥不復言明日中宗復位以彥範爲侍中封譙  
郡公賜實封五百戶上書戒帝曰詩以關雎爲始言后妃者人倫之本治亂之  
端也故舜之興以皇英而周之興以任姒桀奔南巢禍階末嬉魯桓滅國惑始  
齊姜伏見陛下臨朝視政皇后必施帷殿上預聞政事臣愚謂古王者謀及婦  
人皆破國亡身傾軼繼路且以陰乘陽違天也以婦凌夫違人也違天不祥違  
人不義故書曰牝雞之晨惟家之索易曰無攸遂在中饋言婦人不得預外政

也伏願上以社稷爲重令皇后無居正殿于外朝深居宮掖脩陰教以輔佐天子又道路籍籍皆云胡僧慧範託浮屠法詭惑后妃出入禁奧瀆撓朝政陛下嘗輕騎微服數幸其居上下汙慢君臣虧替臣謂興化致治以康乂國家者絲進善而棄惡孔子曰執左道以亂政者殺假鬼神以危人者殺今慧範亂政危人者也不急誅且有變除惡務本願早裁之帝孱昏狃左右不能有所省納俄墨敕以方士鄭普思爲祕書監葉靜能爲國子祭酒彥範執不可帝曰要已用之不可止彥範曰陛下始復位制詔軍國皆用貞觀故事貞觀時以魏徵虞世南顏師古爲監以孔穎達爲祭酒如普思等方伎猥下安足繼蹤前烈臣恐物議謂陛下官不擇才以天秩加私愛不從時武三思以遷太后銜恚慮不利諸武而韋后雅爲帝寵畏且三思與烝亂由是朋讒奇中未幾罷彥範等政事五月加特進封扶陽郡王賜姓韋同后屬籍錫金銀錦繡皆以鐵券恕十死令朝朔望尋出爲洛州刺史改濠州王同皎謀誅三思事洩三思誣彥範等同逆陰令許州司功參軍鄭愔上變乃貶彥範瀧州司馬敬暉崖州司馬袁恕己竇州

司馬崔玄暉白州司馬張柬之新州司馬悉奪勳封三思又疏韋后隱穢榜於道請廢之帝震怒三思猥曰此殆彥範輩爲之命御史大夫李承嘉鞠狀物色其人承嘉卽奏彥範暉柬之恕己玄暉暴訕搖變內託廢后而實危君人臣無將當伏誅詔有司議罪大理丞李朝隱執奏彥範等未訊卽誅恐爲讎家誣讎請遣御史按實卿裴談請卽誅斬家籍沒帝業嘗許以不死遂流濃州禁錮終身子弟年十六以上謫徙嶺外擢承嘉金紫光祿大夫襄武郡公后又賜綵五百段錦被一進談刑部尙書而貶朝隱三思又諷節愍太子請夷彥範等三族帝不從三思慮五人者且復用乃納崔湜計遣周利貞矯制殺之利貞至貴州逢彥範卽縛曳竹槎上肉盡杖殺之年五十四睿宗卽位彥範等並追復官爵賜實封二百戶還其子孫諡曰忠烈開元六年詔與暉玄暉柬之恕己勤勞王家皆配享中宗廟庭建中三年復贈彥範爲司徒暉太尉玄暉太子太師柬之司徒恕己太子太傅彥範工屬文然不甚喜觀書所志惟忠孝大略居若不能言及議論帝前雖被詰讓而安辭定色辨爭愈切誅二張也柬之勒兵景運門

將遂夷諸武洛州長史薛季昶勸曰二凶雖誅產祿猶在請除之會日暮事遽  
彥範不欲廣殺因曰三思机上肉爾留爲天子籍手季昶歎曰吾無死所矣俄  
而三思竊入宮因韋后反盜朝權同功者歎曰死我者桓君也彥範亦曰主上  
昔爲英王故吾留武氏使自誅定今大事已去得非天乎初將起事告其母母  
曰忠孝不並立義先國家可也御史李福業者嘗與彥範謀及被殺福業亦流  
番禺後亡匿吉州參軍敬元禮家吏捕得元禮俱坐死福業將刑謝元禮曰子  
有親吾甚愧恨元禮曰公窮而歸我我得已乎見者傷之時監察御史盧襲秀  
亦坐與桓敬善爲冉祖雍所按不屈或報曰南使至桓敬已死襲秀泫然祖雍  
怒曰彥範等負國君乃流涕且君下獄諸弟皆縱酒無憂色何邪對曰我何負  
哉正坐與彥範善耳今盡殺諸弟則已如獨殺襲秀恐公不得高枕而瞑祖雍  
色動握其手曰當活公遂得不坐襲秀者其祖方慶武德中爲察非掾秦王者  
之嘗引與議建成事方慶辭曰母老矣勾身歸養王不逼也貞觀中爲彙城令  
彥範弟玄範官至常州刺史臣範工部侍郎

薛季昶者絳州龍門人武后時上書自布衣擢監察御史以累左遷平遙尉復拜御史屢按獄如旨擢給事中夏官郎中侯味虛將兵討契丹不利妄言賊行有蛇虎導軍后惡其詭拜季昶爲河北道按察使季昶馳至軍斬味虛以聞威震北方棗城尉吳澤射殺驛使髡民女髮爲髡州不能劾季昶杖殺之然後布恩信甄表善良或傳季昶曩爲味虛笞辱故深文報怨自給事中數月爲御史中丞坐事左遷久乃入爲雍州長史遷文昌左丞爲洛州長史預誅易之等功進戶部侍郎五王失柄出季昶荊州長史貶儋州司馬初季昶與昭州首領周慶立廣州司馬光楚客不叶懼二怨不敢往歎曰吾至是邪卽具棺沐浴仰藥死葬昭州睿宗立詔贈左御史大夫同彥範等賜一子官季昶剛烈然喜入先語以爲實後雖有辨理不能得也而敦愛故舊禮有名士其長可蓋所缺云

楊元琰者字溫號州閩鄉人漢太尉震十八代孫生數歲未言相者視曰語遲者神定必爲重器及長秀眉美鬚髯崇肩博頤居父喪七日不食服除補梓州參軍平棘令課第一御史府表其政璽書褒厲再擢永寧軍副使忤用事者免



載初中爲安南副都護三徙爲荆府長史五遷州刺史咸有風績初張柬之代爲荊州共乘鱸江中私語外家革命元琰悲涕慷慨志在王室柬之執政故引爲右羽林將軍謂曰江上之言君叵忘之今可以勉乃與李多祚等定計斬二張進雲麾將軍封弘農郡公實封戶五百賜鐵券恕十死敬暉等爲武三思所構元琰知禍未已乃詭計請祝髮事浮屠悉還官封中宗不許暉聞尙戲曰胡頭應祝以多鬣似胡云元琰曰功成不退懼亡我不空言暉感之然已不及計暉等死獨元琰全再遷衛尉卿又上官封願追寵其親帝哀憐贈越州都督長史李多祚死太子難元琰坐厚善繫獄蕭至忠救之免睿宗立數上書乞骸骨不聽四遷刑部尙書封魏國公徙太子賓客詔設位東宮太子爲拜俄致仕開元六年卒年七十九諡曰忠生平無留蓄中外食其家常數十人臨終敕諸子薄葬

子仲昌字蔓以通經爲脩文生累調不甚顯以河陽尉對策玄宗擢第一授蒲州法曹參軍判入異等遷監察御史坐累爲孝義令鸞降庭樹太守蕭恕表其

政徙下邳終吏部郎中仲昌資長于吏常分父邑租振宗黨御身以約善與人交士樂從之游云

敬暉字仲曄絳州平陽人弱冠舉明經聖歷初爲衛州刺史是時河北經突厥所騷方秋而城暉曰金湯非粟不守豈有棄農畝事池隍哉縱民歸斂闔部賴安遷夏官侍郎出爲太州刺史改洛州長史武后幸長安爲副留守以治幹聞璽書勞之多賜物段長安二年授中臺右丞以誅二張功加金紫光祿大夫爲侍中平陽郡公實封五百戶進封齊國暉表請諸武王者宜悉降爵繇是皆爲公三思憤俄封平陽郡王加特進罷政事初易之已誅薛季昶請收諸武暉亦苦諫不從三思濁亂暉每椎坐悵恨彈指流血尋及貶又放瓊州爲周利貞所害睿宗時追復官爵又贈秦州都督諡曰肅愍

崔玄暉博陵安平人本名曄武后時有所避改焉少以學行稱叔父祕書少監行功器之舉明經爲高陵主簿居父喪盡禮廬有燕更巢共乳母廬有賢操常戒玄暉曰吾聞姨兄辛玄馭云子姓仕宦有言其貧窶不自存此善也若貲貨

盈衍惡也吾嘗以爲確論比見親表仕者務多財以奉親而親不究所從來必出于祿稟則善如其不然何異盜乎若今爲吏不能忠清無以戴天履地宜識吾意故玄暉所守以清白名母亡哀毀甘露降庭樹後以庫部員外郎累遷鳳閣舍人長安元年爲天官侍郎當公介然不受私謁執政忌之改文昌左丞不踰月武后曰卿向改職乃聞令史設齋相慶此欲肆其貪耳卿爲朕還舊官乃復拜天官侍郎厚賜綵物三年授鸞臺侍郎同鳳閣鸞臺平章事兼太子左庶子四年遷鳳閣侍郎先是酷吏誣籍數百家玄暉開陳其枉后感悟皆爲原洗宋璟劾張昌宗不軌事玄暉頗助璟及有司正昌宗罪而玄暉弟昇爲司刑少卿執論大辟兄弟守正如此后久疾宰相不召見者累月及少間玄暉奏言皇太子相王皆仁明孝友宜侍醫藥不宜引異姓出入禁闈后慰納以誅二張功爲中書令博陵郡公后遷上陽宮顧玄暉曰諸臣進皆因人而玄暉我所擢何至是對曰此正所以報陛下也俄拜博陵郡王罷政事冊其妻爲妃賜實封五百戶檢校益州大都督府長史知都督事會貶又流古州道病卒年六十九謚

曰文獻玄暉三世不異居家人怡怡如也貧寓郊墅羣從皆自遠會食無它爨與昇尤友愛族人貧孤者撫養教勵後雖秉權而子弟仕進不使踰常資當時稱重少頗屬辭晚以非己長不復構思專意經術子璩亦有文開元二年詔玄暉東之神龍之初保乂王室姦臣忌焉謫歿荒海流落變遷感激忠義宜以玄暉子璩東之孫恣並爲朝散大夫璩終禮部侍郎璩子渙

渙博綜經術長論議十歲居父喪毀辟加人陸元方異之起家亳州司功參軍還調於是入判者千餘吏部侍郎嚴挺之施特榻試彝尊銘謂曰子清廟器故以題相命累遷司門員外郎楊國忠惡不附己出爲巴西太守玄宗西狩迎謁于道帝見占奏以爲明治體恨得之晚房瑄亦薦之卽日拜門下侍郎同中書門下平章事肅宗立與韋見素等同赴行在時京師未復舉選不至詔渙爲江淮宣諭選補使收采遺逸不以親故自嫌常曰抑才虞謗吾不忍爲然聽受不甚精以不職罷爲左散騎常侍兼餘杭太守江東採訪防禦使入遷吏部侍郎集賢院待制簡淡自處時望尤重遷御史大夫元載輔政與中官董秀槃結固

寵渙疾之因進見慨然論載姦代宗曰載雖非重慎然協和中外無間然能臣也對曰和之爲貴者由禮節也不節之以禮焉得和今干戈甫定品物思乂載爲宰相宜明制度易海內耳目而怙權樹黨毀法爲通鬻恩爲恕附下苟容乃幽國卑主術臣所未喻帝默然會渙兼稅地青苗錢物使以錢給百官而吏用下直爲使料上直爲百司料載諷皇城副留守張清撻其非詔尙書左丞蔣渙按實且載所惡由是貶道州刺史卒贈太子太傅諡曰元子縱

縱絲協律郎三遷監察御史會詔擇令長授藍田令德化大行縣人立碑頌德渙之貶縱棄金部員外郎就養後爲汴西水陸運兩稅鹽鐵等使王師圍田悅乏食詔縱餉四節度糧軍無乏德宗出奉天方鎮兵未至縱勸李懷光奔命悉軍財稱所須懷光兵疲久戰次河中遷延不進縱以金帛先度曰濟者卽賜衆趨利爭西遂及奉天遷京兆尹上言懷光反覆不情宜備之及帝徙梁州追扈不及左右短縱素善懷光殆不來帝曰知縱者朕也非爾輩所及後數日至授御史大夫處大體不急細事獄訴付成僚屬而已自兵興內外官冗溢時議併

省縱奏兵未息仕進者多緒在官則累遷有功而褒賞不可廢也比選集乃據  
闕留人怨望滋結朝廷頻詔錄勞而諸道敘優日廣若停減吏員非但承優者  
無官可敘亦恐序進者無路勝置矣詔可貞元元年天子郊見爲大禮使歲旱  
用屈縱搏裁文物儉而不陋除吏部侍郎尋爲河南尹時兵雖定民彫耗縱治  
簡易蠲略細苛先是戍邊者道由洛儲餼取於民縱始令官辦使五家相保自  
占發斂以絕胥史之私又引伊洛漑高仰通利里閘人甚宜之入爲太常卿封  
常山縣公卒年六十二贈吏部尚書諡曰忠初渙爲元載所抑縱訖載世不求  
聞達渙有嬖妾縱以母事之妾剛酷雖縱顯官而數笞詬然率妻子候顏色承  
養不懈時以爲難孫碣

碣字東標及進士第遷右拾遺武宗方討澤潞碣建請納劉稹降忤旨貶鄧城  
令稍轉商州刺史擢河南尹右散騎常侍再爲河南尹邑有大賈王可久轉貨  
江湖間值龐勛亂盡亡其貲不得歸妻詣卜者楊乾夫咨在亡乾夫名善數而  
內悅妻色且利其富旣占陽驚曰乃夫殆不還矣卽陰以百金謝媒者誘聘之

妻乃嫁乾夫遂爲富人宅年徐州平可久困甚丐衣食歸閭里往見妻乾夫大怒詬逐之妻詣吏自言乾夫厚納賄可久反得罪再訴復坐誣可久恨歎遂失明碣之來可久陳冤碣得其情卽敕吏掩乾夫并前獄史下獄悉發賊姦一日殺之以妻還可久時淫潦獄決而霽都民相語歌舞于道徙陝號觀察使軍亂貶懷州司馬卒

張柬之字孟將襄州襄陽人少涉經史補太學生祭酒令狐德棻異其才便以王佐期之中進士第始調清源丞永昌元年以賢良召時年七十餘矣對策者千餘柬之爲第一授監察御史遷鳳閣舍人時突厥默啜有女請和親武后欲令武延秀娶之柬之奏古無天子取夷狄女者忤旨出爲合蜀二州刺史故事歲以兵五百戍姚州地險瘴到屯輒死柬之論其弊曰臣按姚州古哀牢國域土荒外山岨水深漢世未與中國通唐蒙開夜郎滇笮而哀牢不附東漢光武末始請內屬置永昌郡統之賦其鹽布氈罽以利中土其國西大秦南交趾奇珍之貢不闕劉備據蜀甲兵不充諸葛亮五月度瀘收其產入以益軍使張伯

岐選取勁兵以增武備故蜀志稱亮南征後國以富饒此前世置郡以其利之也今鹽布之稅不供珍奇之貢不入戈戟之用不實於戎行寶貨之資不輸於大國而空竭府庫驅率平人受役蠻夷肝腦塗地臣竊爲陛下惜之昔漢歷博南山涉蘭倉水更置博南哀牢二縣蜀人愁苦行者作歌曰歷博南越蘭津度蘭倉爲他人蓋譏其貪珍奇之利而爲蠻夷所驅役也漢獲其利人且怨歌今減耗國儲費調日引使陛下赤子身膏野草骸骨不歸老母幼子哀號望祭於千里之外朝廷無絲髮利而百姓蒙終身之酷臣竊爲國家痛之往諸葛亮破南中卽用渠率統之不置漢官不留戍兵言置官留兵有三不易置官必夷漢雜居猜嫌將起留兵轉糧爲患滋重後忽反叛勞費必甚故粗設綱紀自然久定臣謂亮之策誠盡羈縻蠻夷之要今姚州官屬旣無固邊厭寇之心又無亮且縱且擒之伎唯詭謀狡算恣情割剝扇動酋渠遣成朋黨折支詔笑取媚蠻夷拜跪趨伏無復爲恥提挈子弟嘯引凶愚聚會蒲博一擲累萬凡逋逃亡命在彼州者戶贏二千專事剽奪且姚州本龍朔中武陵王簿石子仁奏置其後



長史李孝讓辛文協死於羣蠻詔遣郎將趙武貴討擊兵無噍類又以將軍李義總繼往而郎將劉惠基戰死其州遂廢臣竊以亮有三不易其言卒驗垂拱中蠻郎將王善寶昆州刺史爨乾福復請置州言課稅自支不旁取於蜀及置州掾李稜爲蠻所殺延載中司馬成琛更置瀘南七鎮戍以蜀兵蜀始擾矣且姚府總管五十七州間皆巨猾游客國家設官所以正俗防姦而無恥之吏敗謬至此今劫害未止恐驚擾之禍日滋宜罷姚州隸嶠府歲時朝覲同蕃國廢瀘南諸鎮而設關瀘北非命使不許交通增舊屯兵擇清良吏以統之臣愚以爲便疏奏不納俄爲荊州大都督府長史長安中武后謂狄仁傑曰安得一奇士用之仁傑曰陛下求文章資歷今宰相李嶠蘇味道足矣豈文士齷齪不足與成天下務哉后曰然仁傑曰荊州長史張柬之雖老宰相材也用之必盡節於國卽召爲洛州司馬宅曰又求人仁傑曰臣嘗薦張柬之未用也后曰遷之矣曰臣薦宰相而爲司馬非用也乃授司刑少卿遷秋官侍郎後姚崇爲靈武軍使將行后詔舉外司可爲相者崇曰張柬之沈厚有謀能斷大事其人老惟

亟用之卽日召見拜同鳳閣鸞臺平章事進鳳閣侍郎誅二張也東之首發其謀以功擢天官尚書同鳳閣鸞臺三品漢陽郡公實封五百戶不半歲以漢陽郡王加特進罷政事東之旣失權願還襄州養疾乃授襄州刺史中宗爲賦詩祖道又詔羣臣餞定鼎門外至州持下以法雖親舊無所縱貸會漢水漲齧城郭東之因壘爲隄以遏湍怒闔境賴之又懇辭王爵不許俄及貶又流瀧所憂憤卒年八十二景雲元年贈中書令謚曰文貞授一子官東之剛直不傅會然邃於學論次書數十篇子愿漪愿仕至襄州刺史漪以著作佐郎侍父襄陽恃其家立功簡接鄉人鄉人怨之初易之等誅後中宗猶監國告武氏廟而天久陰不霽侍御史崔渾奏陛下復國當正唐家位號稱天下心奈何尙告武氏廟請毀之復唐宗廟帝嘉納是日詔書下霽翳澄駭咸以爲天人之應

袁恕己滄州東光人仕累司刑少卿知相王府司馬與誅二張又從相王統南衙兵備非常以功加銀青光祿大夫中書侍郎同中書門下三品封南陽郡公實封五百戶將作少匠楊務廉者以工巧進恕己恐其復啓游娛侈麗之漸言

於中宗曰務廉位九卿忠言嘉謨不聞而專事營構以媚上不斥之亡以昭德  
乃授陵州刺史未幾拜中書令特進南陽郡王罷政事例及貶又流環州爲周  
利貞所逼恕己素餌黃金至是飲野葛數升不死憤懣抔土以食爪甲盡不能  
絕乃擊殺之諡曰貞烈孫高

高字公頤少慷慨有節尙擢進士第代宗時累遷給事中建中中拜京畿觀察  
使坐累貶韶州刺史復拜給事中德宗將起盧杞爲饒州刺史高當草詔見宰  
相盧翰劉從一曰杞當國矯誣陰賊斥忠誼傲明德反易天常使宗祏失守天  
下疣瘡朝廷不實以法才示貶黜今還授大州天下其謂何翰等不悅命舍人  
作詔詔出高執不下奏曰陛下用杞爲相出入三年附下罔上使陛下越在草  
莽羣臣願食其肉且不厭漢法三光不明雨旱不時皆宰相請罪小者免大者  
戮杞罪萬誅陛下赦不誅止貶新州俄又內移今復拜刺史誠失天下望帝曰  
杞不逮是朕之過朕已再赦答曰杞天資詭險非不逮彼固所餘赦者止赦其  
罪不宜授刺史願問外廷并敕中人聽於民若億兆異臣之言臣請前死諫官

亦力爭帝前帝曰與上佐可乎羣臣奉詔翌日遣使慰高曰朕惟卿言切至已如奏太子少保韋倫曰高言勁挺自是陛下下一良臣宜加優禮貞元二年帝以大盜後關輔百姓貧田多荒蕪詔諸道上耕牛委京兆府勸課量地給牛不滿五十畝不給高以爲聖心所憂乃在窮乏今田不及五十畝卽是窮人請兩戶共給一牛從之卒年六十中外悵惜憲宗時李吉甫言其忠饗特贈禮部尙書文宗開成三年又詔玄暉曾孫郢爲監察御史暉曾孫元膺河南丞東之四世孫憬壽安尉恕己曾孫德文校書郎始帝訪御史中丞狄兼善以仁傑功且言五王遺烈乃求其後秩以官唯彥範後無聞云

贊曰五王提衛兵誅嬖臣中興唐室不淹辰天下晏然其謀深矣至謂中宗爲英王不盡誅諸武使天子藉以爲威何其淺耶釁牙一啓爲豔后豎兒所乘劫持戮辱若放豚然何哉無亦神奪其明厚韋氏毒以興先天之業乎不然安李之功賢於漢平勃遠矣

唐書卷一百二十考證

敬暉傳絳州平陽人○舊書絳州太平人考地理志絳州領縣有太平無平陽

當從舊書

長安二年授中臺右丞○舊書作長安三年

崔玄暉傳賜實封五百戶○舊書作四百戶

袁恕己孫高坐累貶韶州刺史○舊書失旨貶韶州長史

唐書卷一百二十考證



唐書卷一百二十一

宋 端 明 殿 學 士 宋 祁 撰

列傳第四十六

劉鍾崔二王

劉幽求冀州武彊人聖曆中舉制科中第調閬中尉刺史不禮棄官去久之授朝邑尉桓彥範等誅張易之昌宗而不殺武三思幽求謂彥範曰公等無葬地矣不早計後且噬臍不從既五王皆爲三思橫死臨淄王入誅韋庶人預參大策是夜號令詔敕一出其手以功授中書舍人參知機務爵中山縣男實封二百戶授二子五品官二代俱贈刺史睿宗立進尚書右丞徐國公增封戶至五百賜物千段奴婢二十人第一區良田千畝金銀雜物稱是景雲二年以戶部尚書罷政事不旬月遷吏部拜侍中璽詔曰頃王室不造中宗厭代威孽專亂將隕社稷朕與王公皆幾于難幽求處危思奮翊贊聖儲協和義士震殄元惡國家之復存繫幽求是賴厥庸茂焉朕用嘉之雖胙以土宇而賦入未廣昔西

漢行封更擇多戶東京定賞復增大邑宜加賜實封二百戶子子孫傳國無  
絕特免十死銘諸鐵券以傳其功先天元年爲尙書右僕射同中書門下三品  
監脩國史幽求自謂有勞于國在諸臣右意望未滿而竇懷貞爲左僕射崔湜  
爲中書令殊不平見於言面已而湜等附太平公主有逆計幽求與右羽林將  
軍張暉定計使暉說玄宗曰湜等皆太平黨與日夜陰計若不早圖且產大害  
太上不得高枕矣臣請督羽林兵除之帝許之未發也而暉漏言於侍御史鄧  
光賓帝懼卽列其狀睿宗以幽求等屬吏劾奏以疎間親罪應死帝密申右之  
乃流幽求於封州暉於峰州光賓於繡州明年太平公主誅卽日召復舊官知  
軍國事還封戶賜錦衣一襲開元初進尙書左丞相兼黃門監俄以太子少保  
罷姚崇素忌之奏幽求鬱快散職有怨言詔有司鞠治宰相盧懷慎等奏言幽  
求輕肆不恭失大臣體乖崖分之節翌日貶睦州刺史削實封戶六百遷杭郴  
二州恚憤卒于道年六十一贈禮部尙書諡曰文獻六年詔與蘇瓌配享睿宗  
廟廷建中中追贈司徒



鍾紹京虔州贛人初爲司農錄事以善書直鳳閣武后時署諸宮殿明堂及銘九鼎皆其筆也景龍中爲苑總監會討韋氏難紹京帥戶奴丁夫從事平夜拜中書侍郎參知機務明日進中書令越國公實封五百戶賚賜與劉幽求等既當路以賞罰自肆當時惡之因上疏讓官睿宗用薛稷謀進戶部尙書出爲彭州刺史玄宗卽位復拜戶部尙書增實封改太子詹事不爲姚崇所喜與幽求並以怨望得罪貶果州刺史賜封邑百戶後坐它事貶懷恩尉悉奪階封再遷温州別駕十五年入朝見帝泣曰陛下忘疇日事邪忍使棄死草莽且同時立功者今骨已朽而獨臣在陛下不垂愍乎帝惻然卽日授太子右諭德久之還少詹事年踰八十以官壽卒紹京嗜書畫如王羲之獻之褚遂良真跡藏家者至數十百卷建中中追贈太子太傅

崔日用滑州靈昌人擢進士第爲芮城尉大足元年武后幸長安陝州刺史宗楚客委以頓峙饋獻豐甘稱過賓使者楚客歎其能亟薦之擢爲新豐尉遷監察御史陰附安樂公主得稍遷神龍中鄭普思納女後宮日用劾奏中宗初不

省廷爭切至普思由是得罪時諸武若三思延秀及楚客等權寵交煽日用多所結納驟拜兵部侍郎宴內殿酒酣起爲回波舞求學士卽詔兼脩文館學士帝崩韋后專制畏禍及更因僧普潤道士王曄私謁臨淄王以自託且密贊大計王曰謀非計身直紓親難爾日用曰至孝動天舉無不克然利先發不則有後憂及韋氏平夜詔權雍州長史以功授黃門侍郎參知機務封齊國公賜實戶二百坐與薛稷相忿競罷政事爲婺州長史歷揚汴兗三州刺史由荊州長史入奏計因言太平公主逆節有萌陛下往以官府討有罪臣子勢須謀與力今據大位一下制書定矣帝曰畏驚太上皇奈何日用曰庶人之孝承順顏色天子之孝惟安國家定社稷若令姦宄竊發以亡大業可謂孝乎請先安北軍而後捕逆黨於太上皇固無所驚帝納之及討逆詔權檢校雍州長史以功益封二百戶進吏部尚書會帝誕日日用采詩大小雅二十篇及司馬相如封禪書獻之借以諷諭且勸告成事有詔賜衣一副物五十段以示無言不酬之義久之坐兄累出爲常州刺史後以例減封戶三百徙汝州開元七年詔曰唐元

之際日用實贊大謀功多不宜減封復食二百戶徙并州長史卒年五十并人懷其惠吏民數百皆縞服送喪贈吏部尚書諡曰昭再贈荊州大都督日用才辯絕人而敏于事能乘機反禍取富貴先天後求復相然亦不獲也嘗謂人曰吾平生所事皆適時制變不專始謀然每一反思若芒刺在背云子宗之襲封亦好學寬博有風檢與李白杜甫以文相知者日用從父兄日知字子駿少孤貧力學以明經進至兵部員外郎與張說同爲魏元忠朔方判官以健吏稱遷洛州司馬會譙王重福之變官司逃日知獨率吏卒助屯營擊賊以功加銀青光祿大夫遷殿中少監建言廢馬多請分牧隴右省關畿芻調授荊州長史四遷京兆尹封安平縣侯坐贓爲御史李如璧所劾貶歙縣丞後歷殿中監進中山郡公說執政薦爲御史大夫帝不許遂爲左羽林大將軍而自用崔隱甫隱甫繇是怨說日知俄授太常卿自以處朝廷久每入謁必與尚書齒時謂尚書裏行終潞州長史諡曰襄

王琚懷州河內人少孤敏悟有才略用天文象緯以從父隱客嘗爲鳳閣侍郎

故數與貴近交時年甫冠見駙馬都尉王同皎同皎器之會謀刺武三思琚義其爲卽與周璟張仲之等共計事洩亡命自傭於揚州富商家識非庸人以女嫁之厚給以貲琚亦賴以濟睿宗立琚自言本末主人厚齎使還長安玄宗爲太子間游獵韋杜間怠休樹下琚以儒服見且請過家太子許之至所廬乃蕭然窶陋坐久殺牛進酒殊豐厚太子駭異自是每到韋杜輒止其廬初太子在潞州襄城張暉爲銅鞮令性豪殖喜賓客弋獵事厚奉太子數集其家山東倡人趙元禮有女善歌舞得幸太子止暉第其後生子瑛者也太子已平內難召暉拜宮門郎與姜皎崔滌李令問王守一薛伯陽等並侍左右令問累擢殿中少監守一太僕少卿此數人以東宮皆勢重天下琚是時方補諸暨縣主簿過謝東宮至廷中徐行高視侍衛呵止曰太子在琚怒曰在外惟聞太平公主不聞有太子太子本有功於社稷孝於君親安得此聲太子遽召見琚曰韋氏躬行殺逆天下動搖人思李氏故殿下取之易也今天下已定太平專思立功左右大臣多爲其用天子以元妹能忍其過臣竊爲殿下寒心太子命坐且泣曰

計將安便瑒曰昔漢蓋主供養昭帝其後與上官桀謀殺霍光不及天子而帝猶以大義去之今太子功定天下公主乃敢妄圖大臣樹黨有廢立意太子誠召張說劉幽求郭元振等計之憂可紓也太子曰先生何以自隱而日與寡人游瑒曰臣善丹沙且工諧隱願比優人太子喜恨相知晚翌日授詹事府司直內供奉兼崇文學士日以諸王及姜皎等入侍獨瑒常豫祕謀不踰月遷太子舍人兼諫議大夫太子受內禪擢中書侍郎公主謀益甚幽求暉謀先事誅之侍御史鄧光賓漏謀不克皆得罪久之瑒見事迫請帝決策先天二年七月乃與岐王薛王姜皎李令問王毛仲王守一以鐵騎至承天門太上皇聞外譁謀召郭元振升承天樓閉關以拒俄而侍御史任知古召募數百人於朝堂不得入少選瑒從帝至樓下誅蕭至忠岑羲竇懷貞斬常元楷李慈北闕下賈膺福李猷於內客省事平瑒進戶部尚書封趙國公皎工部尚書楚國公毛仲輔國大將軍霍國公守一太常卿晉國公各食實戶五百令問殿中監宋國公實戶三百瑒皎令問辭不就以舊官增戶二百於是帝召燕內殿賜金銀雜帛皆一

牀帛二千第一區帝於琚眷委特異豫大政事時號內宰相每見閣中視日薄乃得出遇休日使者至第召之而皇后亦使尚宮勞琚母賜賚接足羣臣不能無望或說帝曰王琚麻嗣宗皆譎詭縱橫可與履危不可與共安方天下已定宜益求純樸經術士以自輔帝悟稍疏之俄拜御史大夫持節巡天兵以北諸軍改紫微侍郎道未至拜澤州刺史削封戶百歷九刺史復封戶又改六州二郡琚自以立勳至天寶時爲舊臣性豪侈其處方面去故就新受饋遺至數百萬侍兒數十寶帳備具闔門三百口旣失志稍自放不能遵法度在州與官屬小史會豪飲謔擣博藏鉤爲樂每徙官車馬數里不絕從賓客女伎馳弋凡四十年李邕故與琚善皆華省外遷書疏往復以譴謫留落爲慊右相李林甫恨琚恃功使氣欲除之使人劾發琚宿贓削封階貶江華員外司馬又使羅希奭深按其罪琚懼仰藥未及死希奭縊之時人哀其無罪始琚爲中書侍郎母居洛陽來京師讓琚曰爾家上世皆州縣職今汝無攻城野戰勞以詔佞取容海內切齒吾恐汝家墳墓無人復掃除也琚卒不免寶應元年贈太子少保太平

之誅張曄召還爲大理卿封鄧國公實封戶三百進京兆尹入侍宴樂出主京邑時人以爲寵然自以幹治稱累遷太子詹事判尚書左右丞再爲羽林大將軍三至左金吾大將軍以年高加特進子履冰季良弟晤仕皆清近曄嘗還鄉上冢帝賜詩及錦袍繒綵乘驛就道子弟車馬聯咽使者賜賚敕州縣供饌居處尊顯天保五載卒年九十贈開府儀同三司履冰歷金吾將軍季良殿中監俱列棨戟

王毛仲高麗人父坐事沒爲官奴生毛仲故長事臨淄王王出潞州有李守德者爲人奴善騎射王市得之並侍左右而毛仲爲明悟景龍中王還長安二人常負房艣以從王數引萬騎帥長及豪俊賜飲食金帛得其驩心毛仲曉旨亦布誠結納王嘉之韋后稱制令韋播高嵩爲羽林將軍押萬騎以苛峭樹威果毅葛福順陳玄禮訴於王王方與劉幽求薛崇簡及利仁府折衝麻嗣宗謀舉大計幽求諷之皆願効死遂入討韋氏守德從帝止苑中而毛仲匿不出事定數日乃還不之責例擢將軍王爲皇太子以毛仲知東宮馬駝鷹狗等坊不旬

歲至大將軍階三品與誅蕭至忠等以功進輔國大將軍檢校內外閑廐知監牧使進封霍國公實封戶五百與諸王及姜皎等侍禁中至連榻而坐帝暫不見惘惘若有失見則釋然開元九年詔持節爲朔方道防禦討擊大使與左領軍大總管王峻天兵軍節度使張說幽州節度使裴佑先等數計事毛仲始見飾擢頗持法不避權貴爲可喜事兩營萬騎及閑廐官吏憚之無敢犯雖官田草萊樵斂不敢欺於牧事尤力婉息不訾初監馬二十四萬後乃至四十三萬牛羊皆數倍蒔苜麥苜菑千九百頃以禦冬市死畜售絹八萬募嚴道僮千口爲牧圉檢勒芻菽無漏隱歲贏數萬石從帝東封取牧馬數萬匹每色一隊相間如錦繡天子才之還加開府儀同三司自開元後唯王仁皎姚崇宋璟及毛仲得之然資小人志旣滿不能無驕遂求爲兵部尙書帝不悅毛仲鞅鞅又與葛福順爲姻家而守德及左監門將軍盧龍子唐地文左右威衛將軍王景耀高廣濟數十人與毛仲相倚杖爲姦毛仲恃舊最不法中使至其家稱詔毛仲不甚恭位卑者或踞見迕意卽侮諱以氣凌之直出其上高力士楊思勳等



銜之毛仲有兩妻其一上所賜皆有國色嘗生子帝命力士就賜仍授子五品官還問曰毛仲喜乎力士奏毛仲熟視臣曰是子亦何辱三品官帝怒曰前毛仲負我未嘗爲意今以嬰兒顧云云力士等知帝怒宅日從容曰北門奴官皆毛仲所與不除之必起大患後毛仲移書太原索甲仗少尹嚴挺之以聞帝恐毛仲遂亂匿其狀十九年有詔貶灤州福順壁州守德嚴州盧龍子唐地文振州王景耀黨州高廣濟道州並爲別駕員外置毛仲四子悉奪官貶惡地緣坐數十人有詔縊毛仲於零陵守德本名宜得立功乃改今名位武衛將軍嘗遇故主於道主走避守德命左右迎之至第親上食奉酒主流汗不敢當數日入奏曰臣蒙國恩過分而故主無寸祿請解官授之帝嘉其志擢爲郎將陳玄禮宿衛宮禁以淳篤自檢帝嘗欲幸號國夫人第諫曰未宣敕不可輕去就帝爲止後在華清宮正月望夜帝將出遊復諫曰宮外曠野無備豫陛下必出遊願歸城闕帝不能奪安祿山反謀誅楊國忠闕下不克至馬嵬卒誅之從入蜀還封蔡國公及李輔國遷帝西內玄禮以老卒

贊曰幽求之謀紹京之果日用之智琚之辯皆足濟危紓難方多故時必資以成功者也雄邁之才不用其奇則厭然不滿誠不可與共治乎哉姚崇勸不用功臣宜矣然待幽求等恨太薄云毛仲小人志得而驕不足論已

唐書卷一百二十一

唐書卷一百二十二

宋 端 明 殿 學 士 宋 祁 撰

列傳第四十七

魏章郭

魏元忠宋州宋城人爲太學生跌蕩少檢久不調整屋人江融曉兵術元忠從之游盡傳所學儀鳳中吐蕃數盜邊元忠上封事洛陽宮言命將用兵之要曰天下之柄有二文武而已至制勝御人其道一也今言武者先騎射不稽之權略言文者首篇章不取之經綸臣觀魏晉齊梁才固不乏然何益治亂哉養由基射能穿札不止鄢陵之奔陸機識能辨亡無救河橋之敗斷可見已夫才生於世世實須才何世而不生才何才而不資世故物有不求未有無物之歲士有不用未有無士之時也志士在富貴與賤貧皆思立功名以傳于後然知己難而所遇罕士之懷琬琰就煨塵抱棟幹困溝壑者悠悠之人直覩此士之貧賤安知其方略哉故漢拜韓信舉軍驚笑蜀用魏延羣臣缺望此富貴者易爲

善貧賤者難爲功也昔漢文帝不知魏尚賢而囚之知李廣才而不用乃歎其生不逢時夫以廣之才天下無雙時方歲事匈奴而卒不任故近不知尚廣之賢而遠想廉頗李牧馮唐是以知其有而不能用也此身爲時主所知不得盡其才也晉羊祜謀舉吳賈充荀勗沮之祜歎曰天下事不如意十常七八以二人不同終不大舉此據立功之地而不獲展其志也布衣之人懷奇抱策而望朝奏夕召豈易得哉臣願歷訪文武五品以上得無有智如羊祜武如李廣而不得騁其才者乎使各言其志毋令久失職又言人無常俗政有治亂軍無常勝將有能否兵爲王者大事存亡繫焉將非其任則殄人敗國齊段孝玄有言持大兵如擎盤水一致蹉跌求止可得哉周亞夫堅壁以挫吳楚司馬懿閉營而困諸葛亮此皆全軍制勝不戰而卻敵是知大將臨戎以智爲本今之用人類將家子或死事孤兒進非幹略雖竭力盡誠不免於傾敗若之何用之且建功者言其所濟不言所來言其所能不言所藉若陳湯呂蒙馬隆孟觀悉出貧賤而勳伐甚高不聞其家世將帥也故陰陽不和握土爲相鬻貂不廷擢校爲

將今以四海之廣億兆之衆豈無卓越之士臣恐未之思乎又賞者禮之基罰者刑之本禮崇則謀夫竭其能實厚則義士輕其死刑正故君子勗其心罰重則小人懲其過賞罰者軍國之綱紀政教之藥石吐蕃本非疆敵而薛仁貴郭待封至棄甲喪師脫身以免國家寬政罪止削除網漏吞舟何以過此雖陛下顧收後効然朝廷所少豈此一二人乎夫賞不勸謂之止善罰不懲謂之縱惡臣誠疏賤干非其事豈欲間陛下君臣生薄厚哉正以刑賞一虧百年不復故國無賞罰雖堯舜不能爲今罰旣不行賞復難信故議者皆謂比日征行虛立賞格而無其實蓋忘大體之臣恐資勳庸竭府庫留意錐刀以爲益國所謂惜毫釐失千里者也且黔首雖微不可以欺安有寓不信之令設虛賞之格乎自蘇定方平遼東李勣破平壤賞旣不行勳亦淹廢歲月紛淆真僞相錯臣以吏不奉法慢自京師僞勳所由主司過也其則不遠近在尙書省中然未聞斬一臺郎戮一令史使天下知之陛下何照遠而不照近哉神州化首文昌政本治亂攸在臣故冒死而言夫明鑑所以照形往事所以知今臣請借近以爲諭貞

觀中萬年尉司馬玄景舞文飾智以邀乾沒太宗棄之都市後征高麗總管張君又不進擊賊斬之旗下臣以爲僞勳之罪多於玄景仁貴等敗重於君又使早誅之則諸將豈復有負哉慈父多敗子嚴家無格虜且人主病不廣大人臣病不節儉臣恐陛下病之於不廣大過在於慈父斯日月一蝕也又今將吏貪暴所務口馬財利臣恐戎狄之平未可旦夕望也凡人識不經遠皆言吐蕃戰前隊盡後隊方進甲堅騎多而山有氛瘴官軍遠入前無所獲不積穀數百萬無大舉之資臣以爲吐蕃之望中國猶孤星之對太陽有自然之大小不疑之明暗夷狄雖禽獸亦知愛其性命豈肯前盡死而後進哉由殘迫其人非下所願也必其戰不顧死則兵法許敵能鬪當以知算取之何憂不克哉向使將能殺敵橫只蔽野斂其頭顱以爲京觀則此虜聞官軍鐘鼓望塵卻走何暇前隊皆死哉自仁貴等覆師喪氣故虜得跳梁山谷又師行必藉馬力不數十萬不足與虜爭臣請天下自王公及齊人挂藉之口人稅百錢又弛天下馬禁使民得乘大馬不爲數限官籍其凡勿使得隱不三年人間畜馬可五十萬卽詔州

縣以所稅口錢市之若王師大舉一朝可用且虜以騎爲彊若一切使人乘之則市取其良以益中國使得漸耗虜兵之盛國家之利也高宗善之授祕書省正字直中書省仗內供奉遷監察御史帝嘗從容曰外以朕爲何如主對曰周成康漢文景也然則有遺恨乎曰有之王義方一世豪英而死草萊議者謂陛下不能用賢帝曰我適用之聞其死顧已無及元忠曰劉藏器行副於才陛下所知今七十爲尙書郎徒歎彼而又棄此帝默然慚遷殿中侍御史徐敬業舉兵詔元忠監李孝逸軍至臨淮而偏將雷仁智爲賊敗孝逸懼其鋒按兵未敢前元忠曰公以宗室將天下安危繫焉海內承平久聞狂狡竊發皆傾耳翹心以待其誅今軍不進使遠近解情萬有一朝廷以他將代公且何辭孝逸然之乃部分進討時敬業保下阿谿第敬猷屯淮陰咸請先擊下阿下阿敗淮陰自破今淮陰急敬業必救是敵在腹背也元忠曰不然賊勁兵盡守下阿利在一決苟有負則大事去矣敬猷博徒不知戰且其兵寡易搖大軍臨之勢宜克敬業畏直擣江都必將邀我中路吾今乘勝進又以逸擊勞破之必矣譬之逐獸

弱者先禽今捨必禽之弱而趨難敵之彊非計也孝逸乃引兵擊淮陰敬猷脫身遁遂進擊敬業平之還授司刑正遷洛陽令陷周興獄當死以平揚楚功得流歲餘爲御史中丞復爲來俊臣所構將就刑神色不動前死者宗室子三十餘尸相枕藉於前元忠顧曰大丈夫行居此矣俄敕鳳閣舍人王隱客馳騎免死傳聲及于市諸囚歡叫元忠獨堅坐左右命起元忠曰未知實否旣而隱客至宣詔已乃徐謝亦不改容流費州復爲中丞歲餘陷侯思止獄仍放嶺南酷吏誅人多訟元忠者乃召復舊官因侍宴武后曰卿累負謗鑠何耶對曰臣猶鹿也羅織之吏如獵者苟須臣肉爲之羹耳彼將殺臣以求進臣顧何辜聖曆二年爲鳳閣侍郎同鳳閣鸞臺平章事俄檢校并州長史天兵軍大總管以備突厥遷左肅政臺御史大夫兼檢校洛州長史治號威明張易之家奴暴百姓橫甚元忠笞殺之權豪憚服俄爲隴右諸軍大使以討吐蕃又爲靈武道行軍大總管禦突厥元忠馭軍持重雖無赫然功而亦未嘗敗中宗在東宮爲檢校左庶子時二張勢傾朝廷元忠嘗奏曰臣承先帝之顧且受陛下厚恩不能徇



忠使小人在君側臣之罪也易之等恨怒因武后不豫卽共譖元忠與司禮丞高戩謀挾太子爲耐久朋遂下制獄詔皇太子相王及宰相引元忠等辨於廷不能決昌宗乃引張說爲證說初僞許之至是迫使言狀不應后又促之說曰臣不聞也易之等遽曰說與同逆說曩嘗謂元忠爲伊周夫伊尹放太甲周公攝王位此反狀明甚說曰易之昌宗安知伊周臣乃能知之伊尹周公歷古以爲忠臣陛下不遣學伊周將何効焉說又曰臣知附易之朝夕可宰相從元忠則族滅今不敢面欺懼元忠之寃后寤其讒然重違易之故貶元忠高要尉中宗復位召爲衛尉卿同中書門下三品不閱旬遷兵部尙書進侍中武后崩帝居喪軍國事委元忠裁可拜中書令封齊國公神龍二年爲尙書右僕射知兵部尙書當朝用事羣臣莫敢望謁告上冢詔宰相諸司長官祖道上東門賜錦袍給千騎四人侍賜銀千兩元忠到家於親戚無所賑施及還帝爲幸白馬寺迎勞之安樂公主私請廢太子求爲皇太女帝以問元忠元忠曰公主而爲皇太女駙馬都尉當何名主恚曰山東木彊安知禮阿母子尙爲天子我何嫌宮

中謂武后爲阿母子故主稱之元忠固稱不可自是語塞武三思用事京兆韋月將渤海高軫上書言其惡帝撈殺之後莫敢言王同皎謀誅三思不克反被族元忠居其間依違無所建明初元忠相武后有清正名至是輔政天下傾望冀幹正王室而稍憚權幸不能賞善罰惡譽望大減陳郡男子袁楚客者以書規之曰今皇帝新服厥德任官惟賢才左右惟其人因以布大化充古誼以正天下君侯安得事循默哉苟利社稷專之可也夫安天下者先正其本本正則天下固國之興亡繫焉太子天下本譬之大樹無本則枝葉零悴國無太子朝野不安儲君有次及之勢故師保教以君人之道用蘊崇其德所以重天下也今皇子旣長未定嫡嗣是天下無本天下無本猶樹而亡根枝葉何以存乎願君侯以清宴之間言於上擇賢而立之此安天下之道曠而不置此朝廷一失也女有內則男有外傳豈相濫哉幕府者丈夫之職今公主並開府置吏以女處男職所謂長陰抑陽也而望陰陽不愆風雨時若得乎此朝廷二失也今度人旣多緇衣半道不本行業專以重寶附權門皆有定直昔之賣官錢入公府

今之賣度錢入私家以茲入道徒爲游食此朝廷三失也唯名與器不可以假人故曰天工人其代之夫代天非材不可也代非其人必失天意失天意而無患禍未之有也今倡優之輩因耳目之好遂授以官非輕朝廷亂正法邪人君無私私怒害物私賞費財況私人以官乎此朝廷四失也賢者邦家之光任之致治棄之生亂近詔博求多士雖有好賢之名無得賢之實蓋有司選士非賄卽勢上失天心下違人望非爲官擇吏乃爲人擇官葛洪有言舉秀才不知書察孝廉濁如泥高第賢良各如繩此朝廷五失也閹豎者給宮掖掃除事古以奴隸畜之中古以來大道乖喪疏賢哲親近習乃委之以事授之以權故豎刁亂齊伊戾敗宋君側之人衆所畏懼所謂鷹頭之蠅廟垣之鼠者也後漢時用事尤甚晚節卒亂天下今大君中興獨有閹豎坐升班秩旣無正闕率授員外乃盈千人縮青紫耗府藏前事之驗後事之師此朝廷六失也古者茅茨採椽以儉約遺子孫所以愛力也今公主所賞傾庫府所造皆官供其疏築臺沼崇峙觀廡山無本石木無近產造之終歲功用不絕夫爲君所以養人非以害人

今外戚不助養而反害之是使人主受謗天下此朝廷七失也官以安人非以  
害于人也先王欲人治必選材欲人安必省事此誠同天下憂也人有樂君共  
之君有樂人慶之可謂同樂矣如此則上下無間而均一體也今天下困窮州  
牧縣宰非以選進割剝自私人不聊生是有憂而上不卹也而更員外置官  
非助桀歟夫人情自以員外吏恐下不己畏也必峻法懼之恐財不己奉也必  
枉道奪之欲不亂可得哉古語有之十羊九牧羊既不得食人亦不得息書曰  
官不必備惟其人此言正員猶難其備況員之外乎此朝廷八失也政出多門  
大亂之漸近也數夫人皆先帝宮嬪以爲備內職則不當知外不備內職則自  
可處外而令山入禁掖使內言必出外言必入固將弄君之法縱而不禁非所  
以重宗廟固國家孔子曰彼婦之口可以出走彼婦之謁可以死敗此朝廷九  
失也不以道重其君者所以危天下也危天下之臣不可不逐安天下之臣不  
可不任今有引鬼神執左道以惑主者託鬼神爲難知故致其詐而據非才之  
地食非德之祿此國盜也傳曰國將興聽於人將亡聽於神今幾聽於神乎此

朝廷十失也君侯不正誰與正之元忠得書益慚以三思權專思有以誅之會節愍太子起兵與聞其謀太子已誅三思引兵走闕下元忠子太僕少卿昇遇於永安門太子脅使從戰已而被殺議者未辨逆順元忠誦言曰旣誅賊謝天下雖死鼎鑊所甘心惟皇太子沒爲恨耳帝以其嘗有功且爲高宗武后素所禮置不問宗楚客紀處訥大怒固請夷其族不聽元忠不自安上政事及國封詔以特進齊國公致仕朝朔望楚客等引右衛郎將姚廷筠爲御史中丞暴奏反狀繇是貶渠州司馬楊再思李嶠皆希順楚客傳致元忠罪唯蕭至忠議當申宥之楚客復遣再思與冉祖雍奏元忠緣逆不宜處內地監察御史袁守一固請行誅遂貶務川尉守一又劾天后嘗不豫狄仁傑請陛下監國元忠止之此其逆久萌帝謂楊再思曰守一非是事君者一其心豈有上少疾遽異論哉朕未見元忠過也元忠至涪陵卒年七十餘景龍四年贈尚書左僕射齊國公本州刺史睿宗詔陪葬定陵以實封一百五十戶賜其子冕開元六年諡曰貞元忠始名真宰以諸生見高宗高宗慰遣不知謝卽出儀舉自安帝日送謂薛

元超曰是子未習朝廷儀然名不虛謂真宰相也避武后母諱改今名

韋安石京兆萬年人曾祖孝寬爲周大司空鄭國公祖津隋大業末爲民部侍郎與元文都等留守洛拒李密戰上東門爲密禽後王世充殺文都而津獨免密敗復歸洛世充平高祖素與津善授諫議大夫檢校黃門侍郎陵州刺史卒父琬仕爲成州刺史安石舉明經調乾封尉雍州長史蘇良嗣器之永昌元年遷雍州司兵參軍良嗣當國謂安石曰大才當大用往勞州縣可乎薦于武后擢膳部員外郎遷并州司馬有善政后手制勞問陟拜德鄭二州刺史安石性方重不苟言笑其政尙清嚴吏民尊畏久視中遷文昌右丞以鸞臺侍郎同鳳閣鸞臺平章事兼太子左庶子仍侍讀尋知納言事時二張及武三思寵橫安石數折辱之會侍宴殿中易之引蜀商宋霸子等博塞后前安石跪奏商等賤類不當戲殿上顧左右引出坐皆失色后以安石辭正改容慰勉鳳閣侍郎陸元方自以爲不及退告人曰韋公真宰相后嘗幸興泰宮議趨疾道安石曰此道板築所成非自然之固千金子且誠垂堂况萬乘可輕乘危哉后爲回輦長

安二年同鳳閣鸞臺三品俄又知納言檢校揚州大軍督府長史神龍元年罷政事俄復同三品遷中書令兼相王府長史封鄖國公賜封三百戶加特進爲侍中中宗與韋后以正月望夜幸其第賚賜不貲帝嘗幸安樂公主池主請御船安石曰御輕舟乘不測非帝王事乃止睿宗立授太子少保改封郇國復爲侍中中書令進開府儀同三司太平公主有異謀欲引安石數因其壻唐朶邀之拒不往帝一日召安石曰朝廷傾心東宮卿胡不察對曰太子仁孝天下所稱且有大功陛下今安得亡國語此必太平公主計也帝矍然曰卿勿言朕知之主竊聞乃構飛變欲訊之賴郭元振保護免遷尙書右僕射兼太子賓客同三品俄罷政事留守東都會妻薛怨壻婢笞殺之爲御史中丞楊茂謙所劾下遷蒲州刺史徙青州安石在蒲太常卿姜皎有所請拒之皎弟晦爲中丞以安石昔相中宗受遺制而宗楚客韋溫擅削相王輔政語安石無所建正諷侍御史洪子輿劾舉子輿以更赦不從監察御史郭震奏之有詔與韋嗣立趙彥昭等皆貶安石爲沔州別駕皎又奏安石護作定陵有所盜沒詔籍其贓安石數

曰祇須我死乃已發憤卒年六十四開元十七年贈蒲州刺史天寶初加贈左僕射郇國公諡文貞二子陟斌

陟字殷卿與弟斌俱秀敏異常童安石晚有子愛之神龍二年安石爲中書令陟甫十歲授溫王府東閣祭酒朝散大夫風格方整善文辭書有楷法一時知名士皆與游開元中居喪以父不得志歿乃與斌杜門不出八年親友更往敦曉乃彊調爲洛陽令宋璟見陟歎曰盛德遺範盡在是矣累除吏部郎中中書令張九齡引爲舍人與孫逖梁涉並司書命時號得才遷禮部侍郎陟於鑒裁尤長故事取人以一日試爲高下陟許自通所工先就其能試之已乃程考由是無遺材遷吏部侍郎選人多僞集與正調相冒陟有風采擿辨無不伏者黜正數百員銓綜號爲公平然任威嚴或至詈詰議者訾其峻又自以門品可坐階三公居常簡貴視僚黨警然其以道誼合雖後進布衣與均禮李林甫惡其名高恐逼己出爲襄陽太守徙河南採訪使以判官員錫善訊覆支使韋元甫工書奏時號員推韋狀陟皆倚任之俄襲郇國公坐事貶守鍾離義陽後爲河



東太守以失職內怏怏乃毀廉隅頗餉謝權倖欲自結天寶十二載入考華清宮楊國忠忌其才謂拾遺吳豸之曰子能發陟罪乎吾以御史相處豸之乃劾陟饋遺事國忠又使甥壻韋元忠左驗陟惶悸賂吉溫求揀由是俱得罪陟貶桂嶺尉坐不行徙平樂會安祿山陷洛陽弟斌沒賊國忠欲構陟與賊通密諭守吏令脅陟使憂死州豪傑共說曰昔張說被竄匿陳氏以免今若詔書下誰敢庇公願公乘扁舟遁去事寧乃出不亦美乎陟慨然曰命當爾其敢逃刑因謝遣堅臥不出歲餘肅宗卽位起爲吳郡太守使者趣追未至會永王兵起委陟招諭乃授御史大夫江東節度使與高適來瑱會安州陟曰今中原未平江淮騷離若不齊盟質信以示四方知吾等協心戮力則無以成功乃推瑱爲地主爲載書登壇曰淮西節度使瑒江東節度使陟淮南節度使適銜國威命糾合三垂翦除兇慝好惡同之毋有異志有渝此盟墜命亡族罔克生育皇天后土祖宗明神實鑒斯言辭旨慷慨士皆隕泣永王敗帝趣陟赴鳳翔初季廣琛從永王亂非其本謀陟表廣琛爲歷陽太守慰安之至是恐廣琛有後變乃馳

往諭詔恩釋其疑而後趣召帝雅聞陟名欲倚以相及是遷延疑有顧望意止除御史大夫會杜甫論房琯詞意迂慢帝令陟與崔光遠顏真卿按之陟奏甫言雖狂不失諫臣體帝繇是疏之富平人將軍王去榮殺其縣令帝將宥之陟曰昔漢高帝約法殺人者死今陛下殺人者生恐非所宜時朝廷尙新羣臣班殿中有相弔哭者帝以陟不任職用顏真卿代之更拜吏部尙書久之宗人伐墓柏坐不相教貶絳州刺史還授太常卿呂經入輔薦爲禮部尙書東宮留守史思明逼伊洛李光弼議守河陽陟率東京官屬入關避之詔授吏部尙書令就保永樂以圖收復卒年六十五贈荊州大都督陟早有名而爲林甫國忠擯廢及肅宗擇相自謂必得以後至不用任事者皆新進望風憚之多言其驕倨及入關又不許至京師鬱鬱不得志成疾且卒歎曰吾道窮於此乎性侈縱喜飾服馬侍兒闈童列左右常數十侷於王宮主第窮治饌羞擇膏腴地藝穀麥以鳥羽擇米每食視庖中所棄其直猶不減萬錢宴公侯家雖極水陸曾不下筯常以五采牋爲書記使侍妾主之以裁答受意而已皆有楷法陟唯署各自

謂所書陟字若五朵雲時人慕之號郇公五雲體然家法脩整敕子允就學夜分視之見其勤旦日問安色必怡稍怠則立堂下不與語雖家僮數十然應門賓客必允主之永泰元年贈尚書左僕射太常博士程皓議諡忠孝顏真卿以爲許國養親不兩立不當合二行爲諡主客員外郎歸崇敬亦駁正之右僕射郭英乂無學術卒用太常議云

斌父爲相時授太常通事舍人少脩整好文藝容止嚴峭有大臣體與陟齊名開元中薛王業以女妻之遷祕書丞天寶中爲中書舍人兼集賢院學士改太常少卿李林甫構韋堅獄斌以宗累貶巴陵太守移臨汝久之拜銀青光祿大夫列五品時陟守河東而從兄由爲右金吾衛將軍紹爲太子少師四第同時列戟衣冠罕比者祿山陷洛陽斌爲賊得署以黃門侍郎憂憤卒乾元元年贈祕書監斌天性質厚每朝會不敢離立笑言嘗大雪在廷者皆振裾更立斌不徙足雪甚幾至韉亦不失恭子況少隱王屋山孔述睿稱之及述睿以諫議大夫召薦況爲右拾遺不拜未幾以起居郎召半歲輒棄官去徙家龍門除司封

員外郎稱疾固辭元和初授諫議大夫勉諭到職數月乞骸骨以太子左庶子致仕卒況雖世貴而志冲遠不爲聲利所遷當時重其風操

叔夏安石兄通禮家學叔父太子詹事琨嘗曰而能繼漢丞相業矣擢明經第歷太常博士高宗崩卹禮亡缺叔夏與中書舍人賈大隱博士裴守真譔定其制擢春官員外郎武后拜洛享明堂凡所沿改皆叔夏祝欽明郭山暉等所裁討每立一議衆咨服之累遷成均司業后又詔五禮儀物司禮博士有所脩革須叔夏欽明等評處然後以聞進位春官侍郎中宗復位轉太常少卿爲建立廟社使進銀青光祿大夫累封沛郡公國子祭酒卒贈兗州都督脩文館學士諡曰文子紹

紹開元時歷集賢脩譔光祿卿遷太常唐興禮文雖具然制度時時繆缺不倫至顯慶中許敬宗建言籩豆以多爲貴宗廟乃踰于天請大祀十二中祀十小祀八大祀中祀籩簋豆皆一小祀無甑詔可二十三年赦令以籩豆之薦未能備物宜詔禮官學士共議以聞紹請宗廟籩豆皆加十二又言郊奠爵容止

一合容小則陋宜增大之兵部侍郎張均職方郎中韋述議曰禮天之所生地之所長苟可薦者莫不咸在聖人知孝子之情深而物類無限故爲之節使物有品器有數貴賤差降不得相越周制王食用六穀膳用六牲飲用六清羞用百有二十品珍用八物醬用百有二十齏而以四籩四豆供祭祀此祀與賓客豐省不得同舊矣且嗜好燕私之饌與時而遷故聖人一約以禮雖平生所嗜非禮則不薦所惡是禮則不去屈建命去祥祭之芟曰祭典有之不羞珍異不陳庶侈此則禮外之食前古不薦今欲以甘旨肥濃皆充於祭苟踰舊制其何極焉雖籩豆有加不能備也若曰以今之珍生所嗜好求神無方是簠簋可去而盤盂柶案當御矣韶濩可抵而箜篌笙笛應奏矣且自漢以來陵有寢宮歲時朔望薦以常饌固可盡孝子之心至宗廟法享不可變古從俗有司所承一升爵五升散禮凡宗廟貴者以爵賤者以散此貴小賤大以示節儉請如故太子賓客崔沔曰古者有所飲食必先嚴獻未化火則有毛血之薦未麴蘖則有玄酒之奠至後王作酒醴用犧牲故有三牲八簋五齊九獻然神尚玄可存而

不可測也祭主敬可備而不可廢也蓋薦貴新味不尙褻雖曰備物猶有節制存焉鉶俎籩豆簠簋尊壘周人時饌也其用通於燕享賓客周公乃與毛血玄酒共薦晉中郎盧諶家祭皆晉日食則當時之食不可闕於祀已唐家清廟時享禮饌備進周法也園寢上食時膳具陳漢法也職貢助祭致遠物也有新必薦順時令也苑囿躬稼所入蒐田親發所中皆因宜以薦薦而後食則濃腴鮮美盡在矣又敕有司著于令不必加籩豆之數也大凡祭器視物所宜故大羹古饌也盛以甗甗古器也和羹時饌也盛以鉶鉶時器也有古器而用時器者則毛血于盤玄酒于尊未有進時饌用古器者古質而今文有所不稱也雖加籩豆十二未足盡天下之美而措諸廟徒以近侈而見訾抵臣聞墨家者流出於清廟是廟貴儉不尙奢也禮部員外郎楊仲昌戶部郎中楊伯成左衛兵曹參軍劉秩等請如舊便宰相白奏玄宗曰朕承祖宗休德享祀粢盛實貴豐潔有如不應於法亦不敢用乃詔太常擇品味可增者稍加焉縉又請室加籩豆各六每四時以新果珍饗實之制可又詔獻爵視藥升所容以合古二十三年

詔書服紀所未通者令禮官學士詳議紹上言禮喪服舅總麻三月從母小功五月傳曰何以小功以名加也而堂姨舅母恩所不及焉外祖父母小功五月傳曰何以小功以尊加也舅總麻三月皆情親而屬疏也外祖正尊服同從母姨舅一等而有輕重堂姨舅親未疏不相爲服親舅母不如同曩其亦古意有所未暢且外祖小功此爲正尊請進至大功姨舅儕親服宜等請進舅至小功堂姨舅以疏降親舅從母一等親舅母古未有服請從袒免於是韋述議曰自高祖至玄孫并身謂之九族由近及遠差其輕重遂爲五服傳曰外親服皆總鄭玄曰外親之服異姓正服不過總外祖父母小功以尊加從母小功以名加舅甥外孫中外昆弟皆總以匹言之外祖則祖也舅則伯叔也父母之恩不殊而獨殺於外者有以也禽獸知母而不知父野人則父母等都邑之士則知尊禰大夫則知尊祖諸侯及太祖天子及始祖聖人究天道厚祖禰繫姓族親子孫則母黨之於本族不同明甚家無二尊喪無二斬人之所奉不可二也爲人後降其父母喪女子嫁殺其家之喪所存者遠抑者私也若外祖及舅加一等

而堂舅及姨著服則中外其別幾何且五服有上殺之義伯叔父母服大功從父昆弟亦大功以其出於祖服不得過於祖也從祖祖父母從祖父母從祖昆弟皆小功以其出於曾祖服不得過曾祖也族祖祖父母族祖父母族昆弟皆總以其出於高祖服不得過高祖也堂姨舅出外曾祖若爲之服則外曾祖父母外伯叔祖父母亦可制服矣外祖至大功則外曾祖小功外高祖總推而廣之與本族無異棄親錄疏不可謂順且服皆有報則堂甥外曾孫姪女之子皆當服聖人豈薄其骨肉恩愛哉蓋本於公者末於私議有所斷不得不然苟可加也則可減也如是禮可墮矣請如古便楊仲昌又言舅服小功魏徵嘗進之矣今之所請正同徵論堂舅堂姨舅母皆升袒免則外祖父母進至大功不加報於外孫乎外孫而報以大功則本宗之庶孫用何等邪帝手敕曰議旣爲姨舅服小功則舅母於舅有三年之喪不得全降於舅宜服總堂姨舅古未有服朕思睦厚九族宜袒免古有同爨總若比堂姨舅於同爨不已厚乎傳曰外親服皆總是亦不隔堂姨舅也若謂所服不得過本而復爲外曾祖父母外伯叔



父母制服亦何傷皆親親敦本意也侍中裴耀卿中書令張九齡禮部尚書李  
林甫奏言外服無降甥爲舅母服舅母亦報之夫之甥旣報則夫之姨舅又當  
服恐所引益疏臣等愚皆所不及詔曰從服六此其一也降殺於禮無文皆自  
身率親爲之數姨舅屬近以親言之亦姑伯之匹可曰所引疏耶婦人從夫者  
也夫於姨舅旣服矣從夫而服是謂睦親卿等宜熟計耀卿等奏言舅母總堂  
姨舅袒免請準制旨自我爲古罷諸儒議制曰可初帝詔歲率公卿迎氣東郊  
至三時常以孟月讀時令於正寢二十六年詔紹奏月令一篇朔日於宣政側  
設榻東向置案縉坐讀之諸司官長悉升殿坐聽歲餘罷高宗上元三年將禘  
享議者以禮緯三年禘五年禘公羊家五年再殷祭二家舛互諸儒莫能決太  
學博士史玄議曰春秋僖公三十三年十二月薨文公之二年八月丁卯大享  
公羊曰禘也則三年喪畢新君之二年當禘明年當禘羣廟又宣公八年禘僖  
公宣公八年皆有禘則後禘距前禘五年此則新君之二年禘三年禘爾後五  
年再殷祭則六年當禘八年禘昭公十年齊歸薨十三年喪畢當禘爲平丘之

會冬公如晉至十四年禘十五年禘傳曰有事於武宮是也至十八年禘二十  
年禘二十三年禘二十五年禘昭公二十五年有事於襄宮是也則禘後三年  
而禘又二年而禘合於禮議遂定後睿宗喪畢禘於廟至開元二十七年禘祭  
五禘祭七是歲縉奏四月嘗已禘孟冬又禘祀禮叢數請以夏禘爲大祭之源  
自是相循五年再祭矣縉終太子少師抗者安石從父兄子弱冠舉明經累官  
吏部郎中景雲初爲永昌令輦轂繁要抗不事威刑而治前令無及者遷右御  
史臺中丞邑民詣闕留不聽乃立碑著其惠開元三年自太子左庶子爲益州  
大都督府長史授黃門侍郎河曲胡康待賓叛詔持節慰撫抗於武略非所長  
稱疾逗留不及賊而返俄代王峻爲御史大夫兼按察京畿第拯方爲萬年令  
兄弟領本部時以爲榮坐薦御史非其人授安州都督改蒲州刺史入爲大理  
卿進刑部尚書分掌吏部選卒抗歷職以清儉不治產及終無以葬玄宗聞之  
特給櫬車贈太子少傅諡曰貞所表奉天尉梁昇卿新豐尉王倕華原尉王燾  
爲僚屬後皆爲顯人昇卿涉學工書於八分尤工歷廣州都督書東封朝覲碑

爲時絕筆倕累遷河西節度使天寶中功聞于邊宅所辟舉如王縉崔殷等皆一時選云

郭震字元振魏州貴鄉人以字顯長七尺美鬚髯少有大志十六與薛稷趙彥昭同爲太學生家嘗送資錢四十萬會有縷服者叩門自言五世未葬願假以治喪元振舉與之無少吝一不質名氏稷等嘆駭十八舉進士爲通泉尉任俠使氣撥去小節嘗盜鑄及掠賣部中口千餘以餉遺賓客百姓厭苦武后知所爲召欲詰旣與語奇之索所爲文章上寶劍篇后覽嘉歎詔示學士李嶠等卽授右武衛鎧曹參軍進奉宸監丞會吐蕃乞和其大將論欽陵請罷四鎮兵披十姓之地乃以元振充使因覘虜情還上疏曰利或生害害亦生利國家所患唯吐蕃與默啜耳今皆和附是將大利於中國也若圖之不審害且隨之欽陵欲裂十姓地解四鎮兵此動靜之機不可輕也若直遏其意恐邊患必甚於前宜以策緩之使其和望勿絕而惡不得萌固當取捨審也夫患在外者十姓四鎮是也患在內者甘涼瓜肅是也關隴屯戍向三十年力用困竭脫甘涼有一

日警豈堪廣調發耶善爲國者先料內以敵外不貪外以害內然後安平可保  
欽陵以四鎮近己畏我侵掠此吐蕃之要然青海吐渾密邈蘭鄯易爲我患亦  
國家之要今宜報欽陵曰四鎮本扼諸蕃走集以分其力使不得併兵東侵今  
委之則蕃力益彊易以擾動保後無東意當以吐渾諸部青海故地歸於我則  
俟斤部落還吐蕃矣此足杜欽陵口而和議未絕且四鎮久附其倚國之心豈  
與吐蕃等今未知利害情實而分裂之恐傷諸國意非制御之算后從之又言  
吐蕃倦徭戍久矣咸願解和以欽陵欲裂四鎮專制其國故未歸款陛下誠能  
歲發和親使而欽陵常不從則其下必怨設欲大舉固不能斯離間之漸也后  
然其計後數年吐蕃君臣相猜攜卒誅欽陵而其弟贊婆等來降因詔元振與  
河源軍大使夫蒙令卿率騎往迎授主客郎中久之突厥吐蕃聯兵寇涼州后  
方御洛城門宴邊遽至因輟樂拜元振爲涼州都督卽遣之初州境輪廣纔四  
百里虜來必傳城下元振始於南硤口置和戎城北磧置白亭軍制東要路遂  
拓境千五百里自是州無虜憂又遣甘州刺史李漢通闢屯田盡水陸之利稻

收豐衍舊涼州粟斛售數千至是歲數登至匹縑易數十斛支廩十年牛羊被野治涼五歲善撫御夷夏畏慕令行禁止道不舉遺河西諸郡置生祠揭碑頌德神龍中遷左驍衛將軍安西大都護西突厥酋烏質勒部落感彊款塞願和元振卽牙帳與計事會大雨雪元振立不動至夕凍冽烏質勒已老數拜伏不勝寒會罷卽死其子娑葛以元振計殺其父謀勒兵襲擊副使解琬知之勸元振夜遁元振不聽堅臥營爲不疑者明日素服往弔道逢娑葛兵虜不意元振來遂不敢逼揚言迎衛進至其帳修弔贈禮哭甚哀爲留數十日助喪事娑葛感義更遣使獻馬五千駝二百牛羊十餘萬制詔元振爲金山道行軍大總管烏質勒之將闕啜忠節與娑葛交怨屢相侵而闕啜兵弱不支元振奏請追闕啜入宿衛徙部落置瓜沙間詔許之闕啜遂行至播仙城遇經略使周以悌以悌說之曰國家厚秩待君以部落有兵故也今獨行入朝一羈旅胡人耳何以自全乃教以重寶賂宰相無入朝請發安西兵導吐蕃以擊娑葛求阿史那獻爲可汗以招十姓請郭虔瓘使拔汗那蒐其鎧馬以助軍旣得復讎部落更存

闕啜然之卽勒兵擊于闐坎城下之因所獲遣人間道齎黃金分遺宗楚客紀  
處訥使就其謀元振知之上疏曰國家往不與吐蕃十姓四鎮而不擾邊者蓋  
其諸豪泥婆羅等屬國自有攜貳故贊普南征身殞寇庭國中大亂嫡庶競立  
將相爭權自相翦屠士畜疲癘財力困窮顧人事天時兩不諧契所以屈志於  
漢非實忘十姓四鎮也如其有力後且必爭今忠節忽國家大計欲爲吐蕃鄉  
導主人四鎮危機恐從此啓吐蕃得志忠節亦當在賊掌股若爲復得事我往  
吐蕃於國無有恩力猶欲爭十姓四鎮今若効力樹恩則請分于闐疏勒者欲  
何理抑之且其國諸蠻及婆羅門方自嫌阻藉令求我助討者亦何以拒之是  
以古之賢人不願夷狄妄惠非不欲其力懼後求無厭益生中國事也臣愚以  
爲用吐蕃之力不見其使又請阿史那獻者豈非以可汗子孫能招綏十姓乎  
且斛瑟羅及懷道與獻父元慶叔僕羅兄倭子俱可汗子孫也往四鎮以他富  
十姓之亂請元慶爲可汗卒亦不能招來而元慶沒賊四鎮淪陷忠節亦嘗請  
以斛瑟羅及懷道爲可汗矣十姓未附而碎葉幾危又吐蕃亦嘗以倭子僕羅

并拔布爲可汗矣亦不能得十姓而皆自亡滅此非它其子孫無惠下之才恩義素絕故也豈止不能招懷且復爲四鎮患則冊可汗子孫其効固試矣獻又遠於其父兄人心何繇卽附若兵力足取十姓不必要須可汗子孫也又請以郭虔瓘蒐兵稅馬於拔汗那往虔瓘已嘗與忠節擅入其國臣時在疏勒不聞得一甲一馬而拔汗那挾忿侵擾南導吐蕃將倭子以擾四鎮且虔瓘往至拔汗那國四面無助若履虛邑猶引倭子爲蔽況今北有娑葛知虔瓘之西必引以相援拔汗那倚堅城而抗于內突厥邀伺于外虔瓘等豈能復如往年得安易之幸哉疏奏不省楚客等因建遣攝御史中丞馮嘉賓持節安撫闕啜以御史呂守素處置四鎮以牛師獎爲安西副都護代元振領甘涼兵召吐蕃併力擊娑葛娑葛之使娑臘知楚客謀馳報之娑葛怒卽發兵出安西撥換焉耆疏勒各五千騎於是闕啜在計舒河與嘉賓會娑葛兵奄至禽闕啜殺嘉賓又殺呂守素於僻城牛師獎於火燒城遂陷安西四鎮路絕元振屯疏勒水上未敢動楚客復表周以悌代元振且以阿史那獻爲十姓可汗置軍焉耆以取娑葛

娑葛遺元振書且言無仇于唐而楚客等受闕啜金欲加兵擊滅我故懼死而  
鬪且請斬楚客元振奏其狀楚客大怒誣元振有異圖召將罪之元振使子鴻  
間道奏乞留定西土不敢歸京師以悌乃得罪流白州而赦娑葛睿宗立召爲  
太僕卿將行安西酋長有癆面哭送者旌節下玉門關去涼州猶八百里城中  
爭具壺漿歡迎都督嗟歎以聞景雲二年進同中書門下三品遷吏部尚書封  
館陶縣男先天元年爲朔方軍大總管築豐安定遠城兵得保頓明年以兵部  
尚書復同中書門下三品玄宗誅太平公主也睿宗御承天門諸宰相走伏外  
省獨元振總兵扈帝事定宿中書者十四昔乃休進封代國公實封四百戶賜  
一子官物千段俄又兼御史大夫復爲朔方大總管以備突厥未行會玄宗講  
武驪山旣三令帝親鼓之元振遽奏禮止帝怒軍容不整引坐纛下將斬之劉  
幽求張說扣馬諫曰元振有大功雖得罪當宥乃赦死流新州開元元年帝思  
舊功起爲饒州司馬怏怏不得志道病卒年五十八十年贈太子少保元振雖  
少雄邁及貴居處乃儉約手不置書人莫見其喜愠建宅宣陽里未嘗一至諸



院廢自朝還對親欣欣退就室儼如也距國初仕至宰相而親具者唯元振云  
贊曰魏韋皆感慨而奮似矣及在昏上側臣間臨機會不一引手搃姦邪之謀  
誠可鄙哉至夔后豔王以烝譖撼宗社亦不肯從也古所謂具臣者諒乎元振  
功顯節完一跌未復世恨其蚤歿云

唐書卷一百二十二



唐書卷一百二十二考證

魏元忠傳睿宗詔陪葬定陵以實封一百五十戶賜其子晃○舊書作實封一  
百戶

唐書卷一百二十二考證

新修志一四十一卷

序

此志之修也其始於乾隆二十五年歲次庚申○其成於乾隆二十九年歲次甲子○其書之也

唐書卷一百二十三

宋 端 明 殿 學 士 宋 祁 撰

列傳第四十八

李蕭盧韋趙和

李嶠字巨山趙州贊皇人早孤事母孝爲兒時夢人遺雙筆自是有文辭十五通五經薛元超稱之二十擢進士第始調安定尉舉制策甲科遷長安時畿尉名文章者駱賓王劉光業嶠最少與等夷授監察御史高宗擊邕巖二州叛獠詔監其軍嶠入洞喻降之由是罷兵稍遷給事中會來俊臣構狄仁傑李嗣真裴宣禮等獄將抵死敕嶠與大理少卿張德裕侍御史劉憲覆驗德裕等內知其寃不敢異嶠曰知其枉不申是謂見義不爲者卒與二人列其枉忤武后旨出爲潤州司馬久乃召爲鳳閣舍人文冊大號令多主爲之初置右御史臺察州縣吏善惡風俗得失嶠上疏曰禁網上疏法象宜簡簡則法易行而不煩雜疏則所羅廣而不苛碎伏見垂拱時諸道巡察使科條四十有四至別敕令又

三十而使以三月出盡十一月奏事每道所察吏多者二千少亦千計要在品  
覈才行而褒貶之今期會迫促奔逐不暇欲望詳究所能不亦艱哉此非隳於  
職才有限力不逮耳臣願量其功程以爲節制使器周於用力濟於時然後得  
失可以精覈矣又言今所察按準漢六條而推廣之則無不包矣烏在多張事  
目也且朝廷萬幾非無事而幾事之動常在四方故出使者冠蓋相望今已置  
使則外州之事悉得專之傳驛減矣請率十州置一御史以期歲爲之限容其  
身到屬縣過閭里督察姦訛采訪風俗然後可課其成功且御史出入天禁勵  
己自修比他吏相百也按劾回庸糾擿隱欺比他吏相十也陛下誠用臣言妙  
擇能者委之莫不盡力効死矣武后善之下制析天下爲二十道擇堪使者爲  
衆議沮止俄知天官侍郎事進麟臺少監同鳳閣鸞臺平章事遷鸞臺侍郎會  
張錫輔政嶠其出也罷爲成均祭酒俄檢校文昌左丞留守東都長安三年以  
本官復爲平章事知納言遷內史嶠辭劇復爲成均祭酒平章事武后將建大  
像於白司馬坂嶠諫造像雖俾浮屠輸錢然非州縣承辦不能濟是名雖不稅

而實稅之臣計天下編戶貧弱者衆有賣舍帖田供王役者今造像錢積十七萬緡若頒之窮人家給千錢則紓十七萬戶飢寒之苦德无窮矣不納張易之敗坐附會貶豫州刺史未行改通州數月以吏部侍郎召俄遷尙書神龍二年代韋安石爲中書令嶠在吏部時陰欲藉時望復宰相乃奏置員外官數千旣吏衆猥府庫虛耗乃上書歸咎于時因蓋向非曰元首之尊居有重門擊柝之衛出有清警戒道之禁所以備非常息異望誠不可易舉動慢防閑也陛下厭崇邃輕尊嚴微服潛遊閱廛過市行路私議朝廷驚懼如禍產意外縱不自惜奈宗廟蒼生何又分職建官不可以濫傳曰官不必備惟其人自帝室中興以不慎爵賞爲惠冒級躐階朝陞夕改正闕不給加以員外內則府庫爲殫外則黎庶蒙害非求賢助治之道也願愛吝班榮息匪服之議今文武六十以上而天造舍容皆矜恤之老病者已解還授員外者旣遣復留恐非所以消敵救時也請敕有司料其可用進不可用退又遠方夷人不堪治事國家向務撫納而官之非立功曾長類糜俸祿願商度非要者一切放還又易稱何以守位曰仁

何以聚人曰財今百姓乏饗不安居處不可以守位倉儲蕩耗財力傾殫不足以聚人山東病水潦江左困輸轉國匱於上人窮於下如令邊場少疎恐逋亡遂多盜賊羣行何財召募何衆閑遏乎又崇作寺觀功費浩廣今山東歲饑糴糠不厭而投艱隕之會收庸調之半用吁嗟之物以榮土木恐怨結三靈謗蒙四海又比緣征戍巧詐百情破役隱身規脫租賦今道人私度者幾數十萬其中高戶多丁黠商大賈詭作臺符驛名僞度且國計軍防並仰丁口今丁皆出家兵悉入道征行租賦何以備之又重賂貴近補府若史移沒籍產以州縣甲等更爲下戶當道城鎮至無捉驛者役逮小弱卽破其家願許十道使訪察括舉使姦猾不得而隱又太常樂戶已多復求訪散樂獨持鼗鼓者已二萬員願量留之餘勒還籍以杜妄費中宗以其身宰相乃自陳失政乞罷官無所嫁非手詔詰讓嶠惶恐復視事三年加修文館大學士封趙國公以特進同中書門下三品睿宗立罷政事下除懷州刺史致仕初中宗崩嶠嘗密請相王諸子不宜留京師及玄宗嗣位獲其表宮中或請誅之張說曰嶠誠慳逆順然爲當時



謀伏非其主不可追罪天子亦顧數更赦遂免貶滁州別駕聽隨子虔州刺史  
暢之官改廬州別駕卒年七十嶠富才思有所屬綴人多傳諷武后時汜水獲  
瑞石嶠爲御史上皇符一篇爲世譏薄然其仕前與王勃楊盈川接中與崔融  
蘇味道齊名晚諸人沒而爲文章宿老一時學者取法焉

蕭至忠沂州丞人祖德言爲祕書少監至忠少與友期諸路會雨雪人引避至  
忠曰寧有與人期可以失信卒友至乃去衆歎服仕爲伊闕洛陽尉遷監察御  
史劾奏鳳閣侍郎蘇味道賊貪超拜吏部員外郎至忠長擊斷譽聞當時中宗  
神龍初爲御史中丞始至忠爲御史而李承嘉爲大夫嘗讓諸御史曰彈事有  
不咨大夫可乎衆不敢對至忠獨曰故事臺無長官御史天子耳目也其所請  
奏當專達若大夫許而後論卽劾大夫者又誰白哉承嘉慚至是承嘉爲戶部  
尙書至忠劾祝欽明竇希玠與承嘉等罪百寮震悚遷吏部侍郎猶兼中丞節  
愍太子以兵誅武三思而敗宗楚客等諗侍御史冉祖雍上變言相王與太子  
謀帝欲按之至忠泣曰往者天后欲以相王爲太子而王不食累日獨請迎陛

下其讓德天下莫不聞陛下貴爲天子不能容一第受人羅織耶竊爲陛下不取帝納其言止尋授中書侍郎同中書門下平章事上疏陳時政曰求治之道首于用賢苟非其才則官曠官曠則事廢事廢則人殘歷代所以陵遲者此也今授職用人多因貴要爲粉飾上下相蒙苟得爲是夫官爵公器也恩倖私惠也王者正可金帛富之梁肉食之以存私澤也若公器而私用之則公義不行而勞人解體私謁開而正言塞日朶月削卒見凋弊今列位已廣冗員復倍陛下降不賞之澤近戚有無涯之請臺閣之內朱紫充滿官秩益輕恩賞彌數才者不用用者不才故人不効力官匪其人欲求治固難矣又宰相要官子弟多居美爵並罕才藝而更相諉託詩云私人之子百寮是試或以其酒不以其漿韜韜佩璫不以其長此言王政不平而衆官廢職私家子列試榮班徒長其佩爾臣願陛下愛惜爵賞官無虛授進大雅以樞近退小人於閑左使政令惟一私不害公則天下幸甚且貞觀故事宰相子弟多居外職非直抑彊宗亦以擇賢才爾請自宰相及諸司長官子弟並授外官共寧百姓表裏相統帝不納俄

爲侍中中書令時楚客懷姦植黨而韋巨源楊再思李嶠務自安無所弼正至忠介其間獨不詭隨時望翕然歸重帝亦曰宰相中至忠最憐我韋后嘗爲其弟洵與至忠殤女冥婚至忠又以女妻后舅崔從禮子無訛兩家合禮帝主蕭后主崔時謂天子嫁女皇后娶婦唐隆元年以后黨應坐而太平公主爲言出爲晉州刺史治有名默啜遣大臣來朝見至忠風采逡巡畏俯謂人曰是宜相天子何乃居外乎太平寢用事至忠乃自附納且丐還主以至忠子任千牛死韋氏難意怨望易動能助己請于帝拜刑部尙書復爲中書令封鄼國公乃參主逆謀先天二年主敗至忠遁入南山數日捕誅之籍其家至忠始在朝有風望容止閑敏見推爲各臣外方直糾擿不法而內無守觀時輕重而去就之始爲御史桓彥範等頗引重五王失政更因武三思得中丞附安樂公主爲宰相及韋氏敗遽發韋洵壘持其女柩歸後依太平復當國嘗出主第遇宋璟璟戲曰非所望於蕭傅至忠曰善乎宋生之言然不能自返也娣嫁蔣欽緒欽緒每戒之至忠不聽歎曰九世卿族一舉而滅之可哀也已不喜接賓客以簡儉自

高故生平奉賜無所遺施及籍沒珍寶不可計然玄宗賢其爲人後得源乾曜  
亟用之謂高力士曰若知吾進乾曜遽乎吾以其貌言似蕭至忠力士曰彼不  
嘗負陛下乎帝曰至忠誠國器但晚謬爾其始不謂之賢哉弟元嘉工部侍郎  
廣微工部員外郎

贊曰異哉玄宗之器蕭至忠也不亦惑乎至忠本非賢而寄賢以奸利失之則  
邀利以喪賢姻豔后挾寵主取宰相謀間王室身誅家破遺臭無窮而帝以乾  
曜似之遽使當國是帝舉不知至忠之不可用又不知乾曜之所可用也或稱  
帝不以罪掩才益可怪嘆嗚呼力士誠腐夫庸人不能發擲天子之迷若曰至  
忠賢於初固不繆於末旣繆於末果不賢於初惟陛下圖之如是帝且悟往失  
而精來鑒已其後相李林甫將安祿山皆基于不明身播岷陬信自取之歟  
盧藏用字子潛幽州范陽人父瓚魏州長史號才吏藏用能屬文舉進士不得  
調與兄徵明偕隱終南少室二山學練氣爲辟穀登衡廬徜徉岷峨與陳子昂  
趙貞固友善長安中召授左拾遺武后作興泰宮於萬安山上疏諫曰陛下離

宮別觀固多矣又窮人力以事土木臣恐議者以陛下爲不愛人而奉己也且頃歲穀雖頗登而百姓未有儲陛下巡幸訖靡休息斤斧之役歲月不空不因此時施德布化而又廣宮苑臣恐下未易堪今左右近臣以諛意爲忠犯忤爲患至令陛下不知百姓失業百姓亦不知左右傷陛下之仁也忠臣不避誅震以納君於仁明主不惡切詆以趨名于後陛下誠能發明知以勞人爲辭則天下必以爲愛力而苦己也不然下臣此章得與執事者共議不從姚元崇持節靈武道奏爲管記還應縣令舉甲科爲濟陽令神龍中累擢中書舍人數糾駁僞官歷吏部黃門侍郎修文館學士坐親累降工部侍郎進尚書右丞附太平公主主誅玄宗欲捕斬藏用顧未執政意解乃流新州或告謀反推無狀流驩州會交趾叛藏用有捍禦勞改昭州司戶參軍遷黔州長史判都督事卒于始興藏用善著龜九宮術工草隸大小篆八分善琴奕思精遠士貴其多能嘗以俗徇陰陽拘畏乖至理泥變通有國者所不宜專謂天道從人者也古爲政者刑獄不濫則人壽賦斂省則人富法令有常則邦寧賞罰中則兵彊禮者士所

歸賞者士所死禮賞不倦則士爭先否者雖揆時行罰涓日出號無成功矣故任賢使能不時日而利明法審令不卜筮而吉養勞貴功不禱祠而福乃爲折滯論以暢其方世謂知言子昂貞固前死藏用撫其孤有恩人稱能終始交始隱山中時有意當世人目爲隨駕隱士晚乃徇權利務爲驕縱素節盡矣司馬承禎嘗召至闕下將還山藏用指終南曰此中大有嘉處承禎徐曰以僕視之仕宦之捷徑耳藏用慚無子弟若虛多才博物隴西辛怡諫爲職方有獲異鼠者豹首虎臆大如拳怡諫謂之鼯鼠而賦之若虛曰非也此許慎所謂鼯鼠豹文而形小一坐驚服終起居郎集賢院學士

韋巨源與安石同系後周京兆尹總曾孫祖貞伯襲鄖國公入隋改舒國巨源有吏幹武后時累遷夏官侍郎同鳳閣鸞臺平章事其治委碎無大體句校省中遺隱下符斂克不少獨雖收其利然下所怨苦坐李昭德累貶麟州刺史累拜地官尙書神龍初以吏部尙書同中書門下二品時要官缺執政以次用其親巨源秉筆當除十人楊再思得其一試問餘授皆諸宰相近屬再思喟然曰

吾等誠負天下巨源曰時當爾耳是時雖賢有德終莫得進士大夫莫不解體會安石爲中書令避親罷政事尋遷侍中舒國公韋后與敘昆弟附屬籍三思封戶在貝州屬大水刺史宋璟議免其租巨源以爲蠶桑可輸絲是河朔人多流徙者景龍二年韋后自言衣笥有五色雲巨源倡其僞勸中宗宣布天下帝從其言因是大赦巨源見帝昏惑乃與宗楚客鄭愔趙延禧等推處祥妖陰導韋氏行武后故事俄遷尙書左僕射仍知政事帝方南郊巨源請后爲亞獻而自爲終獻及臨淄王平諸韋家人請避之巨源曰吾大臣無容見難不赴出都街亂兵殺之年八十睿宗立贈特進荊州大都督博士李處直請謚爲昭戶部員外郎李邕以巨源附武三思爲相託韋后親屬謚昭爲非處直執不改邕列陳其惡不見用然世皆直邕韋氏自安石及武后時宰相待價巨源皆近親其族至大官者又數十人

趙彥昭字奐然甘州張掖人父武孟少游獵以所獲饋其母母泣曰汝不好書而敖蕩吾安望哉不爲食武孟感激遂力學淹該書記自長安丞爲右臺侍御

史著河西人物志十篇彥昭少豪邁風骨秀爽及進士第調爲南部尉與郭元振薛稷蕭至忠善自新豐丞爲左臺監察御史景龍中累遷中書侍郎同中書門下平章事金城公主嫁吐蕃始以紀處訥爲使處訥辭乃授彥昭彥昭顧己處外恐權寵奪移不悅司農卿趙履温曰公天宰而爲一介使不亦鄙乎彥昭問計安出履温乃爲請安樂公主留之遂以將軍楊矩代睿宗立出爲宋州刺史坐累貶歸州俄授涼州都督爲政嚴下皆股慄入爲吏部侍郎持節按邊遷御史大夫蕭至忠等誅郭元振張說言彥昭與祕謀改刑部尙書封耿國公實封百戶彥昭本以權幸進中宗時有巫趙掖鬼道出入禁掖彥昭以姑事之嘗衣婦服乘車與妻偕謁其得宰相巫力也於是殿中侍御史郭震劾暴舊惡會姚崇執政惡其人貶江州別駕卒

和逢堯岐州岐山人武后時負鼎詣闕下上書自言願助天子和銓百度有司讓曰昔桀不道伊尹負鼎干湯今天子聖明百司以和尙何所調逢堯不能答流莊州十餘年乃舉進士高第累擢監察御史突厥默啜請尙公主逢堯以御



史中丞攝鴻臚卿報可默啜遣貴近頡利來曰詔送金鏤具鞍乃塗金非天子  
意使者不可信雖得公主猶非實請罷和親欲馳去左右色動逢堯呼曰我大  
國使不受我辭可輒去乃牽持其人謂曰漢法重女壻而送鞍具欲安且久不  
以金爲貴可汗乃貪金而不貴信邪默啜聞曰漢使至吾國衆矣斯食鐵石人  
不可易因備禮以見逢堯說之曰天子昔爲單于都護思與可汗通舊好可汗  
尙嚮風慕義襲冠冕取重諸蕃默啜信之爲斂髮紫衣南面再拜稱臣遣子入  
朝逢堯以使有指擢戶部侍郎坐善太平公主斥朗州司馬終柘州刺史逢堯  
諛詭當大事敢徼福故卒以附麗廢然唐興奉使者稱逢堯

唐書卷一百二十三



唐書卷一百二十三考證

蕭至忠傳祖德言○舊書作德言曾孫

尋授中書侍郎○舊書作轉黃門侍郎

盧藏用傳父璪魏州長史○舊書官至魏州司馬

韋巨源傳祖貞伯○舊書祖名匡伯

趙彥昭傳睿宗立出爲宋州刺史坐累貶歸州俄授涼州都督○舊書先爲涼州都督後爲宋州刺史

唐書卷一百二十三考證